

Siunnersuummut oqaaseqaatit

Nalinginnaasunik oqaaseqaatit

1. Aallarniut

1.1. Siunnersuummut pingaarnertut tunuliaqutaasut

Naalakkersuisoqatigiinnissamut isumaqatigiissummi ulloq 4. april 2022-meersumi takuneqarsinnaavoq takornariartitsinermit inatsimmik nutaamik suliaqartoqassasoq, tassuunalu qularnaarneqassasoq nunatsinni innuttaasut suliaqarfinni tamani salliutinneqarnissaat.

Kalaallit Nunaannilu takornariartitsinermik inuussutissarsiuteqartut aamma kissaateqarsimapput takornariartitsinermi suliaqarfimmi atugassarititaasusssanik killiliussanik suliaqartoqartariaqartoq.

Tamatumalu saniatigut aamma umiarsuup takornariartunik ilaasunik angallassissutaasup ulloq 11. september 2023 ikkarlissimanera tamat akornanni oqallinnermik pilersitsisimalluni. Tamatumuuna oqallisaalerpoq isumaliutersuutigineqarlunilu umiarsuit takornariartaatit ilaasunik angallassisartut nunatsinnut sumiiffinnullu pineqartunik qanoq ittunik tunniussaqaqartarnersut pillugit, aammalu piumasqaatinik qanoq ittunik taakkununga peqarnera pillugu. Tamannalu tunuliaqutaralugu aamma kissaataavoq periarfissaasariaqartoq tamatumani atugassarititaasunik ersarinnerusunik aalajangersagaqarnissaanik. [Tamatumani assersuutigalugit pineqarsinnaapput sumiiffinnik immikkoortukkaartunik – taaneqartunik zone-kaartunik aalajangersagaqalernissaa umiarsuarnut takornariartunik angallassissutinut pineqartunut atatillugu, kiisalu inuussutissarsiornikkut aamma ingerlatsisuusunut tunngatillugu, takornariartitsinermik suliaqarfinnaanngitsumut atatillugu, imaluunniit piffissani aalajangersimasuni piumasqaataasunik, imaluunniit allatigut immikkut piumasqaatinik peqarnissaa.] Tamatumunngalu aamma atatillugu kissaatiginartut oqaatigineqarpoq zone-nik taaneqartuni sumiiffinni angalasarnerit uninngaartarnerillu inunnt tamakkunaniittunik atuuttunik peqartariaqartoq, ilaatigut qularnaarumallugu illersorumallugillu sumiiffiit pineqartut assigiinngitsutigut atorneqarsinnaaneri, piffinni angalaartut sillimanissaat, kiisalu aamma sumiiffinni naasut uumasullu illersorumallugit.

Tamanna tunuliaqutaralugu Inatsisartut inatsisissaannut siunnersuut una saqqummiunneqarpoq.

Inatsisartut inatsisaata matuma siunertaraa Kalaallit Nunaanni takornariartitsinermik inuussutissarsiorderup ineriartornerata siuarsarneqarnissaa, kiisalu qularnaarumaneqarluni takornariartitsinermik ingerlatsinerit ingerlanneqassasut isiginiaalluni sillimaniarnernik, peqqissusissamik, avatangiisinik aamma piujuaannartitsinermik, aammalu takornariartitsinermik ingerlatsisuusut inuiaqatigiit kalaallit ineriartornerannut tunniussaqaqartarlutik peqataanissaat.

Siunnersuutikkut periarfissaqartitsisoqarpoq Kalaallit Nunaanni takornariartitsinermik ineriartortitsinerit siuarsarneqarnissaannut, killiliussat aalajangersarneqarsimasut iluanni, taamaasillunilu naleqqunnerpaamik periaaseqarnikkut qularnaarniarneqarlutik takornariartitsinermik inuussutissarsiortut pitsaanerpaanik atugassaqartinneqarnissaat, ilutigisaanilu siuliani pineqartut pitsaasumik isiginiarnerisigut ineriartortitsisoqarnissaa. Siunnersuutikkut pingaarnertut anguniagaavoq piffissamut ungasissumut sammisunik ineriartortitsinissamut killiliussanik pilersitsisoqarnissaa, nunatsinni takornariartitsinermik inuussutissarsiutini ineriartortitsinermik annertusisamik pilersitsiviusumik, annertusaanerup ineriartortitsinerullu ilaatigut annertusisanik piujuaannartitsinermik sillimaniarnermik il.il. tunniussaqaqarneratigut, Kalaallit Nunaanni pinngortitamut aamma uumasunut nujuartanut.

Inatsisartullu inatsisaatigut ugguuna aammattaq siunertaavoq tapersersuinissaq nunap immikkoortuni – zone-nik taaneqartuni immikkoortukkaanik aaqqissuussinissanik maleruagassiornikkut, piffissanut aalajangersimasunut piunasaqaateqarnernik allatigullu inuussutissarsiornikkut immikkut ittunik atugassarititaasunik aaqqissuussinikkut, qularnaarneqarsinnaaqullugu inuussutissarsiutit allat aamma ingerlanneqassasut ilaatigut sumiiffinnik pineqartunik atuinikkut isiginiaaviulluartunik, ilaatigut sumiiffinnik atuinikkut, sillimaniarnikkut, avatangiisitigut aamma piujuaannartitsineq eqqarsaatigalugu. Pissutsinik isiginiaaneq pineqartutut ittoq tunngavigalugu siunertaavoq Inatsisartut inatsisaatigut tapersorneqassasut periarfissat inuit killeqartunik zone-ni pineqartuni angalaartarsinnaanerat.

1.2. Siunnersuutip ataatsimut isigisunik imarisai

Siunnersuut imaqarpoq malittarisassanik aalajangersaasunik aaqqissuussinernik takornariartitsinermik ingerlatsisunut Kalaallit Nunaanni piunasaqaatinik, Naalakkersuisunit akuersissummik tunniussisoqartarnissaa pillugu. Siunnersuutigineqarpoq piunasaqaateqartoqarnissaa akuersissummik pigisaqartut ilaatigut pingaarnertut najugaqartuusassasut tamakkiisumillu Kalaallit Nunaanni akileraartartuusassasut, takornariartitsinermillu ingerlatsinerminnut atatillugu sillimaniarnissamut pilersaarusiorsimasassasut ajutoortoqarsinnaaneranut takornariartitsinermut atatillugu, sillimmasiisassasut allatigullu sillimaniarnikkut aaqqissuussisassasut. Ilanngulluguttaaq siunnersuutigineqarpoq, Naalakkersuisut piunasaqaatit siuliani pineqartut eqqortinneqartarneri pillugit nakkutilliisuussasut. Kiisalu aamma ilanngullugu siunnersuutaavoq, Naalakkersuisut ersarinnerusunik malittarisassiorsinnaanerat, inuussutissarsiornikkut ingerlatsineq pisinnaasoq sumiiffinni ersarinnerusunik aalajangersaavigineqartuni, piffissaliussani ersarinnerusuni imaluunniit atugassarititaasut immikkut ittut atortinneqarnerisigut. Assigisaanik aamma siunnersuutigineqarpoq Naalakkersuisut killilersuisinnaasut angalaarsinnaanernik uninngaarsinnaanernillu sumiiffinni aalajangersimasuni, sumiiffiup allatigut atorneqarsinnaanera illersorumallugu, angalaartartut sillimaniarnissaat illersorumallugu kiisalu aamma pinngortitami sumiiffiit avatangiisillu aamma illersorneqarnissaat isiginiarumallugit.

2. Siunnersuummi immikkoortut pingaarnerit

2.1. Takornariartitsinermik ingerlatsisuusinnaanermut akuersissummik akuersissuteqartoqarnissaanik piumasaqaat

2.1.1. Inatsisit atuuttut

Piffissami matumani inatsiseqanngilaq takornariartitsinerimi akuersissummik akuersissuteqartarnermik immikkut aqutsisumik.

Taamaakkaluartoq Sumiiffinni nunami aalajangersimasuni takornariartitsinerimut akuersissuteqartarnissaq pillugu Inatsisartut inatsisaat aqutsisuuvoq, takornariartitsinerimi nioqqummik nioqqutinilluunniit arlaqartunik tunisaqartarnermik sumiiffinni aalajangersimasuni.

2.1.2. Naalackersuisut isumaliutaat

Siunnersuut ilaatigut siunnerfeqarpoq Kalaallit Nunaanni takornariartitsinerup siuarsarnissaanik, ineriartornerullu tamatuma sillimaniarnermik, peqqissutsimik aamma avatangiisinik piujuaannartitsinermillu isiginiaalluarluni ingerlanneqarnissaanik. Naliliisoqarpoq ineriartornerup tamatuma pissusissamisoornerpaamik siuarsarneqarsinnaanera ineriartortinneqarsinnaaneralu takornariartitsinerimi ingerlatsinerimut killiliussanik aalajangersaanikkut.

Taamaattumik Naalackersuisut naliliineraat piumasaqaatinik aalajangersaasoqassasoq Kalaallit Nunaanni takornariartitsisoqarsinnaanngitsoq Naalackersuisunit akuersissummik a peqanngikkaanni. Akuersissummillu tunineqarluni nalunaarfigineqartut tamatuma kingornagut inatsisinik eqquutsitsillutik takornariartitsinermik ingerlatsisassapput, Inatsisartut inatsisaanni uani killiliussat iluanni, aamma malittarisassat inatsimmik tunngaveqartumik suliaasut iluanni, akuersissutillu pigineqartup killiliussaasa iluini. Akuersissut aallaavittut piffissalikkami piffissami atuuttussatut tunniunneqartariaqarpoq.

Aaqqissuussinermi aalajangersimasunik piumasaqaateqartoqarsinnaassaaq akuersissuteqarfigineqarnissamik qinnuteqartup sillimaniarnerimut pilersarusiorsimanissaa takornariartitsinermik ingerlatsinissamut, tamannalu akuersissummik akuersissuteqarsinnaanernut aallaaviussalluni. Pisariaqarpoq inatsimmi piumasaqaataasut sanioqqunneqarsinnaanissaannut arlaqartunik periarfissaqarnissaa, matumani ingerlatsisut minnerit allaffissornikkut oqimaarsaatissanik tuniorarumanagit. Taassumap saniatigut kaffisortitsinerit, tivanerit, uaaernerit, allallu assingusut qitinnikkut, nipilersornikkut, assitigut, allatigulluunniit takussaasumik, tusaaneqarsinnaasumilluunniit takutitsinissamik siunertaqarlutik Kalaallit kulturiannik takutitsinissamik siunertaqartut siunnersuummi ilaatinneqassanngikkaluarput. Kiisalu aamma pisuni immikkut ittuni piumasaqaatinik sanioqqunneqarsinnaanerinik aalajangersagaqartariaqarluni.

Ilaatigut piunasaqartoqartariaqarpoq pisinnaatitsissummik pigisaqartup Kalaallit Nunaannut attaveqartuuneranik aammalu akileraartartuuneranik.

Inuussutissarsiornermut, Niuernermut, Aatsitassanut Inatsisinik Atuutitsinermut Naligiissitaanermullu Naalakkersuisoqarfiup tamatumunnga atatillugu isumaliutigisimavaa piunasaqaatit taamaattut arsaarinnittoqarsinnaanernik isumaliuteqarsinnaanermut pissutissaqartitsilissanersut. Inatsimmi tunngaviusumi § 73, imm. 1 naapertorlugu kinaluunniit pisussaasunngortinneqarsinnaanngilaq sanaartukkanik pigisaminik iperasinnaanernik, inuit tamat tamanna piunasarinnigippassuk. Tamannalu aamma taamaallaat pisinnaavoq inatsisiliornikkut aammalu tamakkiisumik taarsiiviginninnikkut.

Inuussutissarsiornermut, Niuernermut, Aatsitassanut Inatsisinik Atuutitsinermut Naligiissitaanermullu Naalakkersuisoqarfik isumaqarpoq, inatsisartut inatsisaata atuutilernissaa sioqqullugu inuit imaluunniit inuit inatsisitigut pisinnaatitaasut unioqqutitsinngitsumik takornariartitsineramik ingerlatsisut eqqarsaatigalugit, aaqqiissutissatut sinnersuutigineqartoq tunngaviusumik inatsisip § 73-ianik illersugaalluni pisinnaatitaaffimmut akuliussinnaassasoq. Taassumap saniatigut Inuussutissarsiornermut, Niuernermut, Aatsitassanut Inatsisinik Atuutitsinermut Naligiissitaanermullu Naalakkersuisoqarfiup nalilerpaa, tunngaviusumik inatsisip § 73-ia malillugu taamatut akuliunneq nalinginnaasumik arsaarinninnermik kinguneqassanngitsoq.

Taamaalilluni siunnersuut piginnittuusinnaanernik nuutsinissamik kinguneqannginnissaa pingaartinneqarpoq, killuanilli takornialerineramik ingerlatsisut pingaartumik Kalaallit Nunaanni najugaqarnissaannik, tamakkiisumillu akileraartuunissaanik piunasaqaasiornissaa, inuussutissarsiummik nalinginnaasumik malittarisassiorneq pineqartoq, inatsisartut inatsisaasa atuutisilernissaanut siunnersuutigineqartumi (1. januar 2025) inatsimmik unioqqutitsinerunngitsumik takornariartitsineramik ingerlatanut siunnersuut aatsaat 1. januar 2027-mi atuutilissammat piffissamik atuutisilersitsiviusussamik aalajangersaasoqarnissaa, takornialerineramik ingerlatsisut Kalaallit Nunaannut najugaqalernerikkut, taamaalillutillu ingerlatamik nangitsinissaminnut imaluunniit ingerlatap, piginneqataassutsilluunniit Kalaallit Nunaanni najugaqartunut tunineqarnissaa periarfissaqartuaannarnissaat, Kalaallit Nunaannilu inatsisini allani assingusunik malittarisassaqaassasoq.

Taamaakkaluartoq immikkut illuinnartumik takornialerineramik ingerlatsisut ataasiakkaat ima sakkortutigisumik eqqugaallutik arsaarinninnermik kingunilimmik eqqugaassanngitsut siumut oqaatigineqarsinnaanngisaannarpoq. Tassani ataasiakkaani arsaarinnittoqassanersoq pillugu erseqqissumik, ataasiakkaatigullu naliliisoqarnissaa tunualiaqutaavoq, taamaattoqassappallu ilaatigut suliffeqarfiit ataasiakkaat paasissutissaat misissorneqassallutik. Taamaattumik inatsisitigut aaqqiissutit arsaarinninnermik kinguneqarnissaannik tunngaveqanngikkaluartut, immikkut akuersissuteqarnissaq pillugu nalinginnaasumik inatsisitigut periarfissiisoqartarpoq. Akuliunneq

immikkut illuinnartumik arsaarinninnermik kinguneqassappat, tamatumunnga imaluunniit tunniussinissamik kinguneqassallutik piumasaqaatinut pineqartoq tamakkiisumik imaluunniit ilaannakortumik immikkut akuerineqarnissaminik pisinnaatitaaffeqassaaq. Takornarialerinnermik ingerlatsisoq tamatuminnga eqqartuussivimmuut aamma suliaassanngortitsisinnaavoq.

Tamatumalu saniatigut piumasaqaateqartoqartariaqarpoq qinnuteqartup sillimaniarnermut pilersaarummik suliaqarsimaneramik takornariartitsinernut neqeroorutiginiarneqartunut ingerlanniarneqartunullu atasumik, kiisalu aamma sillimasiisoqarsimassalluni imaluunniit allatigut qularnaveeqqusiisoqassalluni.

Nalilerneqarpoq inuit imaluunniit inuit inatsisitigut pisinnaatitaasut inunnik Kalaallit Nunaanniit utimullu nunallu nammineq iluani angallassinernik ingerlatsisartut, kiisalu tamatumunngali atatillugu takornariartitsinernik ingerlatsisanngitsut inatsisartut inatsisaata atuuffianit, matumani akuersissuteqarnissamut piumasaqaataasumut ilaassanngitsut. Tamanna taamaallaat atuuttariaqarpoq inunnik angallassisarnerni. Angallassissutit atorineqassappata takusassarsiortitsisarnernut kiffartuussinernullu allanut Inatsisartut inatsisaannik matuminnga tungaveqartunik, taava akuersissummik akuersissuteqarnissamik piumasaqartoqartariaqarpoq.

Inatsisartut inatsisaanni matumani piumasaqaataasut aamma malittarisassat Inatsisartut inatsisaannik tungaveqartut atortinneqarnerisa, akuersissummilu atugassarititaasut naammassineqartarnissaannik nakkutilliisoqartariaqarpoq.

Naalakkersuisunut periarfissaasariaqarpoq peqqussuteqarsinnaanernut, takornariartitsisartut pissutsinik atuuttuulersunik Inatsisartut inatsisaannik unioqquitsiviusut iluarsineqartarnissaannut, aammalu malittarisassaarluni Inatsisartut inatsisaat naapertorlugu.

2.1.3. Aaqqissuussineq siunnersuutigineqartoq

Siunnersuutigineqarpoq aaqqissuussinermik pilersitsisoqassasoq, piumasaqaateqarfiusumik Kalaallit Nunaani takornariartitsinermik ingerlatsisinnaajumalluni akuersissummik atuuttumik nalunaarfigineqarsimanissamik piumasaqaateqarfiusumik. Naalakkersuisut aalajangiisassapput akuersissummik tunniussaqaarnissamik inunnut imaluunniit inunnut inatsisitigut pisinnaatitaasunut, takornariartitsinermik ingerlatsisinnaajumallutik akuersissummik qinnuteqarsimasunut.

Kalaallit Nunaanni pingaartumik takornarissanut misigisassamik neqerooruteqarnissamik siunertaqarlutik, taakkualu unnuinertaqanngitsumik ulluinnarlugu, aamma ullorpaalunni angalanernik neqeroorutigineqarlutik aningaasaqarnermik ingerlatsinertut, ingerlatsinertullu takornariartitsinermik ingerlatsineq paasineqassasoq siunnersuutigineqarpoq.

Imaappoq, ilaatigut kaffisortitsinerit, tivanerit, uaaernerit, allallu assingusut qitinnikkut, nipilersornikkut, assitigut, allatigulluunniit takussaasumik, tusaaneqarsinnaasumilluunniit takutitsinissamik siunertaqarlutik Kalaallit kulturiannik takutitsinissamik siunertaqartut inatsisartut inatsisaanni ilaatinneqanngitsut, matumani takornariartitsinermik ingerlatsinissamik akuersissuteqarnissamik piunasaqaat ilanngullugu. Ingerlatat ataasiakkaat takornariartitsinermik ingerlatsinermut attuumassuteqanngitsut pineqanngitsut pineqarmata patsisaavoq.

Takornariartitsinermik ingerlatsinissamut akuersissuteqarnissamut piunasaqaammut atatillugu piunasaqaatinik aalajangersimasunik atuuttoqartariaqarpoq, akuersissummik tunineqarsinnaassagaanni naammassineqarsimasussanik.

Siullertut akuersissummik pigisaqartup Kalaallit Nunaannut atasuunissaa, maanilu akileraartartuussasoq siunnersuutigineqarpoq.

Aappaattut piunasaqaat qinnuteqartup sillimaniarnermut takornariartitsinermi ingerlanneqartussatut neqeroortiginiakkaminut atatillugu pilersaarutiniq suliaqarsimanissaa siunnersuutigineqarpoq. Siunnersuut naapertorlugu sillimaniarnermut pilersaarusiimi ilaassapput nalorninaatinik nalilersuinerit, imaqtussaq immikkut ingerlanniakkanut aalajangersimasunut atatillugu sillimaniarnikkut naliliinernik, ilanngullugulu ilaassalluni upalungaarsimalluni iliuusissanut pilersaarusiaq, nalorninaatinik nalilersorneqartunik aallaaveqartussaq ingerlatassani pineqartuni namminerni, imaqtussaallunilu iliuusissat allaaserinerinik ulorianarluinnartunik pisoqassagaluarpit imaluunniit ajutoortoqassagaluarpit pilersinneqartussanik. Sillimaniarnermut pilersaarummik immersuisoqartariaqassanngilaq inatsisini allani atuuttunik malittarisassaqaqpat, aalajangersimasunillu periaasissaqaqpat ingerlatsinernut aalajangersimasunut atuuttunik, qinnuteqartup malitassanik. Assersuutigalugu taamaassinnaavoq imaatigut angallassinernut, inatsisitigut piunasaqaateqarfioreersunik umiarsuarni sillimaniarnermut atuuttunik. Ilanngullugulu sillimaniarnermut pilersaarutiniq sanioqqutsisinnaanermut malittarisassaqaqartariaqarpoq, ingerlatsinernut atatillugu ulorianarsinnaasut piunngippata, taamalu sillimaniarnikkut pilersaaruteqarnissaq pisariaqanngippat.

Pingajuattut sinnersuutigineqarpoq piunasaqaatinik atuuttoqassasoq takornariartitsinermik ingerlatsinissamut akuersissummik nalunaarfigineqartup sillimasiisimanissaanik, imaluunniit allatigut qularnaveeqquusiissuteqarnissaanik, akuersissummik pigisaqartup taarsiissuteqarsinnaanernut akisussaaffimmuut atasumik. Tamannali atuuttariaqanngilaq takornariartitsinermik ingerlatamut qinnuteqartup sillimaserfigisinnaanngisaani, imaluunniit allatigut qularnaveeqqusiiffiginnaanngisaani, matumanissaaq assersuutigalugu takornariartitseriaatsimi pineqartumi sillimasiisarnernik atuuttoqarfiunngitsuni, qinnuteqartup neqeroortigissallugit eqqarsaatigisaani. Assersuutigalugu matumani pineqarsimasinnaapput qimussiussisarnernit.

Naalakkersuisut siunnersuut naapertorlugu immikkut ittutigut siulianiittuni piumasaqaatini sanioqutsisoqarsinnaaneraniq periarfissaqartinneqassapput. Tamanna assersuutigalugu atuussinnaavoq takornariartitsinermik ingerlatsisumi immikkut isiginiagassaqaartillugu imaluunniit inuiaqatigiinnut atatillugu immikkut isiginiagassaqaartillugu. Naalakkersuisut assersuutigalugu sillimaniarnermut pilersaarutinik piumasaqaatinik atuinnginnissamik aalajangiisinnaassapput takornariartitsinermik ingerlatsivimmu pineqartumut tunngatillugu, kiisalu imaluunniit takornariartitsinikkut ingerlatanut takornariartitsisartumit neqeroorutiginiarneqartunut atatillugu. Kiisalu aamma assersuutigalugu pisoqarsinnaavoq takornariartitsisartumut immikkut isiginiaasoqarsimatillugu, matumanissaaq takornariartitsisartumi sulisuusut ikittut amerlassusaat isiginiarneqartussaataillugu, nunani allani najugaqarallarneq ilinniagaqarnermi imaluunniit nappaateqarluni, imaluunniit naliliisoqarpat takornariartitsinermik ingerlatsisartoq naapertuutinngitsunik allaffissornikkut imaluunniit aningaasatigut nammagassinneqassasoq, akuersissummik qinnuteqassaguni, imaluunniit akuersissummut piumasaqaatinik naammassinnissinnaajumalluni. Assersuutit uaniittut tamakkiisuunngillat.

Takornariartitsisarnermut akuersissut atorunnaarsinneqarsinnaavoq, takornariartitsinermik ingerlatsinissamut takornariartitsisartoq akuersissummik pigisaqartoq Inatsisartut inatsisissaattut siunnersuutigineqartumi matumani peqqussutaasunik malinnissimanngippat. Tamatumani peqqusinerup qanoq ittuunera, peqqussummillu naammassinninnginnerup qanoq ittuunera takornariartitsinermik ingerlatsinermik arsaarinnissutaasinnaasumik nalilerneqarlutik atsikkutigiissaarneqartariaqarput.

Siunnersuut naapertorlugu isiginiaasoqartussaavoq Inatsisartut inatsisaanni matumani piumasaqaatit naammassineqartarnerannik, aamma malittarisassat Inatsisartut inatsisaannik tunngaveqartut imaluunniit akuersissummi atugassarititaasut. Nakkutilliisutut oqartussaasut ilaatigut paasissutissanik piumasaqarsinnaapput nakkutilliinermut atatillugu atussallugit pisariaqartunik.

Kiisalu aamma siunnersuut naapertorlugu Naalakkersuisut pisinnaatinneqassapput peqqussutaasussummik aalajangersaasarnissanut, takornariartitsisartup pissutsit Inatsimmik unioqqutitsisuusut akuersissummiluunniit atugassarititaasut unioqqutsinneqartut iluarsivigisassai pillugit.

Peqqussutaasunik siuliani pineqartunik naammassinnittoqarsimanngippat siunnersuut naapertorlugu takornariartitsinermik ingerlatsinissamut akuersissummik utertitsisoqarsinnaavoq.

Kiisalu siunnersuutigineqarpoq pineqaatissiisuteqartoqarsinnaasoq akiliisitsinikkut, takornariartitsinermik ingerlatsinissamut akuersissummik peqarani takornariartitsinermik ingerlatsisoqarsimappat, takornariartitsinermik ingerlatsinissamut akuersissummi pigisami

atugassarititaasunik unioqqutitsisoqarsimappat, eqqunngitsunik paatsiveerussaataasunilluunniit paasissutissisoqarsimappat imaluunniit paasissutissanik nipangiussisoqarsimappat Inatsisartut inatsisaat naapertorlugu pisortanut ingerlatinneqartussanik, imaluunniit peqqussutaasunik Inatsisartut inatsisaat naapertorlugu naammassinnittoqanngippat.

Inunnut imaluunniit inunnut inatsisitigut pisinnaatitaasunut Kalaallit Nunaannut imaluunniit Kalaallit Nunaannit, Kalaallit Nunaataluunniit iluani inunnik angallassisartunut, tassunga atatillugu takornariartitsinermik ingerlatsinngitsunut, matumani takornariartitsinermik ingerlatsinermut akuersissuteqarnissamik piunasaqaataasoq ilanngullugu Inatsisartut inatsisaat atortinneqassanngitsoq siunnersuutigineqarpoq. Taamaattoq zonenut agguasarnissaq pillugu siunnersuummi § 15 naapertorlugu malittarisassianut tamanna atuutinnilaq.

Takornarialerinermik ingerlatsisup takornariartitsinermik ingerlatsivimmit tamarmiusumik isertitai ukiumut 50.000 koruunit sinnersimangippagit, akuersissuteqarnissamik piunasaqaat atuutissanngitsoq siunnersuutigineqarpoq. Aalajangersakkami siunertaavoq ingerlatsisut minnerusutut taaneqartut takornariartitsinermi ingerlatseqataasut Inatsisartut inatsisaat naapertorlugu, pisariaqanngitsunik allaffissornikkut oqimaarsaasersunnginnissaat. Siunnerfiuvoq ilaatigut pineqassanngitsut inuit takornariartitsinermik ingerlatseqataasut piffissap ilaani ingerlatsisarnikkut imaluunniit aliikkutaralu sammisaqartartut.

Kiisalu aamma siunnersuut naapertorlugu malittarisassiortoqarsinnaavoq inuussutissarsiutit sammiviisa Inatsisartut inatsisaata avataaniinneri pillugit, taamalu akuersissuteqartussaanerup avataaniittutut.

2.2. Zone-nut immikkoortiterineq il.il., inuussutissarsiutigalugu ingerlatsinermut aamma inuit zone-ni pineqartuni angalaarsinnaaneri pillugu

2.2.1. Inatsisit atuuttut

Ullumikkut inatsisinik atuuttoqarpoq aqutsisunik inuussutissarsiornikkut ingerlatat ilaannik, aamma sumiiffiit ilaannut ammaassisartunik. Assersuutigalugu inatsiseqarpugut avatangiisinik ersarinnerusumik aqutsissutaasunik, soorluttaaq suliassat immikkoortukkaartut pillugit aqutsisoqartoq, assersuutigalugu aalisarnermi, piniarnermi aamma aallaaniartarnermi, sanaartornermi, aatsitassarsiornernik ingerlatsisarnerni kiisalu aamma inuussutissarsiornernik kalaallit imartaanni ingerlatsinernut atasunik. Kiisalu aammattaaq inatsiseqarpugut kalaallit nunatsinni pinngortitamik ersarinnerusunik illersuinermi malittarisassiortarnermi tunngaviusunik.

Taamaakkaluartoq inatsisini maanna atuuttuusuni aalajangersagaqanngilagut aqutsissutaasunik sumiiffinnik zone-nut immikkoortiterisinnaanernut inuussutissarsiornikkut ingerlatsinernut tamanut

atasunik, imaluunniit ataatsimut zone-ni pineqartutut ittuni angalaarsinnaanermut uninngaarsinnaanermulluunniit.

2.2.2. Naalakkersuisut isumaliutersuutaat

Siunnersuut siunnerfeqarpoq siuarsaniarnernik inuussutissarsiutigalugit ingerlatsinerni atugassarititaasunik ersarinnerusunik, matumanissaaq umiarsuarnut takornariartaatinut ilaasunillu angallassissutinut umiarsuarnut allanut atasunik, sillimaniarnernik, peqqissusissamik, avatangiisinik aamma piujuaannartitsinermik isiginiaasunik, kiisalu killiliisinnaajumalluni angalaartarnernik uninngaartarnernillu sumiiffinni aalajangersimasuni, eqqarsaatigalugit angalaartartut isumannaallisaaviginissaat, sumiiffiit allatigut atorneqartarnissaannut periarfissat, kiisalu aamma kalaallini pinngortitarput illersorumallugu.

Taamaalilluni aalajangersakkap ilaatigut aquttariaqarpaa inuussutissarsiutigalugu ingerlatsineq aamma ilaatigut ataatsimut isigisumik angalaartarneq.

Taamaalillutik Naalakkersuisut naliliipput pisariaqartitsisoqartoq ersarinnerusunik malittarisassiornissanut, aqutissiuunneqaqqullugu inuussutissarsiornikkut ingerlatsinerit Kalaallit Nunaannut tunniussaartarnissaat, nunamut tamarmut atuuttuni aammali sumiiffinni namminerni. Pissusissamisuuksaaq aalajangersaasoqarnissaa atugassarititaasunik, kinguneqartussanik inuussutissarsiutinik tunngavilimmik ingerlatsisoqartassammat zone-ni aalajangersimasuni (paasillugu sumiiffinni aalajangersimasuni) imaluunniit piffissani aalajangersimasuni, illersorumallugu mianeriumallugulu pinngortitaq avatangiiserput, uumasut sumiiffimmiittut imaluunniit allatigut inuussutissarsiutinik ingerlatsineq, soorlu piniarneq piniartullu. Pissutsit eqqaaneqareersut tunngavigalugittaaq pissusissamisuuksaaq aqutsisoqarnissaa, matumanilu aamma killiliisoqartarnissaa angalaartunik uninngaartunillu, sumiiffinnut aalajangersimasunut atasumik.

Naalakkersuisut nalilerpaat pissusissamisoornerussasoq atugassarititaasussanik pineqartutut ittunik aalajangersaasarnerit kommuniniippata, kommunit nalinginnaasumik piukkunnarnerummata nalilersuisarnissanut kommunimi suliassaqarfii suut immikkut killilersuiviusariaqartut. Naalakkersuisut ilaatigut isumaliutigisimavaat malittarisassat periarfissaqartitsisariaqartut inuussutissarsiornikkut immikkut sammivinni aalajangersimasuni killilersuisinnaanermut, immikkoortiterisoqarsinnaallunilu assersuutigalugu zone-ni, immikkut ittunik piumasaaqateqarfiusunik, aamma zone-nik inuussutissarsiutinik ingerlatsivigeqqusaanngitsunik. Ilanngullugulu malittarisassat aalajangersartariaqarput kommunimi pilersaarut aamma nunamut tamarmut pilersaarut pillugit inatsisit naapertorlugit, kiisalu aamma isiginiaasumik allatigut inatsisinik, taamaattoqarpat, sumiiffinni angalasinnaanernik aqutsisuusunik.

Naalakkersuisut tamatumunnga atatillugu aamma isumaliutigisimavaat zone-ni pineqartuni angalaarsinnaaneq uninngaarsinnaanerlu aqunneqarsinnaasariaqartut,

killilersorneqarsinnaasariaqarlutillu. Periarfissat malittarisassiorsinnaanernut angalaartarnerit uninngaartarnerillu eqqarsaatigalugit zone-nut taamaallaat atuuttariaqanngillat, takornariartitsisarnernut inuussutissarsiornernullu atasunik malittarisassiorfiusartunut, immikkut isiginiagassaqartarsinnaammat tunuliaqutaasunik angalaarsinnaanerup killeqarnissaanut.

Taamaasillunilu siunnersuut malittarisassanik imaqartariaqarpoq, periarfissaqartitsisussanik inuussutissarsiornernut, angalaartarnermut uninngaartarnermullu ersarinnerusunik atugassarititaasunik, inatsisiliornermi ilaariinngitsunik.

2.2.3. *Aaqqissuussineq siunnersuutigineqartoq*

Siunnersuutigineqarpoq eqqussisoqassasoq pisinnaatitsissutitut aalajangersakkamik, Naalackersuisut ersarinnerusunik malittarisassiorsinnaanngorlugit, inuussutissarsiutigalugu ingerlatsineq taamaallaat ingerlanneqarsinnaassasoq ersarinnerusunik aalajangersaavigisaasuni sumiiffinni, piffissani ersarinnerusunik aalajangersakkani, imaluunniit immikkut atugassarititaasunik malinninnikkut.

Pisinnaatitsissummi ilanngullugu Naalackersuisut periarfissinneqassapput ersarinnerusunik malittarisassiorsinnissamut sumiiffinnut pineqartunut ingerlasinnaanernut tammaarsimaartarsinnaanernullu.

Taamaalilluni aalajangersagaq marlunnut aveqqavoq, aqutsillunilu inuussutissarsiutigalugu ingerlatsinermik aamma sumiiffinni angalaartarnermik.

Malittarisassanik aalajangersaaneq pisussaassaaq inuussutissarsiornermi avatangiisinullu tungasutigut inatsisaasut naapertorlugit, soorluttaaq isiginiassooqartariaqassasoq illuutunik imaluunniit sanaartukkanik arsaarinnissuteqartoqartannginnissaa. Inerteqquteqarnerit inuussutissarsiornermik imaluunniit angalaarsinnaanermik uninngaarsinnaanermilluunniit tunngaviusutut naatsorsuutigisaavoq imaqassanngitsut inuussutissarsiutinik ingerlataareersunut sumiiffinni ingerlanneqareersunut tunngasunik. Immikkut ittutigut malittarisassiorortoqarsimassappat inuussutissarsiutaareersunut sunniuteqartussanik, tamatuma ilutigisaanik malittarisassiorortoqartariaqartassaaq immikkut sanioqqutsinnaanermik nalunaaruteqarsinnaaneq pillugu, inuussutissarsiutinik pioreersunik ingerlatsinernillu pioreersunut pisinnaatitaanernulluunniit pissusissamisuunngitsunik akuleruttoqaqqunagu.

Malittarisassanik aalajangersaanerit sumiiffinnut aalajangersimasunut killilikkamik angalaarsinnaaneq uninngaarsinnaanerlu pillugit ingerlanneqassapput aamma Kalaallit Nunaata nunarsuatsinni nunat tamalaat akornanni pisussaaffiik tunngaveqartunik, tamatumani aamma Europamiut inuit pisinnaatitaaffii pillugit isumaqatigiissutaat - Den Europæiske Menneskerettighedskonvention (EMRK). Sumiiffinnut angalaarsinnaaneq uninngaarsinnaanerlu

pillugit killilersuinerit akerliusariaqanngillat akornusersuinernut pinngortartunut illersuinernik aaqqissuussinikkut. Taamaalilluni malittarisassiormi atsikkutigiissaarisooqartariaqarpoq. Taamaattumillu malittarisassat imaqtartariaqarlutik immikkut sanioqqutsisinnaanermut akuersissuteqarsinnaanermullu, kiisalu nalunaarsuutininik angalaarsinnaaneq uninngaarsinnaanerlu killeqartumik pisinnaanersoq pillugu, immikkut pisinnaatitsinermik tunngavilimmik. Immikkut akuersissuteqarsinnaanermut periarfissaq, assersuutigalugu tassaasinnaavoq inuup immikkut naliliisoqareerneratigut akuerineqarsinnaanera angalaarsinnaanermut uninngaarsinnaanermullu sumiiffimmi, ilaqutariinni immikkut isiginiagassatut pingaaruteqartunik tunngavilimmik, aningasaqarnikkut isiginiagassanik imaluunniit allatigut pingaarutilimmik ajoqutaasunik peqquteqartumik.

Aalajangersakkami aallaaviussaaq Naalackersuisut pisinnaatitaanissaat suliassaqarfimmut atatillugu ersarinnerusunik malittarisassiorsinnaanerat, kisiannili aallaavittut kommunit taakkuussasut suliniutini iliuseqartussat assersuutigalugu siunnersuuteqarnikkut kommunimi sumiiffinnik aalajangersimasunik, immikkut illersorneqartariaqartunik, immikkullu ittunik atugassaqarfiusunik, inuussutissarsiornikkut ingerlatsisinnaanermut piunasaqaatitut, imaluunniit sumiiffimmi pineqartumi angalaarsinnaanermut uninngaarsinnaanermulluunniit. Zone-nut agguaassisoqarsimassappat isiginiarneqartussaapput kommunimut pilersaarutininik aamma nuna tamakkerlugu pilersaarutininik aqutsineq, taakkunungalu uniuuttunik aalajangersaasoqassanani. Tamanna aamma atuuppoq inatsisinut allanut atasumik, zone-nut agguaanernik aqutsisunut, kiisalu sumiiffinni angalaartarnernik sumiiffinnilu uninngaartarnernik aqutsisunut atasumik.

Malittarisassaqarnikkut inuussutissarsiormernik taamaallaat ingerlatsisoqarsinnaasoq sumiiffinni aalajangersimasuni, aammalu angalaarneq uninngaarnerlu killeqartussaasut, paasineqartassapput zone-nut agguaasinnaanertut. Assersuutigalugit pineqarsinnaapput zone-nut assigiinngitsunut agguataarinerit inuussutissarsiornikkut ingerlatsinerni imaluunniit angalaartarnerni tammaarsimaartarnerniluunniit. Assersuutigalugu pineqarsinnaavoq zone qorsuusoq killilersuivunngitsoq, zone sungaartoq immikkut piunasaqaateqarfiusoq atugassaqarfiusorlu, kiisalu zone aappalaartoq tamakkiisumik inerteqquteqarfiusoq inuussutissarsiutinik ingerlatsisinnaanermut aamma / imaluunniit angalaarsinnaanermut uninngaarsinnaanermullu.

Periarfissat malittarisassiorsinnaanernut ersarinnerusunik killilersuinernik imaqtartunik angalaarsinnaanernut uninngaarsinnaanernullu sumiiffinni aalajangersimasuni zone-ni tamani atuutinngilaq, takornariartunut imaluunniit inuussutissarsiortunut killilersuinernik aalajangersaavimusimasuni. Taamaasillunilu pisariaqanngilaq ataqtigiinnissaat pissutsit zone-nut aamma inuussutissarsiormernik ingerlatsineq, aamma killilersuineq angalaarsinnaanermut uninngaarsinnaanermulluunniit. Tassami periarfissaqarpoq aalajangersaanissamik zone-mik killilersuiviusumik angalaarsinnaanermut uninngaarsinnaanermulluunniit, kisiannili assigisaanik malittarisassanngitsunik inuussutissarsiorsinnaanermut. Assersuutigalugu isiginiagassaqarsinnaavoq

killilersuinissamik sermersuarmi angalaarsinnaanermut uninngaarsinnaanermullu, kisiannili assigisaanik pisariaqartitsiviunngitsumik inuussutissarsiorsinnaanerup killilersornissaanik.

Malittarisassaqaartillugu inuussutissarsiornerup imaluunniit angalaartarnerup uninngaartarnerullu taamaallaat pisarsinnaaneramik piffissani aalajangersimasuni, paasineqarsinnaavoq, assersuutigalugu inuussutissarsiornermik ingerlatsisoqarsinnaasoq aalisarnermi imaluunniit piniarnermut piffissaliussani, imaluunniit piffissami immikkut pineqartuni uumasunut naleqquttuni.

Malittarisassaqaarneratigut inuussutissarsiornerup imaluunniit angalaarnerup uninngaarnerulluunniit taamaallaat pisinnaaneramik immikkut imaqartunik, assersuutigalugu paasineqarsinnaapput piumasagaatit immikkut ittut sillimaniarnermut sillimmasiisarnermullu atatillugu piumasagaataasinnaasut, atortorissaarutit aalajangersimasut atorneqarnissaat imaluunniit inerteqqutaanissaannut inuussutissarsiornermi imaluunniit angalaarnermi aamma uninngaarnermi.

3. Aningaasaqarnikkut aamma allaffissornikkut pisortanut kingunerisassai

Naliliisoqarpoq siunnersuut pitsaasunik aningaasaqarnikkut pisortanut sunniuteqartussaasoq. Naatsorsuutigineqarporlu tamanna pissasoq suliffissat annertusinerisigut aamma aningaasatigut kaaviiartitat amerlinerisigut.

Siunnersuut imaqarpoq aalajangersakkamik, takornariartitsisarnermik ingerlatsisinnaanermut akuersissummik qinnuteqartut inatsisartut inatsisaannik tunngaveqartumik pisortat sullissinerannut akitsuut akilertassagaat. Taamaasillunilu naatsorsuutigineqanngilaq pisortanut aningaasaqarnikkut kinguneqassanngitsoq sulianik ingerlatsineq, allatigullu pisortat sulianik pineqartunik ingerlatsinerat. Taamaakkaluortoq siunnersuut sulisut nukiinik kiisalu allaffissornikkut allatigut atuinermik kinguneqassaaq. Tamanna ilaatigut atuutissaaq qinnuteqaatinik suliaqarnermut, akuersissutinik nalunaaruteqartarnernut kiisalu nakkutilliinermi sulianut pisussaaffiusunut. Kiisalu allaffissornikkut kinguneqarsinnaavoq zone-nut agguataarinerup il.il. inuussutissarsiortunut atatillugu allaffissornikkut suliarineqartunut, aamma zone-ni pineqartuni angalasinnaanerit uninngaarsinnaanerillu killilersorneqarnerinut.

4. Aningaasaqarnikkut aamma allaffissornikkut inuussutissarsiortunut kingunerisassai

Siunnersuut saqqummiunneqarpoq Kalaallit Nunaanni takornariartitsinerup ineriartortinneqarnera siuarsarumallugu, naliliisoqarporlu siunnersuut ungasinnerusumut isigisunik pitsaasunik aningaasaqarnikkut sunniuteqarumaartoq inuussutissarsiortunut, Kalaallit Nunaanni takornariartitsineq eqqarsaatigalugu. Tamanna ilaatigut kaaviiartitat annertunerulernerisigut Kalaallit Nunaanni takornariartitsinermik inuussutissarsiutini, matumanissaaq takornariartitsinermik ingerlatsinermi sillimaniarnermut atatillugu piumasagaatinik arlaqartunik aalajangersaasoqarneratigut, taakkualu tamanut saqqummiunneqartarnerisugut, takornariartitsisartuni akuersissuteqartuni, tamatumuunalu takornariartitsisartut akornanni

assigiissaarisoqarneratigut takornarianut Kalaallit Nunaanni angalaartartunut. Ilutigisaanik naatsorsuutigineqarpoq siunnersuut kinguneqassasoq takornariatitsinermik inuussutissarsiutit sumiiffinnut namminernut annerusumik kisartitsernerannik, tamatumuunalu ilaatigut - nalorninaatitaqalaaruartumik – sumiiffinni sulisuusunik nukittorsaaviumik.

Naliliisoqarpoq siunnersuut inuussutissarsiortunut pitsaanngitsunik aningaasarsiornikkut sunniuteqartussatut, Kalaallit Nunaanni takornariatitsinermik ingerlatsiumallutik akuersisummik qinnuteqartartunut, kiisalu akuersisummik tunineqartartunut, inuussutissarsiortut akilertassammassuk sulianik ingerlatsinernut akitsuut, allatigullu pisortat ingerlatsineri Inatsisartut inatsisaat naapertorlugu, matumani pisariaqaraangat aamma paasissutissanik ujartorneqartunik pissarsiniartarnerit ingerlatitsisarnerillu.

Tamatuma saniatigut naatsorsuutigineqarsinnaassaaq aningaasaqarnikkut pitsaanngitsunik inuussutissarsiortunut ullumikkut takornariatitsinermik ingerlatsisuusunut kisiannili Kalaallit Nunaanni takornariatitsinermut akuersisummik qinnuteqarnerminni itigartinneqartunut. Tamanna assersuutigalugu kinguneqarsinnaavoq inuussutissarsiutimik ingerlatsisut suliffiutiminnik tunisaqartariaqalernerinik, imaluunniit allatigut inatsisartut inatsisaanni piomasaaqatinik naammassinnittariaqalernerinik, matumani assersuutigalugu Kalaallit Nunaanni najugaqartussaanerup piomasaaqatitut aalajangiunneqarneratigut. Siunnersuut ilanngullugu aamma kinguneqarsinnaavoq nunanit tamalaaniit takornariatitsinermik maani ingerlatsisartut tunuarnerinik, imaluunniit Kalaallit Nunaanni aningaasaliunnaarnerinik, inatsisartut inatsisaanni piomasaaqatinik naammassinnissinnaannginnamik. Tamanna takornariatitsinermut namminermut tassanilu ineriartortitsinermut pitsaanngitsunik sunniuteqarsinnaavoq, annaasaqartoqarsinnaammat aningaasaliiniarnerinik, sulisussanik immikkullu ilisimasanik. Sunniutaasinnaasut pitsaanngitsut tamakkua annikillisarinarineqarsimapput, ilaatigut piffissamik ikaarsaariarfiliinikkut, maanna Kalaallit Nunaanni takornariatitsinermi inuussutissarsiortut eqqarsaatigalugit.

Taamaakkaluartoq naliliisoqarpoq siunnersuummi soqutaannginnerusunut killiliussat, sanioqutsisinnaanernik aalajangersakkat allat kiisalu ikaarsaariarnermut aalajangersakkat kingunerisaannik arsaarinnittoqarneranik manna kinguneqartussaannitsoq, tak. tamatumunnga atatillugu nassuiaatini imm. 2.1.2. Taakkualu saniatigut isiginiarneqassapput pisut ilaanni aalajangersakkanik sanioqutsisinnaanernut aalajangersakkat.

Kiisalu aamma siunnersuut pitsaanngitsunik allaffissornikkut inuussutissarsiortunut sunniuteqassaaq, inuussutissarsiortut allaffissortussaammata akuersisummik pissarsiniarlutik paasissutissanillu katersisarlutik. Inuussutissarsiortunut allaffissornikkut kingunerisassat pitsaanngitsut annikillisarinarneqarsimapput takornariatitsinermik inuussutissarsiortunut aalajangersakkanik sanioqutsisinnaanermut aalajangersakkatigut, soorluttaaqq ammut

soqutaannginnerusunut killiliussaartoq, qaqugukkut inuussutissarsiortut akuersissummiktakornariartitsisarnermut qinnuteqarsinnaanersut eqqarsaatigalugu.

Kiisalu aamma aningaasaqarnikkut aamma allaffissornikkut inuussutissarsiortunut sunniuteqarsinnaapput malittarisassanut attuumassuteqartuusinnaasut, zone-nik immikkoortukkaanik aaqqissuussinernut atasut il.il., inuussutissarsiortunut sammititaasut. Taamaattorli malittarisassat ajunngitsunik sunniuteqarsinnaapputaaq inuussutissarsiornermik ingerlatsivimmut ataatsimoortumut, soorlu arfanniartartunut, malittarisassat soqutigisanik pineqartunik isiginiaasinnaammata, assersuutigalugu zone-nut immikkoortiteraluni aaqqissuussinermi.

5. Avatangiisinut, pinngortitamut innuttaasullu peqqissusiannut sunniutaasussat

Siunnersuut nalilerneqarpoq ajunngitsunik avatangiisinut aamma pinngortitamut sunniuteqartussat. Taamaalillunimi siunnersuutip ilaatigut kingunerisussaavai aaqqissuussinernit avatangiisinik aamma pinngortitamik isiginiaanernermik imaqartut, takornariartitsisartut ingerlatsisussangussammata killiliussat ersarinnerusut iluini, soorluttaaq Naalakkersuisut assersuutigalugu aalajangersarsinnaagaat akuersissut Kalaallit Nunaanni sumiiffinnut aalajangersimasunut taamaallaat atuutissasoq. Siunnersuutillu ilanngullugu aamma kingunerissavaa periarfissaqassamat ersarinnerusunik malittarisassiorsinnaaneq periarfissaqassasoq zone-nut immikkoortiterisarneq inuussutissarsiortunut sammisunik, aamma pinngortitami avatangiisitsinnilu angalaarsinnaanermi immikkut isiginiagassat pillugit.

Siunnersuullu ilanngullugu nalilerneqarpoq innuttaasut peqqissusiannut pitsaasunik kinguneqartussat, siunnersuut imaqarmat malittarisassanik ersarinnerusunik aalajangersagaasunik, takornariartitsinerup malittarisassat iluini ingerlanneqarnissaanik, sillimaniarnikkut, peqqissutsimut avatangiisinullu tunngasunik isiginiaasunik.

6. Innuttaasunut kingunerisassai

Naliliisoqarpoq siunnersuut ajunngitsunik innuttaasunut sunniuteqassasoq, Inatsisartut inatsisaatigut siunertaamat takornariartitsisarnerup siuarsarneqarnissaa, inuiaqatigiinnut kalaallinut iluaqutaasussamik. Taamaalillunilu naatsorsuutigisariaqassaaq Kalaallit Nunaanni innuttaasunut pitsaasunik sunniuteqassasoq takornariartitsisarnerup killiliussat aalajangersimasut iluini aaqqissuunneqarnera, ilaatigut takornariartitsinermik ingerlatsisuni sillimaniarnermut malittarisassiornikkut.

Siunnersuullu nalilerneqanngilaq allatigut innuttaasunut pitsaanngitsunik sunniuteqartussat, matumani ilaatigut siunnersuut piumasaqaatit minnerpaaffissaannik killiliisoqartoq, kiisalu akuersissuteqarnissamut piumasaqaatip sanioqqunneqarsinnaaneranut aalajangersagaqartoq.

7. Allatigut pingaaruteqartunik sunniutaasussat

Siunnersuut nalilerneqanngilaq allatigut pingaaruteqartunik sunniuteqartussatut.

8. Pisortanik aamma kattuffinnik il.il. tusarniaanerit

Siunnersuut piffissami 24. april 2024-imiit piffissamut 2. juni 2024-mut Namminersorlutik Oqartussat tusarniaasarnermut quppersagaanni tamanut saqqummiunneqarsimavoq, aammalu tulliuuttunut tusarniaavigineqartartunut tusarniaassutigineqarluni:

Naalakkersuisut Siulittaasuata Naalakkersuisoqarfia
 Ineqarnermut Attaveqaasersuutinullu Naalakkersuisoqarfik
 Aningaasaqarnermut Akileraartarnermullu Naalakkersuisoqarfik
 Aalisarnermut Piniarnermullu Naalakkersuisoqarfik
 Isumaginninnermut, Ilaqtariinnermut, Suliffeqarnermut Nunamullu Namminermut
 Naalakkersuisoqarfik
 Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
 Nunalerinnermut, Imminut Pilersornermut, Nukissiuuteqarnermut Avatangiisinullu
 Naalakkersuisoqarfik
 Meeqqanut Inuusuttunullu Naalakkersuisoqarfik
 Peqqissutsimut Naalakkersuisoqarfik
 Naalagaaffinngornissamut Nunanullu Allanut Naalakkersuisoqarfik
 Avannaata Kommunia
 Qeqqata Kommunia
 Kommune Qeqertalik
 Kommuneqarfik Sermersooq
 Kommune Kujalleq
 Sulisitsisut
 Sulinermik Inuusutissarsiortut kattuffiat
 Atorfillit Kalaallit Nunaanni Kattuffiat, ASG
 Ilinniartitsisut kattuffiat, IMAK
 Perorsaasut Kattuffiat, NPK
 Peqqinnissaq pillugu Kattuffik, PPK
 Kalaallit Nunaanni Aalisartut Piniartullu Kattuffiat, KNAPK
 Avannaata Erhverv
 Qeqertalik Business Council
 Arctic Circle Business
 Sermersooq Business
 Innovation South Greenland
 Kommunini Pilersaarusiornermut Oqartussat
 Visit Greenland

Nalik Ventures
Air Greenland
Nuna advokater
Arctic Law
Eqqartuussissuserisut / Advokatfirmaet Malling & Hansen Damm
Eqqartuussissuserisoq / Advokatfirmaet Meinel
Eqqartuussissuserisoq / Advokat Gedion Jeremiassen
Inuit Law
Eqqartuussissuserisoq / Advokat Naja Joelsen
Eqqartuussissuserisoq / Advokat Aviâja Helms
Eqqartuussissuserisoq / Advokat Marie Louise Frederiksen
Kalaallit Nunaanni kukkunersiuisut / Grønlands Revision
Kukkunersiuisut - Deloitte
EY
WWF Kalaallit Nunaanni
Oceans North Kalaallit Nunaat
Pinngortitaleriffik
AECO
Arctic Umiaq Line
Kalallit Airports
Sikuki
Grønlandsbanken
Banknordik

Tusarniaanermi akissutit tiguneqartut aamma taakkununga Naalakkersuisoqarfiup isummersuutai tusarniaanermut atatillugu allakkiami ilanngussami 1-imi ersipput.

Taassumap saniatigut siunnersuut iluarsisaq 2. juli 2024-mit, 16. juli 2024-p tungaanut Namminersorlutik Oqartussat tusarniaaviatigut, tusarniaavigineqartartunullu nassiullugu ilassutitut tusarniutigineqarpoq. Tusarniaanermi akissutigineqartut, taakkunungalu naalakkersuisoqarfiup isummersuutai tusarniaaneq pillugu allakkiami, ilanngussaq 2-mi atuarneqarsinnaappuq.

Siunnersuummi namminermi aalajangersakkanut ataasiakkaanut namminernut oqaaseqaatit*§ 1-imut***Imm. 1-imut**

Siunnersuutigineqarpoq Inatsisartut inatsisaat atortinneqassasoq takornariartitsinernik ingerlatsinernut.

Aalajangersakkamut siunnersuutaasoq Inatsisartut inatsisaata atuuffissaanik nalunaaruteqarpoq. Taaguut takornariartitsinermik ingerlatsineq ersarinnerusumik siunnersuummi § 2, imm. 1-imi suussusilersorneqarpoq.

Imm. 2-mut

Siunnersuutigineqarpoq Inatsisartut inatsisaat atortinneqassasoq sumiiffinni aalajangersimasuni angalaartarnernut, uninngaartarnernullu kiisalu sumiiffinni pineqartuni inuussutissarsiutinik ingerlatsinernut.

Aalajangersakkamut siunnersuutaasoq Inatsisartut inatsisaata atuuffissaanik nalunaaruteqarpoq. Nalunaarneqarpoq inatsisartut inatsisaat atortinneqarmat inunnut tamanut taakkua angalaarnerini uninngaartarnerinilu sumiiffinni aalajangersimasuni pineqartuni.

Aalajangersagaq atuarneqassaaq atasumik siunnersuummi § 15-imut, taamalu ilaatigut Naalakkersuisut pisinnaatinneqarlutik malittarisassiornissanut sumiiffinni aalajangersimasuni angalaarsinnaanerup killilersorneranut atasunik.

Imm. 3-mut

Siunnersuutigineqarpoq Inatsisartut inatsisaat atortinneqassasoq Inatsisartut inatsisaannik tunngaveqartunut takornariartitsinernik ingerlatsisarnernut sumiiffinni immikkut toqqarneqarsimasuni.

Taamaasillunilu siunnersuutaavoq Inatsisartut inatsisaat sunniuteqassanngitsoq takornariartitsisarnernut koncessionitigut akuersissuteqartarnernut inatsit naapertorlugu tunniunneqarsimasunut. Taamatulli siunnersuutip § 15-ianut tunngatillugu, taamaalilluni siunnersuutip imm. 2-a aamma takuuk.

Imm. 4-mut

Inuit, inuillu inatsisitigut pisinnaatitaasut Kalaallit Nunaannut imaluunniit Kalaallit Nunaannit, Kalaallit Nunaataluunniit iluani inunnik angallassisartunut, tassunga atatillugu takornariartitsinermik ingerlatsinngitsunut, Inatsisartut inatsisaat atortinneqassanngitsoq siunnersuutigineqarpoq, taamaalillunilu takornariartitsinermik ingerlatsinermut akuersissuteqarnissamik piomasaaqammut ilaatinneqaratik. Matumani pineqarput takornariartitsilluni assartuinerit tamarmik, toqqaannartumik takornariartitsinermik siunertaqanngitsut. Matumani ilaatigut pineqarput umiarsuit takornariartaatit, aamma umiarsuit allat ilaasunik Kalaallit Nunaannut utimullu angallassisartut. Tamatumani ilaapputaaq Kalaallit Nunaanni namminermit qamutit motorillit atorlugit timmisartoqarfiup akunnittarfiillu akornanni ingerlatsisarnerit. Taamaalilluni taamatut ingerlatsinissami inuit imaluunniit inuit inatsisitigut pisinnaatitaasut angallassisutinik atuisunut inatsisartut inatsisaat atortinneqanngilaq, taamaalillutillu tassunga akuersissummik qinnuteqassanatik. Inuit imaluunniit inuit inatsisitigut pisinnaatitaasut suli akuersissummik qinnuteqartussaapput takornariartitsisarnermut, Inatsisartut inatsisaanni piomasaaqataasut naapertorlugit inuussutissarsiummik ingerlatsiinnarumalluni. Tamannalu assersuutigalugu aamma atuuppoq inunnut imaluunniit inunnut inatsisitigut pisinnaatitaasunut assartuinerit atortorissaarummik atuisunut ingerlatsinernut Inatsisartut inatsisaanni ilaasuni, assartuummik atuisunut ingerlatsinernut assartuinerup ilaginngisaanik. Assersuutigalugu matumani pineqarsinnaavoq qamuterlak taaguutilik jeep takusassarsiortitsinermi atornerqartoq. Aalajangersakkamik atortitsinnginneq taamaasilluni taamaallaat atuutissaaq ingerlatsinernut inunnik assartuinerusunut, tamanna pingaarnertut siunertaappat. Taassumap kingunerisaanik ilisimatusaatigaluni umiarsuarnik takornariartitsisarnerit akuersissuteqarnissamik piomasaaqat atuutissaaq.

Ilanngullugu siunnersuutigineqarpoq, inatsisartut inatsisaannit sanioqutitsinissaq siunnersuutip § 15-ia naapertorlugi malittarisassatut aalajangersakkanut atuutissanngitsoq. Tassani malittarisassat aalajangersarneqarumaartut nalinginnaasumik angalaarnernut, uninngaartarnernut, inuussutissarsiutigalugulu ingerlatanut tamanut atuunnerat patsisaavoq.

Imm. 5-imut

Siunnersuutigineqarpoq Naalackersuisut malittarisassiorsinnaanerit inuussutissarsiutinut immikkoortunut, Inatsisartut inatsisaanni akuersissummik tunniussisarnerup avataaniitneqartunut. Tamanna naleqquttutut pissusissamisuusaaq pisuni Naalackersuisut naliliivigisaanni allaffissornikkut oqimaappallaartussatut inuussutissarsiutit sammiviannut akuersissummik piomasaaqammik Inatsisartut inatsisaanniittunik naammassinninniarnissaq eqqarsaatigalugu, assersuutigalugu takornariartitsinermik ingerlatsivik nalorninaateqarfiunngippat inuit sillimanissaannut, peqquussutsimut imaluunniit pinngortitamut.

§ 2-mut

Imm. 1-imut

Aalajangersakkami suussusilerneqarpoq qanoq takornariartitsinermik ingerlatsivik paasineqassanersoq, Inatsisartut inatsisaat manna naapertorlugu. Siunnersuut naapertorlugu takornariartitsivittut paasineqassaaq aningaasaqarnermik ingerlatsineq takornariartitsisartumi, Kalaallit Nunaanni ingerlatsivik siunertaqartoq kiffartuussinernik neqerooruteqarnissamik takornariartartunut, ulluinnarlugu aaqqissuussani, aamma angalaartitsisarnerni ullunik arlaqartunik sivilissuseqartartunik.

Siunnersuutip kinguneraa kiffartuussinissap neqeroorutigineqartup ilisarnaateqarnissaa misigisassamik arlaqartunik. Tamanna paasineqassaaq ingerlatsinernik pisoqarfiusunik, inuup uppersagaanik imaluunniit peqataaffigisaanik, kulturimullu attuumasunik ilaqlarluni.

Siunnersuut ilanngullugu taamaallaat imaqarpoq misigisassamik Kalaallit Nunaanni pisunik. Kalaallit Nunaanni takornariartitsineq, takornariartunut kiffartuussinernut tunngasoq, Kalaallit Nunaata avataani ingerlanneqartoq, taamaattumik akuersissuteqarnissamik piumasaqaammut ilaangilaq.

Siunnersuutip ilanngulluguttaaq kinguneraa suliffeqarfiup ingerlatsisuusup siullertut pingaarnertullu takornariartunut saaffiginnittuunissaa.

Tamatuma saniatigut siunnersuutip kinguneraa tigussaasunik pineqassammata ulluinnarlugu unnuinani angalanerit, imaluunniit angalaarnerit ullunik arlalinnik sivilissusillit.

Siulianiittut kinguneraat ilaatigut neriniartarfiit, akunnittarfiit, ulluinnarni atortussaarniarfiit, tammajuitsussarsiniartarfiit, katersugaasiviit aamma fitness-ertarfiit aallaavittut siunnersuummi ilaanginneri, naatsorsuutigisariaqarmat aningaasatigut ingerlatsineq aamma ingerlatsineq nalinginnaasoq inuussutissarsiutit pineqartut ingerlataat piumasaqaatinik naammassinninngitsut, ataatsimut misigisassarsiorfiunnginnamik, misigisassallu pingaarnertut tamaani najugalinnut saaffiginnittuullutik imaluunniit ulluinnarluni angalaarnerunatillu ulluni arlalinni angalaarnerunnginnamik.

Paarlattuanik misigisassarsiorfitsisarnernik neqerooruteqartartut, assersuutigalugu nannunik uumasunillu nujuartanik allanik takusassarsiorfitsisartut, aallaavittut siunnersuummi ilaasut, tunngavittut naatsorsuutigineqarmat aningaasarsiornermik ingerlatsineq ingerlatsinerlu nammineq takornariartunut saaffiginnittuusut. Tamanna aamma isumaqarpoq assersuutigalugu akunnittarfiit Inatsisartut inatsisaanni aalajangersakkanut ilaassasut, neqerooruteqartarunik takusassarsiorfitsisarnernik. Tamanna taamaallaat atuuppoq sammisaqartitsinermut ingerlatsinermullu takusassarsiorfitsinermut attuumasuni, akunnittarfinnik ingerlatsinermuunngitsoq. Illuikkami – iglomi – unnuineq kulturimut attuumasunik misigisaqarnerisooq takornarianuunerisooq neqeroorutaasooq taakkunanani ilaassaaq.

Neqerooruteqartarnernik pilerisaarinernillu ingerlatsinerit takornariartitsisartup kiffartuussissutiginiagaannik inatsisartut inatsisaata atuuffiata iluaniinngilaq.

Imm. 2-mut

Aalajangersakkami kinaassusilerneqarpoq Inatsisartut inatsisaat una naapertorlugu takornariartitsinermik ingerlatsisuuvoq. Siunnersuut tunngavigalugu takornariartitsinermik ingerlatsisoq paasineqassaaq inuttut imaluunniit inuttut inatsisitigut pisinnaatitaasutut, Inatsisartut inatsisaanni § 3, imm. 1 naapertorlugu takornariartitsinermik ingerlatsinissamut akuersissummik atuuttumik pigisaqartoq.

Takornariartitsisartuq taamaalilluni taannaavoq inuk imaluunniit inatsisini oqartarnerattut inuk inatsisitigut pisinnaatitaasoq, takornariartitsinermik ingerlatsisuuvoq imm. 1 naapertorlugu. Inuk imaluunniit inuk inatsisitigut pisinnaatitaasoq Inatsisartut inatsisaat manna naapertorlugu aatsaat takornariartitsisartutut taaneqartalissaaq akuersissummik tunineqareeruni. Tamanna sioqqullugu pineqartoq akuersissummik qinnuteqartutut ilisarnaateqarpoq, - takornariartsitsisalerniartutut.

Imm. 3-mut

Aalajangersakkap takornariartuq Inatsisartut inatsisaat naapertorlugu kinaassusilerpaa. Siunnersuut naapertorlugu takornariartuq paasineqassaaq inuttut, kiffartuussinermik pisisutut angalanermik imaqartumik, sumiiffimmut inuup nalinginnaasumik najugaqarfigisaata inigisaataluunniit avataaniittumut, aammalu angalaneq tamarmiuseq imaluunniit angalanerup ilaa nuannaarniutigalugu, qasuersaarumalluni imaluunniit sulinnigiffeqarnissi pillugu pilersissimagaa, tassungalu atatillugu siunnersuutip imm 1-iani ilaallutik kiffartuussinissanik pisisut

Tamanna siullertut kinguneqarpoq inuk nalinginnaasumik najugarisami imaluunniit ineqarfigisami avataaniinneranik.

Takornariartitsinermut taaguut nunamut aalajangersimasumut najugaqarfimmulluunniit pitutsinngitsooq qinerneqarsimavoq. Taaguutigineqartoq naapertorlugu nammineq najukkap eqqaani takornariartoqarsinnaalluarpoq, pineqarsimappat siunnersuutip imm. 1-ia naapertorlugu takornariartunut kiffartuussinermik ingerlatsinermut isumaqatigiissut kiffartuussinertalik neqeroortumut akiliuteqarfiusoq.

Aappaattut tamatuma kinguneraa angalanerup ilaata imaluunniit tamarmiusup nuannaarniutigalugu, qasuersaarniutigalugu imaluunniit sulinnigiffeqaatigalugu pinneranik. Tamanna isumaqarpoq inuk ataaseq Kalaallit Nunaannut angalasinnaasoq niuerneramik tunngaveqartumik, kisiannili ulluni ataasiakkaani tamaaniinnermini qasuersaartoq, nuannaarniuteqartoq imaluunniit sulinnigiffeqartoq. Inuk pisumi tassani Inatsisartut inatsisaat naapertorlugu taava takornariartuussanngilaq ulluni niuerneramik ingerlatsivigisamini. Paarlattuanik inuk takornariartutut isigineqarsinnaassaaq

tamaaniinnermi ulluisa sinnerini nuannaarniarnermik, qasuersaarnermik imaluunniit sulingiffeqarnermik siunertaqartuni, tamatumani aamma assersuutigalugu Kalaallit Nunaanni pinngortitamik aamma uumasunik misigisaqarfigisamini nammineq inuinnartut - privatimik - nuannersarumallunilu.

Pingajuattut tamatuma kinguneraa inuup kiffartuussinermik pissarsinera maaniinnermi ilaani, nuannaarsarumalluni, qasuersaarumalluni imaluunniit feriarumalluni siunnersuutip imm. 1-ia naapertorlugu sullissinernik pissarsissasoq. Assersuutigalugu tamatumani takusassarsiorneq sammineqarsimasinnaavoq.

§ 3-mut

Imm. 1-imut

Takornariartitsinermik ingerlatsisinnaanermut akuersissummik, siunnersuutip imm. 2-a naapertorlugu tunniunneqarluni atuuttumik pigisalimmit takornariartitsinermik ingerlatsineq taamaallaat ingerlanneqarsinnaassasoq siunnersuutigineqarpoq.

Aalajangersakkap kinguneraa inerteqqutaammat Kalaallit Nunaanni takornariartitsisarnermik ingerlatsisoqarsinnaanera akuersissummik peqanngikkaanni. Akuersissummik tunineqartup malitsigisaanik inatsisinik unioqqutitsinngitsumik takornariartitsinermik ingerlatsisinnaalissaaq. Taamaalilluni inatsisinik unioqqutitsinngitsumik Kalaallit Nunaanni takornariartitsinermik ingerlatsisinnaanermut tunngaviulluni, aalajangersagaq akuersissuteqarnissamik piumasaaqatitaqarpoq.

Imm. 2-mut

Siunnersuutigineqarpoq Naalakkersuisut aalajangiisassasut akuersissummik tunniussaqaarnissamut, inummut tigussaasumut imaluunniit inummut inatsisitigut pisinnaatitaasumut, takornariartitsisarnermik ingerlatsisinnaajumalluni akuersissummik qinnuteqartumut.

Aalajangersakkap kinguneraa Naalakkersuisut taakkuummata pisinnaatitaasut naliliinissamik, inuk kina aamma inatsisit naapertorlugit kina pisinnaatitaanersoq takornariartitsisarnermut akuersissummik akuersissuteqarfigineqartussatut.

Ilanngullugu siunnersuutigineqarpoq akuersissut piffissamut killilimmut tunniunneqartassasoq, piffissaligaanissaanik Naalakkersuisut aalajangiinngippata. Assersuutigalugu akuersissut piffissap ilaannaani atussasoq naatsorsuutigineqarpat, imaluunniit piffisaligaanngitsunik takornariartitsinermik ingerlatsinissamut akuersissuteqartoqartinnagu, takornariartitsinermik ingerlatsineq misilittagaqarfigilernissaa naleqqussinnaassappat akuersissutip piffissaligaanissaanik Naalakkersuisut aalajangiisinnaapput. Kingullertut taaneqartoq pingaartumik takornariartitsinermik

ingerlatsinernut nutaanut imaluunniit takornariatitsinermik ingerlatap suliaqarfiinut nutaanut naleqqussinnaavoq.

Taassumap saniatigut siunnersuutigineqarpoq takornariatitsisarnermik ingerlatsinermut akuersissummik qinnuteqartoq piumasaqaatinik naammassinnittassasoq siunnersuutip §§ 7-10-niittunik.

Pineqarput akuersissummik pigisaqartumut piumasaqaatit §§ 7-8 naapertorlugit, sillimaniarnermut pilersaarutit § 9 naapertorlugu, aamma sillimmasiisimanissamut imaluunniit allatigut sillimmasiinissamut § 10 naapertorlugu.

Siuliani piumasaqaataasut kiisalu akuersissuteqarnissamik piumasaqaataasut piffissap akuersissutitp atuuffiani tamarmiusumi naammassineqassapput.

Piumasaqaatit naammassineqanngippata takornariatitsinermik ingerlatsisartoq Inatsisartut inatsisaanni § 16 naapertorlugu akiliisitaasinnaavoq. Takornariatitsinermik ingerlatsisartoq aammattaaq peqqusummik nalunaarfigineqarsinnaavoq pisussaaffinnik naammassinninngikkuni, allaat akuersissummik arsaarneqarsinnaalluni Inatsisartut inatsisaanni § 14, imm. 2 naapertorlugu.

Imm. 3-mut.

Siunnersuutip § 7-10-ani piumasaqaatit tamaasa takornarialerinermik ingerlatsisup akuersissuteqarfik tamakkerlugu naammassissagai siunnersuutigineqarpoq.

Takornarialerinermik ingerlatsisup piumasaqaatit naammassinngippagit, siunnersuutip § 14-iani imm. 1 naapertorlugu takornarialerinermik ingerlatsisoq peqqussuteqarfigineqarsinnaavoq.

Imm. 4-imut

Siunnersuutigineqarpoq akuersissutallamut tunniunneqarsinnaasoq Naalakkersuisut akuersissuteqarnerisigut.

Taamaasilluni taamaallaat takornariatitsisartumut akuersissummik allanut tunniussisoqarsinnaavoq Naalakkersuisut taamaaliorinnaaneq akuerisimappassuk. Piginnittut nikinnerini inummut inatsisitigut pisinnaatitaasumi, takornariatitsinermik ingerlatsisuusumi akuersissuteqarnissamik piumasaqarfiunngillat.

Taamaattoq piginnittut taamatut nikinnerini akuersissummik pigisaqartup §§ 7-imi aamma 8-mi piumasaqaatit aamma naammassissava.

Siunnersuutip § 11-a naapertorlugu piumasaqaammut tassunga immikkut akuersissuteqartoqarsinnaavoq.

Imm. 5-imut

Siunnersuutigineqarpoq Naalakkersuisut minnerunngitsumik atuisunut paasissutissiisussaanermik pisussaaffik tunngavigalugu pisussaaffeqarnissaat tamanut saqqummiussisarnissamik kikkut ingerlatsisut akuersissummik peqarnerinik, matumani siunnersuutip § 14-iani imm. 2 naapertorlugu akuersissutinik utertitsinerit ilanngullugit. Assersuutigalugu tamanna pisinnaavoq quppersakkakut, inuit tamat iserfigisinnaasaatigut. Naalakkersuisut pisinnaatitsissut taanna atussappassuk tamanut saqqummiunneqartut paasissutissat imaqassapput takussutissiamik ingerlatsisunik tamanik akuersissummik tunineqarsimasunik, assigiinngisitsisoqassanngimmat.

Imm. 6-mut

Takornariartitsinermik ingerlatsinermit kaaviiartitat tamarmiusut ukiumut 50.000 koruunit sinnersimanggipagit, siunnersuutip § 3-ani imm. 1-ia apequtaatinnagu takornariartitsinermik ingerlatsinissamut akuersissuteqarnissamik piumasaqaat atuutissanngitsoq siunnersuutigineqarpoq. Kaaviiartitat ukiukkuutaartumik naatsorsorneqartassapput.

Takornariartitsinermik ingerlatsinerit inatsisartut inatsisaanni matumani ilaatinneqartunik takornariartitsinermik ingerlatsisut mikinerusut ilaatinneqannginnissaat aalajangersakkami siunertaavoq, taamaalilluni taakkua pisariaqanngitsunik allaffissornermik suliakkersorumanagit. Inuit piffissap ilaannaani takornariartitsinermik ingerlatsisut imaluunniit aliikkutaralugu takornarialerisut ilaatinneqannginnissaaq ilaatigut aamma siunertaavoq.

Takornariartitsinermik ingerlatsinermit kaaviiartitat tamarmiusut 50.000 koruunit sinnissappatigut, takornariartitsinermik ingerlatsinissamut akuersissummik inuk imaluunniit inuk inatsisitigut pisinnaatitaasoq pisariaqanngitsumik kinguarsaanertaqanngitsumik Naalakkersuisunut qinnuteqassaaq. Oqaatigineqassaaq, tamanna isumagineqanngippat siunnersuutip § 16-iani imm, 1-imi nr. 1 naapertorlugu pinerluttulerinermik inatsit tunngavigalugu pineqaatissiisoqarsinnaammat, siunnersuutillu § 13-ia naapertorlugu Naalakkersuisut tamatuminnga nakkutilliisinnaammata, soorluttaaq siunnersuutip § 14-iani imm. 1 naapertorlugu peqqusisinnaasut. Takornariartitsinermik ingerlatsisinnaanermut akuersissummik qinnuteqarnerup kingunerisaanik, takornariartitsinermik ingerlatsinermit kaaviiartitat 50.000 koruunit sinneraluarpatigilluunniit, takornariartitsinermik ingerlatsisinnaanermut akuersissut pillugu Naalakkersuisut suliamik suliaqarnerini piumasaqaat atatiinnarneqassanngilaq. Taamaalilluni suliap suliarineqarnerani inuup imaluunniit inuup inatsisitigut pisinnaatitaasup ingerlatani, piumasaqaammi uani piumasaqaatit apequtaatinnagit ingerlatiinnarsinnaavia.

*§ 4-mut**Imm. 1-imut*

Siunnersuutigineqarpoq akuersissummik qinnuteqartut takornariartitsinermik ingerlatsiumallutik takornariartitsisartutut nalunaarutigisassagaat paasissutissat pisariaqartut tamaasa pisortat suliaannut ingerlatsinermut atasunut Inatsisartut inatsisaat naapertorlugu aamma takornariartitsinermik ingerlatsinissamut akuersissummut atasuni nakkutilliinernullu atasuni.

Tamannalu siullertut kinguneqarpoq takornariartitsisarnermut akuersissummik qinnuteqartut paasissutissat qinnuteqaatip suliarineqarnissaanut atorneqartussat. Paasissutissanik ingerlatitsinnginneq suliap ingerlanneranut akornutaasinnaavoq.

Tamanna aappaattut kinguneqarpoq takornariartitsisartup akuersissummik nalunaarfigineqareernermi paasissutissat nassiuttassagai pisariaqartinneqartut pisortat sulianik ingerlatsineraui kiisalu nakkutilliinerinut, Naalakkersuisut akuersissummik suliaqarneraiut attuumasuusinnaasut.

Matumani ilaatigut pineqassapput paasissutissat tigussaasut uppersaasut ingerlatseqatigiiffiup Kalaallit Nunaanni angerlarsimaffeqarneranik inatsimmi § 8 imm. 1 naapertorlugu, aammalu § 9 tunngavigalugu sillimaniarnermut pilersaarutinik pisariaqartunik peqartoq.

Imm. 2-mut

Aalajangersakkatut siunnersuut Naalakkersuisunik periarfissaqartitsivoq paasissutissanik kinaassutsimik isertuussisumik avitsisarnissamut pisortanut allanut aamma Namminersorlutik Oqartussat ingerlatseqatigiiffiutaannut, kisitsisinik paasissutissanik suliaqarnernut atasunik siunertaqartunik. Paasissutissat taamaallaat kisitsisinut paasissutissanut atasumik atorneqarsinnaapput pisortanit imaluunniit Namminersorlutik Oqartussat ingerlatseqatigiiffiinit avitseqatigineqartunit.

Imm. 3-mut.

Inatsisissatut siunnersuutip § 6-iani imm. 1-ia malillugu ingerlatitseqqissinnaanermik pisinnaatitaanermik Naalakkersuisut atuisimappata, Naalakkersuisut pisortani oqartussanut, Namminersorlutik Oqartussallu ingerlatseqatigiiffiutaannut paasissutissanik ingerlatitseqqissinnaanissaannut aalajangersagassatut siunnersuutigineqartup pisinnaatippai.

Pisortani oqartussamut imaluunniit Namminersorlutik Oqartussat ingerlatseqatigiiffiutaanut § 6-imi imm. 1-ia naapertorlugu Naalakkersuisut pisussaaffiinik, pisinnaatitaaffiinillu tunineqarsimasumut taamaallaat paasissutissanik ingerlatitsisoqarsinnaavoq.

Taassumap saniatigut inatsisartut inatsisaat manna naapertorlugu ingerlatassat, akuersissuteqarnissaq kiisalu taakkunanga nakkutilliinissaq pillugu oqartussat suliamik suliaqarnissaanik paasissutissat imm. 1 naapertorlugu pisariaqartut taamaallaat ingerlateqqinneqarsinnaapput.

Inatsisartut inatsisaat malillugu akuersissuteqartariaatsip isumaginissaanut pisariaqartunuinnaq paasissutissat ingerlateqqinneqartut taamaallaat atoqqusaapput.

§ 5-imut

Siunnersuutigineqarpoq Naalakkersuisut malittarisassanik ersarinnerusunik aalajangersaanissaat piunasaqaatinut ileqqussanullu Kalaallit Nunaanni takornariatitsisarnermut akuersissummik tunniussisarnermi, matumani aamma takornariatitsisartup nalunaarusiortussaannermut pisussaaffianut, paasissutissanillu allanik ingerlatitsisarnermut.

Aalajangersakkap siullertut Naalakkersuisut pisinnaatippaat ersarinnerusunik malittarisassiornissamut, piunasaqaatit qanoq ittut naammassineqartussaannersut pillugit, Kalaallit Nunaanni takornariatitsisarnermut akuersissummik tunniussisoqarnissaanut, assersuutigalugu akuersissummut malittarisassiornermut, takornariatitsinernut aalajangersimasunut immikkut atortunik pisariaqartitsiviusunut, killilinnik takornariatitsisup sulisoqarnissaanut, imaluunniit immikkut malittarisassat takornariatitsinermut, uumasunik nujuartanik takusassarsiortarnermut, matumani aamma nannunik imarmiunillu. Assersuutigalugu piunasaqaataasinnaavoq immikkut iliuusissanik aqqissuussisoqartarnissaa, qularnaarisussanik uumasunik nujuartanik takusassarsiorterup uumasut ulorianartorsiunnginnissaannik, peqqissuunissaannillu isiginiaaviunissaanut kiisalu aamma pinngortitami pissutsit mianerineqarnissaannik, uumasunit nujuartanik najugarineqarunik. Tamanna ilaatigut aqqissuunneqarsinnaavoq atugassarititaasutigut qassinik takusassarsiortermi peqataasoqarsinnaaneramik, imaluunniit uumasunut nujuartanut qanoq ungasitsiginissamut tunngasuni.

Aalajangersakkallu aappaattut Naalakkersuisut pisinnaatippai, akuersissummik qinnuteqartarnermi ileqqussanik malittarisassiornissamut . Naalakkersuisut assersuutigalugu malittarisassiorsinnaapput qinnuteqarnermi aalajangersimasunik ileqqussat pillugit.

Pingajuattut aalajangersakkami Naalakkersuisut pisinnaatinneqarput malittarisassiornissamut takornariatitsinermik ingerlatsisut nalunaarusiornissamut pisussaaffiat pillugu, takornariatitsisartullu tamatumunnga atatillugu nalunaarutissai pillugit. Naalakkersuisut assersuutigalugu malittarisassiorsinnaapput takornariatitsisartup akuttunngitsunik nalunaarusiortarnissaanik piffissaliussat ersarinnerusut iluini kiisalu ingerlatat pillugit paasissutissanik qanoq ittunik tunniussisoqartarnissaanik.

§ 6-imut

Imm. 1-imut

Naalackersuisut aalajangersakkamut siunnersuut naapertorlugu pisussaaffinnik allamut tunniussisinnaapput takornariatitsinermik ingerlatsinissamut akuersisummik akuersissuteqartarnermut § 3 naapertorlugu, nakkutilliinermut § 13, peqqussuteqartarnermut § 14, imm. 1 kiisalu takornariatitsinermik ingerlatsinissamut akuersisummik utertitsisarnermut §14, imm. 2 naapertorlugit Inatsisartut inatsisaanni uani, pisortani oqartussanut imaluunniit Namminersorlutik Oqartussat ingerlatseqatigiiffiit imaluunniit oqartussanut allanut.

Imm. 2-mut

Pisortani oqartussat imaluunniit Namminersorlutik Oqartussat ingerlatseqatigiiffiutaat pisussaaffinnik imm. 1-imi pineqartunik tiguisoq, tamatumunnga atatillugu Namminersorlutik Oqartussat ataanni pisortat ingerlatsinerinut ilaasutut isigineqassaaq. Taassumap kingunerisaanik ilaatigut pisussaaffinnik eqqortitsisussaavoq, Inatsisartut inatsisaanni pisortani suliassanik suliaqartarneq pillugit ersittutut, Pisortat ingerlatsinerat pillugu paasitneqarsinnaatitaaneq pillugu Inatsisartut inatsisaanni kiisalu pisortani nalinginnaasumik ingerlatsinermi ileqqussanik tunngavilinnik ingerlatsisussaallunissaaq. Tamatumalu saniatigut pisortani oqartussat imaluunniit Namminersorlutik Oqartussat ingerlatseqatigiiffiutaat paasissutissat tigoorartakkani suliarisartussaallugit nipangiusimannittussaaneq pillugu malittarisassat pisortani ingerlatsineranut atuuttut iluini, aammalu inunnut tunngasunik paasissutissat pillugit inatsimmi aalajangersakkat naapertorlugit.

Imm. 3-mut

Aalajangersakkami siunnersuutigineqartumi Naalackersuisut periarfissaqartinneqarput malittarisassiorsinnaanermut nakkutilliineq kiisalu naammagittaalliuteqartarneq eqqarsaatigalugit, pisussaaffiup Pisortani Oqartussanut imaluunniit Namminersorlutik Oqartussat ingerlatseqatigiiffiutaannut tunniunneqarsinnaaneramik. Tamatuma malitsigissavaa ilaatigut aalajangertoqarsinnaassammat Inatsisartut inatsisaannik tunngaveqartunik aalajangikkat naammagittaalliutigineqarsinnaassasut Naalackersuisunut suliassanngortitsiviit aappaattut.

§ 7-imut

Aalajangersakkamut siunnersuummi nalunaarneqarpoq periarfissaasoq akuersisummik inummut tunniussisoqarsinnaanera, pineqartup piunnaasatit arlaqartut naammassisimappagit. Piunnaasaqataasut eqqortinneqartussaapput piffissami akuersissutit atuuffigisaani tamarmiusumi, tak. § 3-mi imm. 3.

Siullertut atuuppoq piunasaqaat inuup pineqartut Kalaallit Nunaanni inuit nalunaarsorsimaffianni allassimanissaanik.

Aappaattut atuuppoq piunasaqaat inuup pineqartup Kalaallit Nunaanni tamakkiisumik akileraartartuunissaa.

Pingajuattut atuuppoq piunasaqaat inuup pineqartup pigisaminut nalilinnut tamakkiisumik oqartussaassuseqarluni atuisinnaassuseqarnissaa, akiliisinnaajunnaarsimanani, akiliisinnaajunnaarsimasutullu, unitsitsiniartutullu suliamik ingerlatsiviunngitsumut

Ingerlatsinermi nalinginnaasumik tunngaviusut naapertorlugit piunasaqaataasut eqqortinneqarsimaneri misissorneqarsinnaavoq inuit allattorsimaffianni aamma akileraaruserisuni. Inuk pillugu paasissutissat pillugit inatsimmi piunasaqaataasut assinganik atuupput.

§ 8-mut

Aalajangersakkamut siunnersuummi nalunaarneqarpoq periarfissaasoq inatsisit naapertorlugu inummutpiunasaqaatigineqartunik arlaqartunik attassiinnarpat. Piunasaatit piffissami akuersissutip atuuffigisaani tamarmi eqqortinneqassapput, tak. § 3-mi imm. 3.

Siullertut pineqarpoq piunasaqaat inuk inatsisitigut pisinnaatitaasoq aningaasaliissutinik ingerlatsivittut imaluunniit inuit namminneq pigisaattut Kalaallit Nunaanni angerlarsimaffeqartutut pilersinneqarsimanissaa.

Piunasaqaatip aappaani ingerlatseqatigiiffik akilersuiunnaarsimassanngillat, akiliisinnaajunnaaqassanatik imaluunniit akiliisinnaajunnaalersutut suliarineqassanatik.

Pingajuattut aningaasaliissuteqarnikkut ingerlatseqatigiiffimmut piunasaqaataavoq, ingerlatseqatigiiffimmi aningaasaliissutit affaanit amerlanerusut toqqaannartumik toqqaannanngitsumilluunniit inunnit § 7-imi nr. 1-3-mi piunasaqaataasunik naammassinnittunit pigineqassasut. Toqqaannanngikkaluamik piginnittuunermi pineqarpoq inuk § 7-imi nr. 1-3-mi piunasaqaatinik naammassinnilluni aningaasaliissuteqarnikkut ingerlatseqatigiiffik alla, assersuutigalugu aktianik piginneqatigiiffik, aqutigalugu takornialerineramik ingerlatsineramik piginnittoq.

Sisamaattut aningaasaliissuteqarnikkut ingerlatseqatigiiffimmut piumasaqaataavoq, aningaasaliissuteqarnikkut ingerlatseqatigiiffimmi taasisinnaatitaasut affaanit amerlanerusut toqqaannartumik toqqaannanngitsumilluunniit inunnit § 7-imi nr. 1-3-mi piumasaqaataasunik naammassinnittunit taasisinnaatitaassasut. Toqqaannanngikkaluamik taasisinnaatitaanermi pineqarpoq inuk § 7-imi nr. 1-3-mi piumasaqaatinik naammassinnilluni, aningaasaliissuteqarnikkut ingerlatseqatigiiffik alla, assersuutigalugu aktianik piginneqatigiiffik, aqutigalugu taasisinnaatitaasoq.

Tallimaattut ingerlatseqatigimmi inunntu piginnittunut piumasaqaataavoq, inuit piginnittut affaanit amerlanerusut siunnersuutip § 7-iani nr. 1-3-mi piumasaqaataasunik naammassinnissasut.

§ 9-mut

Imm. 1-imut

Imm. 1-imi siunnersuutigineqarpoq akuersissummik tunniussaqaarsinnaanermi piumasaqaatitut aallaaviussasoq qinnuteqartup allaganngorlugu sillimaniarnermut pilersaarusiorsimanissaa, imaqtartumik killiliussanik iliuusissanik ingerlatsinerni aalajangersimasuni akuersissummik tunniussisoqarneratigut neqeroorutigineqarniartunut atasunik. Ingerlatassanut tamanut ataasiakkaanut sillimaniarnermut pilersaarutinin suliaqartoqartarsimassaaq. Piumasaqaat naammassineqassaaq qinnuteqartup immersugassamik immersuineratigut, Naalackersuisunit qinnuteqarnermik ingerlatsinermut atasumik suliaannik.

Assersuutigalugu tamatuma kingunerissavaa akuersissummik qinnuteqartup nannunik qaninnguullutik takusassarsiortitsisarniartut sillimaniarnermut pilersaarusiortarnissaat, ilaatigut ingerlanniarneqartunut nalorninaatinik assigiingitsunik nalilersuiviusunik.

Aamma ingerlattarniakkanut suleqatigisat pingajuusut aqutigalugit neqeroorutigineqartussanut sillimaniarnermut pilersaarutinin suliaqartoqartassaaq.

Imm. 2-mut

Sillimaniarnermut pilersaarusiaasoq akuersissummik tunniussisoqareerneratigut kalaallisut aamma tuluttut takornarissanit nassaarineqarsinnaassaaq. Tamannalu assersuutigalugu takornariartitsisartup quppersagaani takusassiarineqarsinnaavoq imaluunniit takornariartitsinermik ingerlatsiviup inaataani. Sillimaniarnermut pilersaarut takornarissat imaaliillaannaq takusinnaassavaat.

Imm. 3-mut

Sillimaniarnermut pilersaarussiaq akuersissummik tunniussisoqarneratigut katitigaassaaq nalorninaatinik nalilersuinaartaarluni iliuusissanullu pilersaarutitaarluni, tak. ersarinnerusumik imm. 4-6-imut oqaaseqaatigineqartut.

Isumannaallisaanermi pilersaarutip nutartertarnissaa takornarialerisup isumagissavaa. Naalackersuisut tamatuminnga nakkutiginippot, aalajangiisinnaallutillu tamatumunnga atasuni siunnersuummi § 14, imm. 1 naapertorlugu. Tamanna assersuutigalugu pisariaqarsinnaavoq ingerlatsinerit imaqartarpata sammisassanik nutaanik nalorninaateqarfiulersinnaasunik nammineq, imaluunniit pisut aalajangersimasut ingerlatsinerni aalajangersimasuni pissutissaqartilerpagu ingerlatsinermut atasumik iliuusissanik aaqqissuussisoqarnissaa.

Imm. 4-mut

Sillimaniarnermut pilersaarussiaq ilaassaaq nalorninaatinik nalilersuineq, takornarissanut immikkut siunnerfilersugaasoq nalorninaatinillu ingerlatani aalajangersimasuni nalilersuinerinik imaqartoq. Tamatuma kinguneraa assersuutigalugu takusassarsiortitsisarnissanik kissaateqarnermi nannunik qanillattuinerinik, tigussaasumik nalilersuissisoqarnerinissaa nalorninaataasinnaasunik iliuusissamut tamatumunnga attuumassuteqartunik.

Nalorninaatinik nalilersuineq takornarissanik takuneqarsinnaassaaq, tak. siunnersuutip imm. 2-a, ersarissumillu paasiuminartumillu allassimassalluni. Nalorninaatinik nalilersuineq ingerlatami pineqartumi pingaarnertut nalorninaatit pillugit peqataasunut ersarissumik, naammattumillu paasissutissiisinaassaaq.

Ingerlatsinissamik piareersaasiarluni aaqqissuussinermi nalorninaatinik nalilersuineq tungavigineqassaaq sulisorineqartussanik toqqartuinerinik, tamatumani aamma angallassinermi aqutsisuusussanik, - rejselerinik - angalasoqalernerani, avatangiisini pissutsinik nalilersuinerinik, atortussanik toqqartuinerinik il.il. Tamanna assersuutigalugu kinguneqassaaq atortussat atorineqartussat pisariaqartinneqarsimasut ingerlatsinissamut, naleqquttuunissaat ingerlatassanut matumani pineqartunut.

Imm. 5-imut

Sillimaniarnermut pilersaarut upalungaarsimanissamut pilersaarummi ilaassaaq, nalorninaataasinnaasunik nalilersuinerinik tungaveqartunik ingerlatassamut namminerinik, imaqaassallunilu iliuusissat ulorianartorsiornalernerinik imaluunniit ajutoortoqarnerani pilersinneqartussat allaaserinerinik. Upalungaarsimanissamut pilersaarut imaqaassaaq piunnaasaataasunut tungasunik paasissutissanik, iliuuereqartussanut, misilittakkanut aamma piginnaanernut, sulisuusuni ingerlatani akuusuni, aamma qanoq ulorianartorsiornermi qisuariartoqassanersoq, tamatumani aamma attaveqaasersuuteqarnissat qanoq ittuunissaannik.

Tassani tigussaasunik nalunaarneqarsimassapput sulisuusut qanoq iliornissaat pisuni nalorninartorsiorfiulersuni.

Imm. 6 -imut

Aalajangersakkamut siunnersuutip kinguneraa imm. 1-5 atuutinngimmat pisuni allatigut inatsiseqarfiusuni imaluunniit aalajangersimasunik ileqqoqarfiusuni, aqutsisunik sillimaniarnermi piumasaqaataasunik ingerlatamut pineqarpiartumut atasunik, qinnuteqartullu malissallugit pisussaaffigisaanik.

Assersuutigalugu naleqqussinnaavoq Kalaallit Nunaannut nalunaarut nr. 1697 ulloq 11. december 2015-imeersoq umiarsuit isumannaatsumik angalasarnerinut il.il.

§ 10-mut

Imm. 1-imut

Aalajangersakkatut siunnersuutigineqartumi allassimavoq takornariatitsisartup suliffeqarfiutaata takornariatitsisarnermut inatsisip iluaniittup akisussaasutut sillimmasiinermik matussutissaateqassasoq, imaluunniit allatigut sillimmasiisimassasoq.

Siunnersuutip kinguneraa piumasaqaataammat takornariatitsisartup taarsiissuteqartussatut akisussaaffia sillimmasiinnikkut matussutissaateqassasoq, imaluunniit allatigut sillimmateqassasoq. Sillimmasiineq imaluunniit allatigut qularnaveeqqusiisutaasoq ingerlatsinernut tamanut matussusiisinnaassaaq, takornariatitsinermik ingerlatsisuusup neqeroorutigisagaani.

Allatut ittumik sillimmasiineq assersuutigalugu pisinnaavoq kontumik aningaasanik imalimmik pilersitsineq, imaluunniit danskit statsobligationiutaannik sillimmasiineq imaluunniit aningaaserivimmi qularnaveeqqusiineq.

Sillimmasiinerit imaluunniit qularnaveeqqusiissutitut aqqissuussinerit ilusissaat takornariatitsisartut kinaaneritik ingerlatsineranillu isiginiaalluni annertussusilerneqarsinnaapput ilusilersorneqarsinnaallutillu, matumanissaaq taarsiissuteqartussatut akisussaatisinnaanerup qanoq annertussuseqarnera, takornariatitsinikkut ingerlatassani neqeroorutiginiarneqartuni.

Imm. 2 -mut

Aalajangersakkamut siunnersuutip kinguneraa piumasaqaateqannginnera inuussutissarsiornikkut sillimmasiissutikkut allatigulluunniit qularnaveeqqusiisoqartussaannnginneranik, imm. 1 naapertorlugu, tamanna takornariatitsinermik ingerlatsisumut periarfissaatinnagu. Tamanna pissaaq sillimmasiisarfiit sillimmasiinissamik neqerooruteqarfiginngisaanni imaluunniit

sillimmasiinissamik neqerooruteqarsinnaanerini, takornariartitsinernut ingerlanneqartunut matussusiisinnaasunik, takornariartitsisartup neqeroorutiginiagaanut. Tamanna assersuutigalugu qimussertitsisarnernut atuussinnaavoq, inuussutissarsiornikkut sillimmasiisarfinni taamaattunik neqerooruteqanngippat.

Taamaakkaluartoq takornariartitsinermik ingerlatamut sillimmasiisoqarsinnaatillugu, qinnuteqartorli assersuutigalugu naammattunik isumannaallisaanermut pilersaaruteqartinnagu sillimmasiinissaminut piumasaqaataasunik naammassinninnginnera patsisaalluni piumasaqaataasoq qinnuteqartumut atuutissanngitsoq tunngaviunngilaq.

Ilanngullugulu aamma imm. 1 atuutinngilaq periarfissaqanngippat allatigut aaqqissuussinikkut qularnaveeqqusiisoqarsinnaaneranut.

Akuersissummikqinnuteqartut takornariartitsisarnissamut Naalakkersuisunut uppersaatinik nassiusaqartussaapput, uppersaasunik periarfissaqanngitsoq inuussutissarsiornikkut sillimmasiisinnaanermut allatigulluunniit qularnaveeqqusiisinnaanermut takornariartitsinermut pineqartumut atatillugu, tamanna Naalakkersuisut piumasarippassuk, tak. siunnersuummi § 4, imm. 1. Tamatuma kinguneraa Naalakkersuisut taamaallaat pisariaqartissagaat uppersaait Naalakkersuisut nalornissuteqassappata, takornariartitsisarnermut pineqartumut inuussutissarsiornikkut matumani sillimmasiisoqarsinnaanngitsoq, akuersissummut qinnuteqaammik suliaqarnermut atatillugu.

Imm. 3-mut

Naalakkersuisut ersarinnerusunik malittarisassiorsinnaapput immikkut ittunut sillimmasiisarnernut piumasaqaatinik imaluunniit qularnaveeqqusiisarnernut. Assersuutigalugu tamatumani pineqarsinnaapput takornariartitsinermik ingerlatsinerit immikkut ajoquserfusinnaasut nalorninaateqarsinnaasut, aamma assersuutigalugu piumasaqaateqarfusinnaasut sillimmasiinikkut mattussutissaqartussatut, takornariartunik ajoqusinnginnissaat pillugu nussuisoqarneranut aningaasartuutinik allatigullu upalungaarsimanermut aningaasartuutinik matussutissaqartitsinissat.

§ 11-mut

Naalakkersuisut siunnersuut tunngavigalugu pisuni immikkut ittuni Inatsisartut inatsisaanni §§ 7-10-ni piumasaqaatinik, aamma Inatsisartut inatsisaanni matumani § 3, imm. 4, 5, § 6, imm. 3, § 10, imm. 3 aamma § 15 naapertorlugu aalajangersakkat sanioqqunneqarsinnaanera akuerisinnaavaat. Takornariartitsisartoq akuersissummik tigusaqarsimasoq aamma sanioqqutsisinnaanermik qinnuteqarsinnaavoq kingusinnerusuk, takornariartitsisartumut pissutsit atuuttut allannguuteqarsimappata, akuersissummik peqarnissamut piumasat naammassineqarunnaarlutik.

Naalakkersuisut pisuni immikkorluinnaq ittuni assersuutigalugu sillimaniarnermut pilersaarussianik sanioqqutsisoqarsinnaanera akuerisinnaavaat. Tamanna pisinnaavoq Naalakkersuisuni pisumik namminermik naliliinikkut takornariatitsinermik ingerlatsinermi nalorninaataasunik, takornariatitsisartumit ingerlakkusunneqartunik. Assersuutigalugu ilaatigut pisoqarsinnaavoq takornariatitsisartumut pissutsinik immikkut isiginiagassaqqarp, matumani aamma sulisut ikissimappata atorfeqartinneqartut, nunani allaniinneq ilinniakkamut imaluunniit nappaammik peqquteqartumik, imaluunniit naliliisoqqarp ingerlatsisup allaffissornermik imaluunniit aningaasaqarnikkut oqimaarsartitsisoqassasoq akuersissummik qinnuteqassagaanni piumasaqaatinik naammassinneqqaarluni. Assersuutit tamakkiisunngillat.

Aalajangersagaq isigineqassaaq periarfissatut pisunik namminernik nalilersuinikkut pissutsit immikkut ittut inatsimmik akuersissuteqarnissamik piumasaqaammik sanioqqutsisoqarsinnaaneranik, inatsimmi sanioqqutsisinnaanermut aalajangersakkanut ilaariinngitsuni, isiginnittoqassappat pissusissamisunngitsutut pissutsit pineqartut sanioqqutsisinnaanermut ilaariinnginnerat. Inatsisartut inatsisaanni §§ 7-10-mik atuinerup kingunerissappagu arsaarinninneq pineqalersoq, piumasaqaatit pineqartut tunngavigalugit sanioqqutsisinnaaneq atorneqartussanngussaaq. Der henvises til forslagets afsnit 2.1.2.

§ 12-imut

Imm. 1-imut

Aalajangersakkatut siunnersuutigineqartoq akiligassiissuteqartarnermut tunngavoq, Naalakkersuisut aningaasartuutaannik pisortat qinnuteqaammut atasumik sullissinerinut, takornariatitsinermik ingerlatsinissamut aamma takornarialerisunut.

Aalajangersakkami assersuutigalugit pineqarput sulianik ingerlatsinernut, nakkutilliinernut allatigut pisortat ingerlatsinerinut, sulianut atatillugu angalanernut, avataaneersunik siunnersortinut aamma siunnersortinut allanut il.il. aningaasartuutit.

Aningaasartuutit sulluunniit akiligassiissutigineqarsinnaapput akitsuutitut, tamanna Naalakkersuisunit suliarineqartunut naapertuukkaangat. Aalajangersakkami matumani pisinnaatitsinermik tunngaveqartumik akitsuutinik akiligassiisoqarsinnaanngilaq Naalakkersuisut sulianik ingerlatsinernut pisortallu ingerlatsinerinut aningaasartuutaasimasut suliami pineqartumi sinnerlugit.

Akitsuut paasineqassaaq akiliutitut aalajangersimasumik annertussusilittut, pisortat suliamik ingerlatsinerini pisortanit missingersuunneqartunik tunngavilittut.

Pisortat suliamik suliaqarnerinut akiliut pisinnaavoq nalunaaquttap akunneranut akigititamik tunngaveqartumik piffissamut atorneqarsimasumut, suliamik ingerlatsinerimi pisortallu suliamik suliaqarnerini, matumani aamma assersuutigalugu nakkutilliinermik ingerlatsineq akuersissummik tunniussisoqareerneratigut.

Imm. 2-mut

Aalajangersakkamut siunnersuummi Naalakkersuisut pisussaatinneqarput ersarinnerusunik malittarisassiornissamut naatsorsuisarnerni tunngaviusussanut atatillugu, aningaasartuutinut akiligassiisarnermi periaasissamut, akiliuteqartussamut ilisimatitsisarnermut, akiliinissamut piffissaliussanut, ernianut piffissaq eqqorlugu akiliinngitsunut kiisalu akitsuutit annertussusissaannut.

§ 13-imut

Siunnersuutigineqarpoq Naalakkersuisut ilaatigut takornariartitsisartunik Inatsisartut inatsisaannik tunngavilimmik nakkutilliissasut, malittariassat Inatsisartut tunngavillit aallaavigalugit.

Aalajangersakkamut siunnersuutip taamaasilluni nalunaarpaa Naalakkersuisut nakkutilliisutut oqartussaanerat. Naalakkersuisut nakkutigisaraat takornariartitsisartut Inatsisartut inatsisaanni aalajangersakkanik malinninnerat. Naalakkersuisut ilanngullugu aamma nakkutigaat ingerlatsinerit allat Inatsisartut inatsisaani ilaasut. Eqqaaneqartup kingulliup kinguneraa Naalakkersuisut nakkutilliinissamut periarfissaat annertuujusoq tunngasuusorlu Inatsisartut inatsisaanni pineqartunut tamanut, matumani inuit aamma inuit inatsisitigut pisinnaatitaasut siunnersuutip § 3-ani imm. 1-iani akuersissuteqarnissamik naammassinninnissaat ilanngullugu.

Aalajangersagaq isigineqassaaq siunnersuummi § 14, imm. 1-imut atasutut, taamalu Naalakkersuisut ilaatigut peqqussuteqarsinnaallutik nakkutilliisutut suliaassanik tunngaveqartunik.

§ 14-imut

Imm. 1-imut

Aalajangersakkamut siunnersuummi nalunaarneqarput peqqussutinut malittarisassat. Inatsisartut inatsisaannik eqqortitsinnginneq, aamma malittarisassanik Inatsisartut inatsisaannik matuminnga tunngavillit kinguneqarsinnaapput peqqussuteqartoqarneranik, aalajangersakkanik imaluunniit atugassarititaasunik malinnittoqarnissaanik. Peqqussuteqartoqarsinnaavoq takornariartitsisartunut.

Aalajangersakkamut siunnersuut naapertorlugu, siunnersuutip § 4-ni imm. 1-ia naapertorlugu paasissutissanik Naalakkersuisut eqqortumik pisortatut suliassamik suliaqarnissaannut pisariaqartunik takornariartitsisartoq nalunaaruteqassasoq peqquneqarsinnaavoq, matumani aamma nakkutilliinermut ingerlatsinernut siunnersuummik tunngaveqartunut. Naalakkersuisut aalajangersinnaavaat paasissutissat qanoq ilusilerlugit tunniunneqassasut. Takornariartitsisartoq peqqussummik nalunaarfigineqartoq pisussaavoq Naalakkersuisunit piffissaliussap iluani paasissutissanik tunniussinissamut.

Takornarialerinermik ingerlatsisoq il.il. peqqussuteqarfigineqartoq, pissutsit inatsisartut inatsisaannik imaluunniit inatsisartut inatsisaat naapertorlugu malittarisassanik aalajangersarneqarsimasunik malinninnginnermik kinguneqartut, Naalakkersuisut piffissaliussaasa iluani iluarsinissaannut pisussaaffeqarpoq.

Aalajangersagaq isigineqassaaq siunnersuummi § 16, imm. 1, nr. 4-mut atasutut, taamalu akitsuummik pineqaatissiinnikkut akiliisitsisoqarsinnaalluni, inatsisartut inatsisaata malinnissaanik peqqussutigineqartoq imaluunniit inatsisartut inatsisaat manna naapertorlugu malittarisassat aalajangersarneqartut malinneqanngippata.

Imm. 2-mut

Aalajangersakkamut siunnersuut Naalakkersuisunik periarfissaqartitsivoq aalajangiisinnaanermut takornariartitsisarnermut akuersissummik tunniunneqarsimasumik utertitsisinnaanermut, takornariartitsisartup Naalakkersuisunit nalunaarutigineqartut peqqussutaasut naammassinngippagit. Akuersissummik utertitsinissamik aalajangerneq Naalakkersuisunit naliliinermik tunngaveqassaaq, matumani aamma isiginiarlugu peqqussummik unioqqutitsinerup annertussusia. Naalakkersuisut assersuutigalugu aalajangersinnaapput aatsaat akuersissummik utertitsisoqassasoq takornariartitsisartup suli uteqqiasumik peqqussutaasut siunnersuut manna naapertorlugu ingerlanneqartut malinneq ajorpagit. Ingerlatsinermut nalinginnaasumik inatsimmi tunngaviit tunngavigalugit aamma utertitsisoqarsinnaavoq.

§ 15-imut

Aalajangersakkamut siunnersuummi Naalakkersuisut pisinnaatinneqarput malittarisassiornissamut, inuussutissarsiornikkut suliffeqarfiit taamaallaat ingerlanneqarsinnaasut sumiiffinni aalajangersimasuni, piffissani ersarinnerusunik aalajangersagaasuni imaluunniit immikkut ittunik atugassarititaasunik eqqortitsisoqartarneratigut.

Aalajangersakkami ilaapput suulluunniit inuussutissarsiornikkut ingerlatsinerit, takornariartitsinerinnaanngitsut.

Aalajangersakkamut siunnersuutaasumi aammattaaq Naalakkersuisut aqutissaqartinneqarput malittarisassiornissanut sumiiffinnut pineqartut ittunut isersinnaatitaaneq pillugu. Aalajangersakkamut siunnersuut siunnerfeqarpoq sumiiffinnut aalajangersimasunut angalaarsinnaanermut uninngaarsinnaanermullu.

Taamaasilluni aalajangersagaq marlunngorlugu avitaavoq aqutsillunilu inuussutissarsiutinik ingerlatsinernik aammalu sumiiffinni angalaarsinnaanernik kiisalu sumiiffimmiissinnaanernik.

Naalakkersuisut pisinnaatitaaffeqarput sumiiffimmut atatillugu malittarisassiorsinnaanermut, kisiannili naatsorsuutigineqarpoq malittarisassat imarisassaannut kommunit aallaavittut siunnersuusiusasut

Malittarisassiortarnikkut inuussutissarsiornernik ingerlatsisoqarsinnaanera taamaallaat sumiiffinni aalajangersimasuni ingerlanneqartarsinnaassasoq, angalaartarnerit uninngaartarnerillu killeqartut ingerlanneqarsinnaassasut paasineqassaaq, ilaatigut zone-nik taaneqartunik aaqqissuussilluni aaqqissuussisinnaanertut. Assersuutigalugu matumani pineqarsinnaapput zone-nik assigiinngitsunik aaqqissuussinerit inuussutissarsiornermut sammititaasut imaluunniit angalaarfusinnaasut kiisalu sumiiffimmiinnerit. Assersuutigalugu pineqarsinnaapput zone-t qorsuusut killilersuiviumngitsut, zone sungaartoq immikkut piumasaaqateqarfiusoq atugassaqartitsiviusorlu, kiisalu zone aappalaartoq inerteqquteqarflluinnartoq inuussutissarsiortoqarsinnaaneranik, angalaarsinnaanernik imaluunniit uninngaarsinnaanernik.

Malittarisassiorsinnaanermut killilersuutinik angalaarsinnaanermut aamma uninngaarsinnaanermut imaqartunik sumiiffinni aalajangersimasuni taamaallaat atuutinngilaq zone-ni aalajangersimasuni, takornariartitsinerup imaluunniit inuussutissarsiornernup killeqarfigisaani. Taamaasilluni pisariaqanngilaq ataqatigiinnissaat zone-t assigiinngitsut, inuussutissarsiorfusinnaasut, killeqartumik angalaarfusinnaasut imaluunniit uninngaarfusinnaasut. Taamaasilluni periarfissaqarpoq aalajangersaasinnaanermut zone-nik angalaarsinnaanernik uninngaarsinnaanermillu killilersuiviusunik, kisiannili assigisaanik killilersuiviumngitsunik imaluunniit inuussutissarsiorsinnaanermut malittarisassaqaanngitsunik. Assersuutigalugu peqarsinnaavoq isiginiartariaqartunik, oqariartortunik angalaarsinnaanernup uninngaarsinnaanerullu killeqarnissaannik sermersuarimi, kisiannili assigisaanik inuussutissarsiorsinnaanernik killiliinngitsunik.

Malittarisassaqaqarneratigut inuussutissarsiornikkut ingerlatsisinnaanermut imaluunniit angalaarsinnaanermut uninngaarsinnaanermullu piffissani aalajangersimasuni, paasineqassaaq

assersuutigalugu inuussutissarsiutigalugu aalisartoqarsinnaasoq imaluunniit piniariartoqarsinnaasoq piffissat aalisarfiusartut imaluunniit piniarfiusartut avataanni, imaluunniit immikkut uumasunik isiginiaalluni imaluunniit pinngortitamik isiginiaanermik peqquteqartunik.

Malittarisassiornikkut inuussutissarsiornep imaluunniit angalaarnerup aamma uninngaarnerup taamaallaat pisarsinnaanissaannik atugassarititaasut immikkut ittut isiginiarnerisigut, assersuutigalugu paasineqarsinnaapput immikkut ittunik piumasagaatit sillimaniarnermut, sillimmasiisarnermut, atuisinnaaneq imaluunniit inerteqquteqarsinnaaneq atortorissaarutitik aalajangersimasunik imaluunniit inuit najuussinnaasut amerlassusissaannik aalajangersaanerit sumiiffimmut tunngasut, inuussutissarsiornep imaluunniit angalaarnermi uninngaarnermilu.

Inatsimmik allamik, matumani inuussutissarsiutinut tunngatillugu inatsimmik, avatangiisinut tunngatillugu inatsimmik imaluunniit pilersarusiornermut inatsimmik sanioqqutitsinissamut aalajangersagaq inatsisitigut tunngavissiinnigilaq.

Taamaalilluni imm. 1 naapertorlugu malittarisassat aalajangersakkat ilaatigut Pilersarusiorneq aamma nunaminertat atorineqartarnerat pillugit Inatsisartut inatsisissaannut akerliunnginnissaanik kinguneqarpoq.

Taassumap saniatigut sumiiffimmi zonenut agguaanissaq, angalanissat, uninngaartarnissat, inuussutissarsiorfissallu isummerfigineqareersimatillugit, inatsisartullu inatsisaat manna naapertorlugu malittarisassatut aalajangersakkat tassunga sanioqqutitsippata, aalajangersagaq naapertorlugu malittarisassiat Pilersarusiorneq aamma nunaminertat atorineqartarnerat pillugit Inatsisartut inatsisissaat naapertorlugu pilersaarutit atuuttut ataqinnissasut.

Taamaalilluni ilaatigut kommunit sumiiffimmut pineqartumut aalajangiisinnaatitaanerit imaluunniit sumiiffimmi aalajangersimasumi angalanissat, uninngaartarnissat, inuussutissarsiorfissallu pillugit malittarisassat isummerfigineqareersimatillugit inatsimmut allamut akerliusumik malittarisassanik aalajangersaasoqannginnissaa qilakkeerneqassaaq.

Malittarisassat aalajangersakkamik tunngavilimmik pilersinneqartut aqqissuunneqartussaapput sanaartukkanik arsaarinnittoqannginnissaa. Taamaattumik inerteqquteqarnerit inuussutissarsiornep ingerlatsisinnaanermut, imaluunniit angalaarsinnaanermut uninngaarsinnaanermulluunniit taamaasilluni naatsorsuutigineqarpoq aallaaviusutut inuussutissarsiutit pioreersut ingerlatsinerisa ilagisaattut, sumiiffimmi pilersinneqarsimasutut. Immikkut ittutigut malittarisassiortoqarsimassappat inuussutissarsiutaareersunut atortinneqalersussanik, tamatuma ilutigisaanik malittarisassiortoqartariaqassaaq immikkut akuersissuteqartoqarsinnaaneranik, taamalu naapertuutinngitsumik inuussutissarsiutinut pioreersunut allaluunniit pisinnaatitaaffiit pissusissamisunngitsunik akuleruttoqaqqunagu.

Malittarisassat aalajangersarneqartut killeqartumik sumiiffimmiissinnaanermut uninngaarsinnaanermullu sumiiffinni aalajangersimasuni, pisartussaapput Kalaallit Nunaata nunat tamalaat akornanni pisussaaffiit naapertuuttunik, matumani aamma Europami inuit pisinnaatitaaffiit isumaqatigiissummut, - Den Europæiske Menneskerettighedskonvention (EMRK). Killilersuinerit angalaarsinnaanermik aamma uninngaarsinnaanermik sumiiffinni pineqartuni, akerliusariaqanngilaq pissutsinik akornusersuinissanut, kiisalu killilersuinerit illersugaannut namminernut. Taamaasillunilu malittarisassiornerni atsikkutigiissaarisooqartarnissaa isiginiarneqartariaqarluni. Ilanngullugulu malittarisassat aamma imaqartariaqarput immikkut sanioqutsisinnaanermut periarfissanik, kiisalu nalunaarsuutinik ilaqarluni angalaarsinnaanerup uninngaarsinnaanermullu killeqartup sumiiffimmi killeqartumi pisinnaaneranut tunngasunik. Immikkut akuersissuteqarsinnaanermut periarfissaqartitaaneq, assersuutigalugu imaqartoq inuk immikkut naliliisoqareerneratigut akuerineqarsinnaassasoq angalaarnissamut uninngaarsinnaanermullu sumiiffimmi, immikkut ilaqutariit inuunerannik, aningaasaqarnermi isiginiagassanik imaluunniit allatigut pissutsinik tunngaveqartunik.

§ 16-imut

Imm. 1-imut

Aalajangersakkamut siunnersuummi nalunaarneqarpoq pisuni qanoq ittuni Kalaallit Nunaanni Pinerluttulerinermut inatsimmik tunngaveqartunik akiliisitsisoqarsinnaanersoq pillugu.

Aalajangersakkami pisinnaatitsisoqarpoq akitsuummik pineqaatissiisinaaneq, pineqartumut, 1) takornariartitsinernik neqerooruteqartumut imaluunniit ingerlatsisumut § 3, imm. 1 naapertorlugu takornariartitsinermik ingerlatsinissamut akuersissummik peqanngitsumut. Takornariartitsinermik ingerlatsisarnermut piunasaqaataavoq akuersissummik tunniussaartoqarsimassasoq. Aalajangersagaq aalajangiisuvoq Inatsisartut inatsisaata siunertaanut atuuffianullu, aamma taamaallaat takornariartitsinermik ingerlatsisoqarsinnaasoq takornariartitsinermik ingerlatsinissamut akuersissummik nalunaaruteqartoqarsimappat.

2) Akuersissummumut atatillugu Inatsisartut inatsisaannik tunngavilimmik atugassarititaasut unioqqutinneqarpata imaluunniit malittarisassat Inatsisartut inatsisaannik tunngavilimmik suliaasut unioqqutinneqarpata, imaluunniit akuersissummumut atugassarititaasut unioqqutinneqarpata. Aalajangersagaq qularnaarissaaq ingerlatsinerit pisassasut siunnersuummi siunertaasut.

3) Eqqunngitsunik imaluunniit paatsiveerussaataasunik paasissutissiisumut pisortat pissaannut paasissutissanut atatillugu § 4, imm. 1 naapertorlugu.

Aalajangersagaq isigineqassaaq atasumik pisariaqarmat akuersissummut qinnuteqaammik suliaqarnermut atasumik siunnersuummik tunngavilimmik nakkutilliisoqarnissaa, paasissutissat pisariaqartut tamarmik eqqortumik nalunaarutigineqartarnerinik.

4) Peqqussutigineqartunik nalunaarutigineqartunik § 14, imm. 1 naapertorlugu malinninngitsoq. Aalajangersagaq isigineqassaaq atasumik pisariaqartoq pisortat suliassaminnik suliarinninnerinut Inatsisartut inatsisaat una tunngavigalugu peqqussutit tunniunneqartut malinneqartarnissaat. Peqqussutit malinneqanngitsut akitsuummik akiliisitsineq kingunerisinnaavaat.

Imm. 2-mut

Siunnersuutigineqarpoq Inatsisartut inatsisaata imaluunniit malittarisassat Inatsisartut inatsisaannik tamatuminnga tunngavillit akiliisitsisoqarnissaanik inassuteqarsimatillugu akiliisitsissutissaq inummut inatsisitigut pisinnaatitaasumut Kalaallit Nunaanni Pinerluttulerinermut inatsit naapertorlugu pineqaatissiisoqarsinnaasoq.

Taamaasilluni aalajangersakkami nalunaarneqarpoq pineqaatissiisoqarsinnaasoq ingerlatseqatigiiffinnut il.il. (inunnut inatsisitigut pisinnaatitaasunut) pinerluuteqarsimanermut akisussaannermut Kalaallit Nunaanni Pinerluuteqarsimanermut inatsimmi kapitali 5-imi malittarisassat naapertorlugit. Tamanna aamma atuuppoq aalajangersakkanik suliaqartoqarpat imm. 4-mi eqqaaneqartunik, taakkualu akiliisitsinnaaneq aalajangerpassuk, akiliisitsissutissaq inummut inatsisitigut pisinnaatitaasumut pineqaatissiisutaasinnaasoq Kalaallit Nunaanni Pinerluttulerinermut inatsimmi maleruagassat tunngavigalugit.

Imm. 3 -mut

Aalajangersakkamut siunnersuut pisinnaatitsivoq peqqussutinut pilersinneqartunut § 5, § 10, imm. 3, aamma § 15 pineqaatissiisoqarsinnaasoq akitsuummik akiliisitsinikkut Kalaallit Nunaanni Pinerluttulerinermut Inatsit naapertorlugu.

Imm. 4 -imut

Aalajangersakkami pisinnaatitsissummi nalunaarneqarpoq Inatsisartut inatsisaannik imaluunniit malittarisassanik inatsimmik tunngaveqartunik unioqqutitsinikkut arsaarinnittoqarsinnaasoq Kalaallit Nunaanni Pinerluttulerinermut inatsimmi malittarisassat naapertorlugit. Arsaarinninneq aamma inummut inatsisitigut pisinnaatitaasumut tutsinneqarsinnaavoq. Arsaarinnissutaasut nunatta karsianut iluaqutissanngortinneqassapput.

Imm. 5 -imut

Aalajangersakkap kinguneraa akitsuutit akilerneqartut Inatsisartut inatsisaanni maleruagassat naapertorlugit, imaluunniit malittarisassat Inatsimmik tunngaveqartut naapertorlugit akilerneqartut nunatta karsianut nakkartinneqartassasut.

§ 17-imut

Imm. 1-imut

Aalajangersakkamut siunnersuutikkut piffissaliisoqarpoq qaammatinik 6-inik, inatsisartut inatsisaat manna naapertorlugu aalajangiinerup eqqartuussivinnut suliassanngortinneqarsinnaaneranut.

Aalajangersakkamut siunnersuut atortinneqassaaq suliassanngortitsinernut aalajangiinernik namminernik, matumani aamma assersuutigalugu aalajangiinerup misilinneqarneranut sunniutaanulluunniit, aamma taarsiivigineqarnissamik sulianut, akiliisitsissutissanut allanut imaluunniit piumasagaatinut imaluunniit aalajangiinernut atasuni.

Piffissaliineq naatsorsorneqassaaq illuatungiusup aalajangiineq pillugu ilisimatinneqarfianiit. Aalajangiineq tamanut saqqummiussaasimappat, naammagittaalliorsinnaaneq naatsorsorneqassaaq ullormut tamanut saqqummiiviusumiit. Piffissaq naammagittaalliorfiusinnaasoq arfininngornikkut naappat, piffissaliussaq ulluinnarmut siullermut sivitsorneqassaaq.

Imm. 2-mut

Aalajangersakkamut siunnersuutip kinguneraa suliat imm. 1 tunngavigalugu Kalaallit Nunaanni Eqqartuussivimmi suliassanngortitat suliaqarfittut siullertut isigineqarnissaat.

Imm. 3-mut

Aalajangersakkap aalajangerpaa aalajangiinermik eqqartuussivinnut suliassanngortitsineq ingerlaannartumik malittarisassamik atortuulersitsinermik kinguneqarneq ajortoq, Naalakkersuisut allatut aalajangiinngippata. Eqqartuussivinnut suliassanngortitsineq aalajangiinermik ingerlaannartumik atortuulersitsinermik kinguneqassappat aalajangiineq aatsaat atortuulissaaq suliami aalajangiisoqareeraangat, imaluunniit aalajangiinermik allannguisoqarpat, imaluunniit suliassaq itigartinneqarpat, utertinneqarpat imaluunniit allatut atorunnaarpat. Ingerlaannartumik aalajangiinerup atortuulersinnaaneramik nalilersuinermi ilaatigut isiginiaasoqarsinnaavoq aalajangiineq pitsaanngitsunik kinguneqarsinnaanersoq akuersissummik qinnuteqartumut takornariartitsinermut, imaluunniit takornariartitsisartumut akuersissummik itigartinneqarsimasumut. Taamaattumik aalajangersagaq ikkunneqarpoq periarfissiumalluni suliamik eqqartuussivinni suliaqarneq takornariartitsisartumik aningaasatigut eqquisinnaanersoq pinngitsoorniassallugu, assersuutigalugu akiliisinnaajunnaarnikkut, akilersuiunnaarnikkut imaluunniit akiliisinnaajunnaartutut suliarineqarnermik.

§ 18-imut

Imm. 1-imut

Siunnersuutigineqarpoq Inatsisartut inatsisaat atortuulissasoq ulloq 1. januar 2025.

Imm. 2-mut

Aalajangersakkap imm. 2-ani aalajangiunneqarpoq Inatsisartut inatsisaat 1. januar 2027 tikillugu takornariartitsinernut inatsisinik malinnilluni Inatsisartut inatsisaata atortuulernissaa sioqqullugu ingerlatsisunut atortinneqassanngitsoq.

Aalajangersakkamut siunnersuutaasup kinguneraa inuussutissarsiortut aaqqissuussisimasut inatsisit iluini takornariartitsinnaanerminnik inatsisit atuuttut iluini, akuersissutinik suliaqartarnerit piffissamik atuiffiusarnerisa kingunerisaanik annaasaqassanngitsut piffissami 1. januar 2025-imiit akuersissummik nalunaaruteqartoqarnissaata tungaanut.

Ilanngussaq 1**Tusarniaanermi allakkiaq
Tusarniaaneq siulleq**

Siunnersuut piffissami 24. april 2024 - 5. juni 2024 tamanut ammasumik Naalakkersuisut tusarniaasarnermut quppersagaani takuneqarsinnaasimavoq, soorluttaaq siunnersuut piffissami pineqartumi ukununnga tulliuuttunut tusarniaassutigineqarsimasoq:

- Naalakkersuisut Siulittaasuata Naalakkersuisoqarfia
- Ineqarnermut Attaveqaasersuutinullu Naalakkersuisoqarfik
- Aningaasaqarnermut Akileraartarnermullu Naalakkersuisoqarfik
- Aalisarnermut Piniarnermullu Naalakkersuisoqarfik
- Isumaginninnermut, Ilaqutariinnut, Suliffeqarnermut Nunamullu Namminermt Naalakkersuisoqarfik
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
- Nunalerinnermut, Imminut Pilersornermut, Nukissiuuteqarnermut Avatangiisinullu Naalakkersuisoqarfik
- Meeqqanut Inuusuttunullu Naalakkersuisoqarfik
- Peqqissutsimut Naalakkersuisoqarfik
- Naalagaaffinngornissamut Nunanullu allanut Naalakkersuisoqarfik
- Avannaata Kommunia
- Qeqqata Kommunia
- Kommune Qeqertalik
- Kommuneqarfik Sermersooq
- Kommune Kujalleq
- Grønlands Erhverv
- Sulinermit Inuusutissarsiuuteqartut Kattuffiat (SIK)
- Atorfillit Kalaallit Nunaanni Kattuffiat - Akademikernes Sammenslutning i Grønland (ASG)
- Ilinniartitsisut Meeqqat Atuarfianneersut Kattuffiat (IMAK)
- Nunatsinni Perorsaasut Kattuffiat (NPK)
- Peqqinnissaq Pillugu Kattuffiat (PPK)
- Kalaallit Nunaanni Aalisartut Piniartullu Kattuffiat (KNAPK)
- Avannaani Inuusutissarsiuortut
- Qeqertalik Business Council
- Arctic Circle Business
- Sermersooq Business
- Innovation South Greenland

- Kommuni Pilersaarusiornermut Oqartussat
- Visit Greenland
- Nalik Ventures
- Air Greenland
- Eqqartuussissuserisut - Nuna Advokater
- Eqqartuussissuserisoq - Arctic Law
- Eqqartuussissuserisut - Advokatfirmaet Malling & Hansen Damm
- Eqqartuussissuserisoq - Advokatfirmaet Meinel
- Eqqartuussissuserisoq - Advokat Gedion Jeremiassen
- Inuit Law
- Eqqartuussissuserisoq - Advokat Naja Joelsen
- Eqqartuussissuserisoq - Advokat Aviâja Helms
- Eqqartuussissuserisoq - Advokat Marie Louise Frederiksen
- Kukkunersiuisut - Grønlands Revision
- Kukkunersiuisut - Deloitte
- EY
- WWF Kalaallit Nunaanni
- Oceans North Kalaallit Nunaat
- Pinngortitaleriffik
- AECO
- Arctic Umiaq Line
- Kalallit Airports
- Sikuki
- Grønlandsbanken
- Banknordik

Piffissap tusarniaaviusup naanerani tulliuttunit tusarniaanermik akissutininik Naalakkersuisut tigusaqarput. Ilanngullugillu Naalakkersuisut akuerisimavaat akissutigineqartut tusarniaaviusoq naareersoq tiguneqartut ilanngunneqarnissaat.

- AECO
- Air Greenland
- Albatros Arctic Circle ApS
- Andrew McLean
- Arctic Circle Business
- Arctic Hiking and Expeditions ApS
- Arctic-Dream APS
- Avannaata Kommunia
- Blue Water Greenland aamma Eimskip Greenland
- Danmarks Rejsebureau Forening (DRF)

- Aningaasaqarnermut Akileraartarnermullu Naalakkersuisoqarfik
- Ineqarnermut Attaveqaasersuutinullu Naalakkersuisoqarfik
- Peqqinnissamut Naalakkersuisoqarfik (Oqaaseqaateqanngillat)
- Forsikring & Pension (F&P)
- Greenland Airports
- Greenland Sagalands Qaqortoq Tourist Service
- Sulisitsisut
- Kukkunersiuisut - Grønlands Revision
- GrønlandsBANKEN
- Guide to Greenland ApS
- Heliskigreenland
- Hotel Hans Egede A/S
- Hotel SØMA aamma Indenlandsk Sømandsmissionimi siulersuisut
- Illit Forsikringit Agentur A/S (Codan)
- Ilulissat Excursions
- Ilulissat Guesthouse aamma Ilulissat Adventure
- Innovation South Greenland A/S
- Johan Arne Fleischer
- Eqqartuussissuserisut Kielberg Advokater - Hotel Nordbo A/S sinnerlugu
- KNAPK
- Kommune Kujalleq
- Kommune Qeqertalik
- Kommuneqarfik Sermersooq
- Nalik Ventures
- Nanortalik Serano Boat Tours
- Nomad Greenland
- Nuna Advokater
- Oceans North Kalaallit Nunaat
- Pinngortitaleriffik
- Pirhuk – Greenland Mountain Guides ApS
- Qeqertalik Business Council og Destination Diskobay A/S
- Qeqertarsuaq Boat Tours ApS
- Qeqqata Kommuni
- Sermilik Adventures ApS, Arctic Dream ApS og Tasiilaq Tours (Visit East Greenland)
- SIK
- Sillisit Hostel / Café Thorhildur
- Topas Explorer Group
- Transparency International Greenland (TIG)
- Travel by Heart ApS aamma Taavani ApS
- Trophy Huntin Greenland
- Ultima Thule
- Visit Greenland

Tulliuttuni oqaaseqarfigineqartassapput tusarniaavigineqartut oqaaseqaatigisaat aamma allannguutissatut siunnersuutaat, tusarniaanermi tiguneqarsimasut. Oqaatigineqassaaq tusarniaavigineqartunit akissutigineqartut assut annertuujusut pingaarnersiorlugit issuaavigineqartassammata. Naalakkersuisut tusarniaavigineqartut akissutaannut oqaaseqaataat *kipungasunik allatatut nalunaarneqartarput.*

Tusarniaanermi akissutigineqartut (oqaaseqaatigineqartut) tamakkerlugit Inatsisartuni ataatsimiititaliamut suliamik matuminnga suliaqartumut ingerlatinneqarput.

1. Ataatsimut oqaaseqaatigineqartut

Peqqinnissamut Naalakkersuisoqarfik siunnersuummut oqaaseqaateqanngilaq.

Ilulissat Excursions aamma **Johan Arne Fleischer** ataatsimut isigisumik oqaaseqarput siunnersuut tapersersussallugu pissutissaqartoq, aammalu aningaasat takornariartitsinermit takornarianiillu isaatinneqartartut Kalaallit Nunaannut innuttaasunullu iluaqutissaasariaqartut.

Pirhuk – Greenland Mountain Guides ApS siunnersuummik tikilluaqqusivoq isikkivinniit arlaqartuniit oqaatigalugulu unammillernarsinnaasartoq Kalaallit Nunaanni amerlanerusunik isertitassarsiorniartarnek suliffeqarfinit nunanit allaneersunit, isumaliutigineqarsinnaasorlu periarfissaasinnaanersoq kalaallinut takornariartitsisartunut kiffartuussinernik immikkut ingerlatsisarsinnaaneq nunani allamiut suliffeqarfutaannut atatillugu, kalaallit sillimaniarnikkut il.il. pilersaarutaannut ilaasuni.

Aningaasaqarnermut Akileraartarnermullu Naalakkersuisoqarfiup oqaatigaa oqimaaqatigiissaagaasunik aaqqissuussinissaq pisariaqartoq inatsisitigut killiliussani takornariartitsinermit ineriartortitsinermit maani nunami, takornariartitsineq ineriartortinneqarsinnaassappat. Pingaaruteqarpoq oqimaaqatigiissitsineq, najukkat nammineq soqutigisaasa kissaatillu pissusissamisoortut najukkamik aallaaveqarnissamik avataanneersut aningaasalersuinerinit ilaginnarsimaneqannginnissaat, kisiannili aamma aalajangiisuvoq nunatsinni takornariartitsinerup ineriartorsinnaanera, aningaasaliissutissanillu pisariaqartunit anguneqarsinnaanissaa, eqaatsuunissaa nutartertuartuunissaalu piffissap ingerlanerani. Tamanna pisariaqarpoq unammilligassat piusut pissutsillu sunniisartut atuuttut isiginiarlugit, minnerunngitsumik inuiaqatigiinni inuttakitsuni isorliunerusuniittuni aporneqartartussani takornariartitsinermit periarfissanik inerisaaniarnerni, peqataaniarnermilu.

Oceans North Kalaallit Nunaat oqaaseqarpoq inuiaqatigiit kalaallit aamma takornariartitsinerup ineriartortinneqarnerani pingaaruteqartoq oqimaaqatigiissitsisoqarnissaa, - balance - nukinnut atugassanut, tassani aamma aningaasaliissutinut aqquutaasumi, imatut ingerlatsinerup kalaallini inuiaqatigiinnik akiginnilluni pinnginnissaa, inuiaqatigiinni ileqqutoqqanik aseruisoqannginnissaa oqimaaqatigiissitsisoqarnissaalu aalisarnerup, piniarnerup eqeersimaartumillu inooqataanerup iluani.

Kommune Kujalleq oqaaseqarpoq takornariartitsineq pisuni amerlasuuni nunat tamalaat akornanni suleqatigiinnermi ileqqusunik tunngaveqartartoq, tamannalu inatsisartut inatsisaanni ersertariaqartoq, eqqumaffigisariaqartorlu nunanit tamalaanit aningaasaliisartut periarfissaat.

Kommune Qeqertalik akuersivoq takornariartitsinerup aqunneqartariaqarneranik siunnerfigalugu piujuaannartitsinerup sillimaniarnerullu qularnaarneqarnissaat, kisiannili ilutigisaanik tikkuarlugu aalajangiisuusooq inatsisiliornerup takornariartitsinerup annertusiartortitsisinnaanermik imaluunniit ineriartortitsisinnaanerup akornusersuinnginnissaat, imaluunniit pisariaqanngitsunik allaffissornikkut suliffeqarfiit oqimaarsaasersunnginnissaat.

GrønlandsBANKEN siunnersuummi siunertaasunik tapersersuivoq, kisiannili isumaqarani siunnersuummi sakkussat siunertat naammassiniarneranni naammassasut.

Sermilik Adventures ApS, Arctic Dream ApS aamma Tasiilaq Tours (Visit East Greenland) oqaaseqarput nalorninarartoqartillugu killiliussat aamma killilersuutaasut siunnersuummiittut ineriartortitsinissamat Kalaallit Nunaannilu takornariartitsinerup siuarsarnissaannut periarfissaqartitsinersut, matumanissaaq aalajangersakkat amerlasuut ersarissuunngimmata.

Arctic Dream ApS’-imi sulisut ataatsimut ernummatiminnik ersersitsippot siunnersuut kinguneqarsinnaammat suliffeqarfiit matunerannik, taamalu sulisuusut isertitaarunnerannik.

Qeqertalik Business Council aamma **Destination Diskobay A/S** oqaaseqarput siunnersuut killilersugaanngitsumik takornariartitsinerup kigaalaqusersuisinnaasoq, aammalu inuussutissarsiutigalugu piniartut aalisartullu saniatigut isertitaannut sunniuteqarsinnaasoq.

Arctic Hiking aamma Expeditions ApS pissutissaqartitsinngillat takornariartitsinerup immikkut malittarisassiornissamat, inuussutissarsiutinut allarpassuarnut sanilliullugu, tamanna suliffeqarfinnut mikisunut oqimaarsartitsissammat, allaffissornermillu annertusaalluni, inuiaqatigiinnut iluaqutissartaqanngitsunik.

Qeqertarsuaq Boat Tours ApS oqaaseqarpoq sinnersuummi suliffeqarfiit minnerusut avataaneersut najukkanilu namminerni ingerlatsisartunik suleqatissarsiortartut akornusersortariaqanngitsut.

Greenland Airports, Hotel SØMA aamma Indenlandsk Sømandsmission aamma **Kielberg Advokater, Hotel Nordbo A/S** sinnerlugu allattoq isumaqarput inatsisartut inatsisaat annertuvallaamik pitsaanngitsumillu inuiaqatigiinnut sunniuteqassasoq, minnerunngitsumik nunanit allaneersut aningaasaliissutaannut immikkullu ilisimasaannut. Ilutigisaanik takornariartitsinerup ingerlatsisumut allaffissornikkut oqimaarsaatissanik siunnersuut kinguneqassaaq. Kaammattuutigineqarpoq ilitersuusiortoqassasoq suliffeqarfiit inatsisartut inatsisaanni piumasagaatinik naammassinninnissaannik ikiorumallugit.

Nuna Advokatit oqaatigaat siunnersuut pissutissaqartitsisoq ernummatissanik arlaqartunik piumasagaatinik nutaanik eqqussuisoqarnissaani takornariartitsinerup ingerlatsiumalluni, naatsorsuutigisariaqassasorlu ineriartortitsinerup annertuunik kinguneqassasoq suliffeqarfinnut aalajangersimasunut, nunatsinnilu inuussutissarsiornermut ataatsimut isigaluni.

Heliskigreenland aamma **Andrew McLean** oqaaseqarput siunnersuutip kingunerissagaa sullitat aamma immikkut ilisimasat nunat tamalaat akornanni suliffeqarfiit pigisaat sumiiffinnut allanut nutsernerannik, taakkua Kalaallit Nunaanni ingerlatsisinnaatitaassanngippata. Heliskigreenland inassuteqarpoq taarsiullugu takornariamut ataatsimut ullormut akitsuummik aaqqissuussisoqassasoq, inuiaqatigiinnut ingerlatsinermi sunnerneqartunut akiliutigineqartussamik.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarpai tusarniaanermi akissutigineqartut, oqaaseqaatigineqartullu allat isumasioqatigiilluni ataatsimiinnermeersut ulloq 27. maj aamma 6. juni 2024. Naalakkersuisoqarfiup nalilerpaa pisariaqartitsisoqarmat takornariartitsinerup aqunneqarnissaanik, siunnersuullu pisariaqarmat. Taamaattoq Naalakkersuisut aamma tusarnaarpai saqqummiussorneqartut ernummataasut, arlalitsigullu siunnersuummi nalimmassaasoqarluni. Naalakkersuisoqarfiup ilaatigut tusaaniarsimavai tusarniaanermi akissutaasut oqariartortut siunnersuut ineriartortitsinermik killilersuisinnaasoq, matumani ingammik najugaqartuunissamik piumasagaammut atasuni, tusarniaavigineqartunit arlalinnit akornutaasinnaasutut oqaatigineqartarmat nunanik tamalaanik suleqateqarnermut. Tamannalu tunuliaqutaralugu Naalakkersuisoqarfiup ilaatigut najugaqartuunissamik piumasagaat naleqqussarsimavaa, ingerlaqqittumik periarfissaqartikkumallugu nunani tamalaani ilisimasallit iluaqutigineqarnissaannut, ingerlaqqittumillu nunanit tamalaaniit aningaasaliisoqartaqqullugu, Kalaallit Nunaanni takornariartitsinermut iluaqutaasussamik.

Aningaasaqarnermut Akileraartarnermullu Naalakkersuisoqarfiup oqaatigaa atugassarititaasutut killiliussat takornariartitsinermi periarfissanik iluaquteqarnermut atasut siunnersuummi oqariartuutigineqartut iluaqusiisumik Qajannaassutsimut Inerisaanermullu Pilersaarusiarnut 2-mut naapertuuttumik aaqqissuunneqarsinnaasut. Tassa imaappoq pisariaqartitsinermut piginnaasanillu ineriartortitsinermik pilersaarusiornermut suliniutinut naapertuuttunik takornariartitsinermi pisariaqartitat eqqarsaatigalugit, kiisalu suliffeqarnermi pisariaqartitsinermut naleqqussagaasunik, takornariartitsinerup qanoq ineriartortinneqarnissaanut naatsorsuutigisat kissaatigisallu aallaavigalugit. Assigisaanik pissutsit atuupput suliffeqarnermut atasunik pisariaqartitsinermut periarfissanullu naleqqussaarni.

GrønlandsBANKEN oqaaseqarpoq siunnersuut manna takornariartitsinermut periusissiamut naapertuuttumik kivitsinngitsiq, 2024-2025-imut atasumik aalajangersagaareersumut, soorluttaaq takornariartitsinermik ingerlatsinerit assigiinngitsut assigiinnginneri isiginiarneqanngitsut.

Transparency International Greenland (TIG) oqaaseqarpoq aamma ilaatigut takornariartitsinermut atatillugu ikaarsaariarnermut periusissiaq 2023-2024 ilaasariaqartoq, qularnaarumallugu ersarissaaneq ataqatigiissaarinerlu periusissianik atortitsinermi.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarpai oqaaseqaatigineqartut. Naalakkersuisoqarfiup oqaatigaa ilaatigut siunnersuummi isiginiarneqarmat 2023-2024-imi piffissamat ikaarsaariarfiusumut atatillugu periusissiaasoq, taannalu ilaatigut tunngavimusimammat inatsisissamat siunnersuummi, ilaatigut immikkoortuni zonenut immikkoortiteraluni aaqqissuussinermi, sillimaniarnermut pilersaarusiarni takornariartitsinerit aaqqissuunneqarnerini

assigiissaaraluni aammalu najukkani innuttaasunik peqataatitsisarnerni. Taamaattoq Naalackersuisoqarfiup ilanngullugit maluginiarpai tusarniaavigineqartunit oqaaseqaataasut isumaqanngitsut takornariatitsinermik periusissiaasunik siunnersuut kivitsisussaasoq, taamaattumillu siunnersuummi arlaqartutigut iluarsisioqarpoq.

1.1 Aningaasaqarnikkut allaffissornikkullu kingunerisassaanik itisilerinerit pillugit

Aningaasaqarnermut Akileraartarnermullu Naalackersuisoqarfiup, Greenland Airports, Grønlands Revision aamma **Qeqqata Kommuni** oqaaseqarput pisariaqartitsisoqartoq nalinginnaasunik oqaaseqaatinik itisilerisoqarnissaanik, minnerunngitsumik aningaasarsiornikkut aamma allaffissornikkut siunnersuutip kingunerisassaanut atasuni. Aningaasaqarnermut Akileraartarnermullu Naalackersuisoqarfiup oqaatigaa maqaasineqartut kingunerisassanik nalilersuinerit siunnersuummi immikkoortut pingaarnerit eqqarsaatigalugit, aammalu nalilersuinerit qanorlu isumalluartoqarneranik oqariartuutit aallaaviusutut ilaqartariaqartut tigussaasunik kisitsisinik paasissutissanik ilaqartunik nalilersuinerinik. **Aeco** inassuteqarpoq qulaajaasoqartariaqartoq maanna takornariatitsinermik, nalilersuinerinillu tunngaveqartunik peqqissaartumik kingunerisassaanik naliliisoqarluni takornariatitsinermik neqeroorutaasartuni, takornariatitsinermi suliffissaqartitsinermik kiisalu aamma takornariatitsinermi isertitanik akileraartitsisarnermullu tunngaviusunik siunnersuummik aallaaveqartunik.

Aningaasaqarnermut Akileraartarnermullu Naalackersuisoqarfiup oqaatigaa maqaasineqartut kingunerisassanik nalilersuinerit, nunanit allaneersut aningaasalersuisarnerisa kikkunnit taarserneqarnissaa eqqarsaatigalugu, aamma qanoq aaqqissuussinikkut ilisimasanik peqalertarnerup minnerunngitsumillu aningaasaliissutissaqartitsinerup naapertuuttumik annertussusilimmik pigiinnarneqarsinnaaneranik. Ilanngullugulu ingerlaqqilluni inassutigineqarpoq nassuiaasoqassasoq piffissap akuersarneqarsinnaasup iluai qularnarneqarsinnaanersoq nunatsinni namminermi aningaasalersuisoqarsinnaalersinnaanera, Grønlandsbanken -imiit aningaasaliissutitsigut imaluunniit allat aningaasaliissutaasigut, nunanit allaneersut naatsorsuutigisariaqartut inatsisartut inatsisaatigut peersinneqartut taartaattut aningaasalersuutissanik, avataaneersut aningaasaliisartut tunuassappata. Ilanngullugulu nassuarneqartariaqarput nalorninaataalersinnaasut timmisartunut mittarfiliornertigut aningaasalersuutit naammattumik iluaqutigineqarsinnaalissanersut, takornariatitsinerup annertunerulerneratigut.

Aningaasaqarnermut Akileraartarnermullu Naalackersuisoqarfiup ilanngullugu aamma oqaatigaa nalilersuineq siunnersuut aningaasarsiornikkut pitsaasunik sunniteqassanersoq pillugu assersuutigalugu pitsaassuilersorneqartariaqartoq uuttuutaasunik pingaarutilinnut ilaareersunut atasumik, matumanissaaq inooqatigiinnikkut sunniutaasunut, piujuaannartitsinermut suliffissaqartitsinermullu atatillugu qanoq ittunik isumalluartoqarneranut, matumanissaaq ukioq kaajallallugu suliffissaqartitsisinnaanermi periarfissat eqqarsaatigalugit.

Aningaasaqarnermut Akileraartarnermullu Naalackersuisoqarfiup oqaatigaa tunngavilersorluagaasunik piviusunillu oqariartortoqartoq piffissamut ungasissumut isigisunik annertuunik siunnersuut sunniteqarsinnaasoq, politikki piviusunngortikkumallugu kissaataasoq

pissutigalugu, maani najugaqartut immikkut illersorumallugit salliussanngorlugit avataaneersunit unammillerneqarnissamut, minnerunngitsumik inoqarfinni minnerusuni, sumiiffinnilu avinngarusimasuni.

Qeqqata Kommuniata inatsisiliortut naliliinerat isumaqatiginngilaa, siunnersuut pisortanut inuussutissarsiortunullu pitaasunik aningaasarsiornikkut kinguneqartussaasoq pillugu. Siunnersuutikkut takornariartitsinermik suliffeqarfiit allaffissornerujussuarmik suliassaqartinneqalerput, soorluttaaq avataaneersut takornariartitsinermut aningaasalersueqataanerat annaaneqarsinnaasoq.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarpai tusarniaanermut akissutaasut tiguneqartut, tamannalu tunuliaqutaralugu aningaasaqarnermut allaffissornermullu siunnersuutip kingunerisassai itisileriffigisimallugit, kiisalu aamma nalinginnaasunik oqaaseqaataasut siunnersuummut.

1.2 Innuttaasunik aamma soqutigisaqartunik akulerussisarneq / peqataatitsisarneq Arctic Circle Business aamma Transparency International Greenland (TIG) kaammattuipput najukkani namminerni innuttaasunik aamma soqutigisaqartunik akulerussisoqartassasoq, assersuutigalugu najukkani namminerni tusarniaanertigut imaluunniit workshops atorlugit.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup kissaatigineqartut innuttaasunik aamma soqutigisaqartunik akulerussisarneq tusaatissatut tiguai, siunnersuullu pillugu oqallitsiviusunik ataatsimiinnerni arlaqartunik ingerlatsisarsimalluni ulluni 27. maj 2024 aamma 6. juni 2024.

1.3 Suli aammaarluni annerusumillu inatsisitigut aqutsineq

Travel by Heart ApS aamma **Taavani ApS** aperippit takornariartitsinermut inatsisiliernerup saniatigut ilassutitut misissorneqassanersut Kalaallit Nunaanni ilaasunik angallassarneq pillugu inatsisit, oqaatigineqarporlu EU-mi ullumikkut peqqussuteqarmat illersuisunik angalasunik / atuisartunik EU-ip iluani angalasunik (aamma angalasut apuuffissaannut Kalaallit Nunaanni), kisiannili taamaattumik Kalaallit Nunaanni soqanngilaq.

Guide to Greenland ApS oqaaseqarpoq Naalakkersuisut kissaateqarsimappata aningaasalersuinikkut Kalaallit Nunaanni takornariartitsisarnermik annertusiartortitsinissamik killiliussatut inatsiseqarnissaa kissaatiginartoq, oqariartuuteqartunik qitiusutut niuernerq inuussutissarsiummi tassani suunersoq pillugu Namminersorlutik Oqartussat suliffeqarfiutaanni ingerlatsiviinilu, takornariartitsinerup iluani, imaalillugu tamakkua pissusissamisunngitsumik namminersortut soqutigisaannut aallarnisaasartunullu unammillertooqqunagit.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarpai inatsisissatut siunnersuummut atatillugu oqaaseqaatigineqartut sinneri aamma. Kalaallit Nunaanni ilaasunik angallassineq

pillugu inatsisinut atatillugu Naalakkersuisoqarfiup innersuutissavai siunnersuut pineqartutut ittoq Ineqarnermut Attaveqaasersuutinullu Naalakkersuisoqarfimmiimmat.

2. Inatsisartut inatsisaanni immikkoortunut assiginningsunut

2.1 Kapitali 1 -imut: Inatsisip atuuffia aamma taaguutit

Tusarniaavigineqartut arlaqartut oqaatigaat kissaatiginartoq taaguusersuutini inatsisartut inatsisaanniittuni arlaqartutigit erseqqissaasiisoqartariaqartoq.

Air Greenland aamma Arctic Hiking and Expeditions ApS oqaaseqarput pingaaruteqartoq ersarissumik allassimassasoq ingerlatsinerit qanoq ittut piumasaqaatini pineqarnerisut, aamma suut pineqannginersut. Aarlerinaateqarpoq arlalitsigut ersernerluttoqarsinnaanera ingerlatsinerit amerlasuut akuleriittut pisarmata, assigiinningsunillu taaguusersorneqarsinnaallutik. **Ultima Thule** inassuteqarpoq inatsisartut inatsisaanni ersarissunik aqqissuussisoqassasoq, Naalakkersuisut assigiinningsut paarlakaattut inatsisartut inatsisaannik allanngortitsisinnaaqunagit.

Travel by Heart ApS aamma Taavani ApS ataatsimut inassuteqarput isumassarsiorortoqarsinnaasoq taaguut "takornariaq" pillugu United Nations Tourism-imiit, tassani takornariatitsineq imatut nassuiarneqarmat: *"Takornariatitsineq tassaavoq inooqatigiinnermi, kulturikkut aamma aningaasarsiornikkut suussuseq, imaqartoq inuit nunani sumiiffinnilu angalaartarnerannik, nammineq ulluinnarni sungiusimasat avatangiisit avataanni, inuttut nammineq imaluunniit niuernikkut proffessionelliusumillu siunertanik tunngaveqartunik. Inuit taakkua taaneqartarput tikeraanik, (takornariaasinnaallutik imaluunniit angalaartuunissaallutik; aalajangersimasumik najugaqartoq imaluunniit sumiiffimmi aallami najugaqartoq), aammalu takornariatitsisarneq sammisanik imaqartarluni, takornariatitsinerimut aningaasartuutinik akulerussisartoq".*

Arctic Circle Business oqaaseqarpoq takornariatitsinerup suussusilersorneqarnera nunatsinni tamarmi inatsisit assigiinningsut akimorlugit assigiittariaqartoq, aammalu akuersissutit pillugit tusarniaasernerit siammasinnerusumik suussusilersortariaqartut.

Blue Water Greenland aamma Eimskip Greenland aamma Visit Greenland kissaateqarput siunnersuummi taaguutigineqartut suli annerusumik erseqqissaasersorneqartariaqartut. Ilaatigut ilassusiisoqartariaqarpoq immikkuualuttortaqarnerusumik taaguusersuummik, kiisalu assersuutinik "takornariatitsinerimik ingerlatsivik" aamma "inuussutissarsiutinik ingerlatsivik suunersut pillugit, aamma taakkua suna assigiinningsutigineraat. Kiisalu aamma ujartorneqarpoq immikkuualuttortalersugaanerusoq allaaserinnineq, suna "inuussutissarsiutit sammiviat ersarinnerusoq" pineqarnerisoq, aamma inuussutissarsiutit sammiviinut nassuiaatit, aalajangersagaq paasineqarluarnerusinnaaqullugu. Ilanngullugulu inassutigineqarpoq kiffartuussinerit pineqartut assigiinningsut suunerinik nassuiaasiisoqassasoq.

Blue Water Greenland aamma Eimskip Greenland, Grønlands Erhverv, Travel by Heart ApS aamma Taavani ApS aamma Visit Greenland ilanngullugu ujartuippat nassuiaatinik taaguutinut qaqugukkut misigisassarsiornerusarnerisut, aamma ersarissumik paasinninnermik "kiffartuussinernik takornariatunut pingaarnertut saaffiginnittut" pillugit, ersarissooqqullugu qanoq

uuttuisoqartassanersoq, matumani aamma assersuutigalugu takornariartussanik inniminniinerit amerlassusaannik, takornariartartut kaaviaartitaasa annertussusaannik imaluunniit unnuisarnerit amerlassusaannik imaluunniit akunnernik atornerqartunik.

Kalaallit Nunaanni Sulisitsisut aamma **Qeqertalik Business Council** aamma **Destination Diskobay A/S** tamatumunnga atatillugu oqaaseqarput piffissap ilaannaani ingerlatsisuusartut aamma isiginiarneqartariaqartut.

Arctic Circle Business aamma **Visit Greenland** oqaaseqarput inuusutissarsiummut atasumik takornariartartut pilersaarutini aaqqissuussinernilu tamani takornariartarnernut sunniuteqarfiusuni ilaatinneqassasut.

Nuna Advokatit isumasioqatigiilluni oqaloqatigiittarnerit tunuliaqutaralugit maluginiarpaat takornariartitsinermik ingerlatsinertut paasineqassasut “inuit tigussaasut imaluunniit inuit inatsisitigut pisinnaatitaasut, nammineq iliuseqarnermikkut imaluunniit sullissisunik aaqqissuussisartunit saaffiginnittoqarneratigut, takornarianik neqerooruteqartartunit aammalu inuusutissarsiornikkut niueruteqartartunit tulluuttut tassaasut takornariartitsinernik kiffartuussisarnerit: misigisassarsiornernik aaqqissuussisartut aamma nioqquteqartartut, aamma ingerlatsisarnerit inoqutigiaanut - tassa gruppinit aamma inunnit ataasiakkaanut, soorlu imaatigut angallassisarnerit, pisuttuarternerit, qimussimik angalaarternerit, snescooterinik angalaarternerit, sisoraatinik ujakkaarterneq, tammaarsimaarterneq, aalisariarterneq aamma piniariarterneq il.il.” **Nuna Advokatit** kaammattuipput siunnersuummi § 2, imm. 1 tamakkununnga naapertuuttumik iluarsiiissuserneqassasoq.

Ineqarnermut Attaveqaasersuutinullu Naalakkersuisoqarfiup oqaatigaa pissusissamisoorpasinngitsoq siunnersuummi akunnittarfiit piumasaqaatinut ilaatinnerisigut unnuisarfissanut aningaasaliiumassutsimut akornutaasinnaasoq. Inassutigineqassaaq nukittorsagaasumik sammineqassasut “misigisassat”, aamma tamatumunnga assersuutinik nassuiaatitut oqaaseqaatini allaaserinnittoqassasoq, pissutigalugu tamanna sanilliussisinnaanermik annertunerulersitsissammat. Ilanngullugu aamma oqaatigineqarpoq isumaqarluassasoq “misigisassanut” atatillugu akunnittarfiit imaluunniit “angallassissutit motorillit” inatsisartut inatsisaanni ilaassappata, tamatumani ingerlatsineq misigisassanut ilaasimappat. Ineqarnermut Attaveqaasersuutinullu Naalakkersuisoqarfiullu ilanngullugu kaammattuutigaa siunnersuummut nassuiaatitut oqaaseqaatini erseqqissarneqassasoq unnuisarnerup aamma misigisassat inatsisartut inatsisaanni ilaanersut, tassa imaappoq assersuutigalugu takornariartut pinngortitami unnuinissamut akiliuteqaraangata, taavalu eqqartuussissuserisut **Kielberg Advokater, sinnerlugu Hotel Nordbo A/S** oqaaseqarluni ersareqqissaasamik suussusilerneqartariaqartut sammisanik ingerlatsisarnerit suuneri, aamma suut inatsisartut inatsisaanni ilaannginneri, kissaatigineqarsimappat akunnittarfiit inatsisartut inatsisaata atuuffigisaanut ilaassanngitsut. **Nuna Advokatit** ilanngullugu aamma oqaatigaa isumasioqatigiilluni oqallinnernit nalunaarsuutini allassimammat akunnittarfiit aamma unnuisarfiit, neriniartarfiit, piniarfiit tammajuitsussarsiniartarfiit aamma inunnik qamutit motorillit atorlugit assartuisarneq inatsisartut inatsisaanni pisinnaatitsissutitut akuersissummik tunniussisarnerup ilagisussaannikkkaa isumaliutaasoq, taakkua nioqqutigisanngimmatigut aaqqissuuttarnagillu misigisassarsiortitsisarnernik siunertaqartut ingerlatsinerit, tamannalu nassuiaatitut oqaaseqaatini erseqissallaqquneqarpoq. Ilanngullugu Nuna Advokatit paasinninneraat

inunnik qamutininik motorilinnik angallassisarneq assersuutigalugu timmisartoqarfimmiit akunnittarfimmut “takornariartitsinermik ingerlatsinertut” isigineqanngimmat, tamanna misigisassanik nammineq ilaqarsimanngippat, tamannalu taamaattut Nuna Advokatit naatsorsuutigaat. Taamaattumik siunnersuutigineqarpoq tamanna siunnersuummi § 3, imm. 8 -mi erseqqissarneqassasoq. Ilanngullugulu siunnersuutigineqarpoq ilaatinneqassanngitsut takornariartitsinermik ingerlatsisernerit kaffisoriartortitsinernik, qilaatersornermik, uajaarnermik aamma eqqumiitsuliortut ingerlatsinerit akuersissuteqartarnerup avataaniissasut.

Nuna Advokater aamma Travel by Heart ApS og Taavani ApS oqaaseqarput siunnersuummi erseqqissarneqartariaqartut angalatitseqatigiiffinnut takornariartunillu sullissisarnernut ingerlatsineq. Nuna Advokatit oqaatigaat oqallitsitsisarnernerit tunuliaqutaralugit paasinarpoq siunnersuummi “akunniliulluni sullissinermi” ilaanngitsut a) assersuutigalugit akunnittarfiit imaluunniit angalatitseqatigiiffiit, takornarianut innersuussisartut misigisassarsiornissap imaluunniit ingerlatassat pisiarisarnissaannik takornariartitsisartumi aqqissuussisaasartumi, tunisaqartartuni pisusanillu suliaqartartui, imaluunniit b) assersuutigalugu akunnittarfik imaluunniit angalatitseqatigiiffik takornariamut misigisassamik tunisaqartartut akunnermiliuttut, kisiannili akuerisaasumit takornariartitsisartumit pisisartut, nioqquteqartumit, aqqissuussisartumit pisussamillu ingerlatsisusartumit, taakkualu erseqqissallaqqunartut. **Guide to Greenland ApS** inassuteqarportaaq ilanngunneqassasoq: ”Sullissisusarneq takornariartitsisartup neqeroorutaanik kiffartuussinikkut akuersissummik peqarnissamik piумаqaateqarfiunngitsut”.

Qeqqata Kommunia inassuteqarpoq misissoqqinneqassasut § 1 -ip, tamatumanissaaq imm. 4 -ap oqaasertalersorneri, ersernerlummat inuussutissarsiut tamarmiusoq pineqarneris imaluunniit immikkut takornariartitsinermik ingerlatsisusartut aalajangersimasut pineqarnerisut, akuersissummik peqarnissap avataaniissinnaasut, aamma suut pineqarnerisut oqaatsini ”naapertuutinngitsunik allaffissornikkut oqimaarsaatissat”. Ilutigisaanik inassutigineqarpoq taaguusersuutinut nassuiaammi § 2, imm. 3 -mi aammaarluni ilassusiisoqassasoq.

Visit Greenland inassuteqarpoq ilanngullugu immikkut nassuiaasoqassasoq qanoq Destination Management Companies (DMC'er) taakkualu allequtaralugit tuniniaasartui malittarisassanit nutaanit sunnerneqassanersut, piginnittuunermut piumasaaqatinit, ingerlatsinermilu killilersuutinit.

Ilulissat Excursions isumaqarpoq erseqqissaasertariaqartoq nunatsinni najugallit takornariartutut isigineqartassanngitsut, tassa imaappoq inatsisartut inatsisaat najugaqavissunut nunatsinni angalasunut atatillugu atuutinngitsoq.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermut akissutigineqartut oqallitsitsisarnerrillu tunuliaqutaralugit inatsisartut inatsisaanni aalajangersakkat erseqqissarsimavai aamma nassuiaatit oqaaseqaatit, inatsisartut inatsisaanni kapitalimi 1 -imiittut, siunnerfigalugu inatsisartut inatsisaanni nassuiaatit ataasiakkaat erseqqinnerulersikkumallugit, siunnerfigalugu inatsisartut inatsisaata atuuffigisaa paasinarnerussasoq, takornariartitsinermik ingerlatsineq suunersoq, kiisalu suut inatsisartut inatsisaata iluani pineqannginnerisut.

2.2. Kapitalimut 2: akuersissummik peqarnissamik piumasagaat pillugu

2.2.1. Ataatsimut akuersissummi peqarnissamik piumasagaammut

Nalik Ventures oqaaseqarpoq siunnersuummi iliuusissatut siunnersuutigineqartoq akuersissuteqartalernissaq paasinarluinnartoq ileqqussanullu pitsaasunut ilaalluni. **Greenland Sagalands Qaqortoq Tourist Service** oqaaseqarpoq takornariartitsinermik inuussutissarsiornermi pissusissamisoorluinnartoq maani najugaqartuunissaq, maani nunatsinni inuunissaq aamma najukkanut allattorsimaffimmi nalunaarsorsimanissaq akuersissummik peqalersinnaassagaanni..

Visit Greenland oqaaseqarpoq akuersissuteqartalernerup sillimaniarneq ataatsimut pitsaanerulersissinnaagaa pitsaassusissanillu kivitsisuusinnaasoq, tamakkualu Kalaallit Nunaata takornariartarfittut pitsaasutut isigineqarneranik pitsaanerulersitissasut. Nunani tamalaaneersut ingerlatsisut tamanna ujartortarpaat, issittumilu takornariarfittut aalajangiisuuvoq pitsaassusissat qaffasissuunissaat. Taamaattoq aamma pingaaruteqarpoq aaqqissuussinerup pisariillunilu eqaatsuunissaa, ineriartortitsineq maanna ingerlanneqartoq akornusersorumanagu. Taamaakkualuarterli takornariartitsinermik ingerlatsisuusut minnerit allaffissornikkut oqimaarsaasersorneqassanngillat. Inassutigineqassaaq ilitersuisarneq aamma tapiissuteqartarnernik aaqqissuussinerit akuersissuteqartarnermut atasumik aaqqissuunneqassasut, qularnaarumallugu peqqissumik ineriartortitsineq inuussutissarsiummi, sulilu amerlanerusut kaammattorumallugit inuussutissarsiummut ikaarsaartarnissamut.

Air Greenland-ip oqaatigaa pingaaruteqartoq aaqqissuussinerup allaffissornikkut aningaasatigullu ingerlatsisunut mikinernut oqimaarsaatinnngunninnissaa. **Kommune Qeqertalimmi** ernummatigineqarpoq akuersissuteqartarnermut piumasagaat niuerfiusumut isersinnaanermi sukarsuarnik pilersitsisinnaanera, ingammik suliffeqarfinnut minnerusunut aamma inummit ataasiinnarmit ingerlanneqartunut. Isumaliutigeqqeqquneqarpoq akuersissuteqartarneq sakkusaaersooq eqqortoq, takornariartitsinermi assigiissaariumalluni piujuaannartitsinerullu sillimaniarnermik ilaqartup qularnaarneqarnissaani. Minnerunngitsumik isiginiarlugu siusinnerusukkut inuussutissarsiornermut akuersissummik atorunnaarsitsisoqarnera.

Albatros Arctic Circle ApS, Greenland Sagalands Qaqortoq Tourist Service, Innovation South Greenland A/S, Ilulissat Guesthouse og Ilulissat Adventure, Kielberg Advokater sinnerlugu **Hotel Nordbo A/S** aamma **Trophy Hunting Greenland** oqaaseqarput akuersissuteqartalernissamik piumasagaat allaffissornikkut oqimaarsaatiniq annertunerulersitsissasoq, minnerunngitsumillu minnersut qinnuteqaasiornermi unammilligassaqaalissasut. Trophy Hunting Greenland oqaaseqarpoq ilanngullugu qularnaarneqartariaqartoq qinnuteqaatit taakkualu nalilersorneqartarnerisa akimut ersittuunissaat kikkullu tamarmik naligiimmik pineqarnissaat, itigartitsinerillu misilinneqarsinnaanissaat maalaaruteqartarfikkut aamma eqqartuussivitsigut pisariaqarfianni.

Albatros Arctic Circle ApS, Grønlands Erhverv, Hotel Hans Egede A/S, Sermilik Adventures ApS, Arctic Dream ApS aamma **Tasiilaq Tours (Visit East Greenland)** isumaqarput aaqqissuussinerit allat pitsaanerussasut inatsisartut inatsisaanni siunertat naammassisarnissaannut.

Albatros Arctic Circle ApS inassuteqarpoq piginnaasanik qaffasinnerulersitsinissat, pitsaassusissat aamma piujuaannartitsineq immikkut aallunneqassasut, suliniutigineqassasorlu piartuaartumik

takornariartitsisartunut akuersissuteqartarneq ineriartortinneqassasoq, taamalu takornariat qaammarsaavigineqarluartunik tunngavilinnik qinigassaqartinneqarlutik akuersissut pinnagu. Taanna tassaasinnaavoq “Certified local guides – level 1 – 2 aamma 3” piginnittuuneq apeqqutaatillugu, najukkami sulisussat, ukiuni qassini Kalaallit Nunaanni ingerlatsisimaneq, piujuaanartitsinermi piumasagaatit il.il. apeqqutaatillugit. **Hotel Hans Egede A/S** aamma **Sermilik Adventures ApS, Arctic Dream ApS** aamma **Tasiilaq Tours (Visit East Greenland)** oqaaseqarput aaqqissuussineq tassaasariaqartoq pitsaassusissanut akuersissut, suliffeqarfimmik sillimaniarnikkut isumannaatsumik, peqqussutsimik piujuaanartitsinermillu aallussisumik nittarsaassisoq.

Sulisitsisut inassutigaaat nammineq piumassutsimik akuersissummik allagartaliisarnermik aaqqissuussineq imaluunniit akuersissummik tunniussisarnermik aaqqissuussineq. Tamatumunnga pissutaavoq akuersissummik akuersissuteqartarneq (imaluunniit allagartaliisarneq) siunnerfeqarnerussamat ingerlatsinermut aamma suliffeqarfimmut, akuersissummili nalinginnaasumik ilinniagaqarsimaneq aamma piginnaasagaarneq akuersissummik tunineqartussanik aallaaviusarmat. **Innovation South Greenland A/S** oqaaseqarpoq isumassarsiortoqartariaqartut pitsaassusissanik nalunaaqutsersuisarnissamik siunnersuutaasimasumiit 23. januar 2020 - imeersumiit pitsaassusissanik aaqqissuussinissami, taamani aamma aaqqissuussinissamik pilersaarusiortoqaraluarimat.

Visit Greenland oqaaseqarpoq isumaqarlutik autorisationi kiisalu aamma certificering ataatsimut atuutsinneqarsinnaasut, siulliullu aappaa matutinngikkaa. Visit Greenland suliasanut pilersaarusiarnik suliaqarsimavoq nuna tamakkerlugu atortinneqartussamik, ilaatigullu EU -mit tamatumunnga aningaasaliivigineqarsimalluni, taamaattumillu kaammattuutigalugu (imai ilusialu apeqqutaatinnagit) tamatuma certificeriisarnermut programmimut ilanngunneqarnissaa, marloqiusanik takornariartitsinermut atasumik sulisoqaqqunagu.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermi akissutigineqartut tiguneqartut aallaavigalugit aammalu isumasioqatigiilluni ataatsimiinnerit aallaavigalugit inatsisartut inatsisaanni aalajangersakkat nassuiaatitullu oqaaseqaatit erseqqissaasertarsimavai. Naalakkersuisoqarfiullu ilanngullugu maluginiarpai siulianiittut kissaatit aaqqissuussinermut, takornariartartunut pitsaassutsinik takussutissaqartitsiniarnerit. Naalakkersuisoqarfiup mattutereerumangilaa aaqqissuussineq pineqartoq oqallisigineqarsinnaammat, inuussutissarsiorfullu kaammattorlugit aaqqissuussinermik sulianut tapersersuinissaannik.

Naalakkersuisoqarfik suli ingerlaqqittumik isumaqarpoq pineqartut saniatigut pisariaqartitsisoqartoq aaqqissuussinermik pitsaassusissanik qaffasissunik qularnaarisunik, ilaatigut sillimaniarnikkut takornariartitsinernik Kalaallit Nunaanni ingerlatsisarnerni. Naalakkersuisoqarfiup taamaattoq aaqqissuussineq iluarsisuteqarfigaa, ataatsimut akuersissummik akuersissuteqarnermik aaqqissuussinertut, pisinnaatitsissutitut akuersissutaanngitsumik. Naalakkersuisoqarfiup ilaatigut taaguut “autorisation” – tassa oqaasilerissutit naapertorlugit piginnaatitaaneq – taarserpaa akuersissummik. Tamanna pivoq taaguutinik ingerlatsinermut atasunik suliffeqarfinni siunnerfeqartoqaqqullugu.

Albatros Arctic Circle ApS, Air Greenland, Hotel SØMA aamma **Indenlandsk Søndagsmission, Trophy Huntin Greenland** aamma **Qeqqata Kommuni** oqaaseqarput ersernerluttoq piginnaatitaanermi atugassarititaasut suut pineqarneri, inassutigalugulu objektiviusunik amerlanerpaanik atugassaqartitsisoqassasoq piginnaatitaalersinnaanermi.

Nuna Advokatit oqaatigaat sumiiffinnut killilersuutaasinnaasut aalajangersarneqartarsinnaasut isiginiaasunik a) sillimaniarnikkut piumasagaatit imaannik aamma akisussaasutut sillimmasiisummik / qularnaveeqqusiisummik, sumiiffimmut takornariartitsiviusartumut atasunik, kiisalu b) zonenut aaqqissuussinerup kingunerisaanik ingerlatsinernik matusinerni, tak. siunnersuummi § 17. Paarlattuanik naatsorsuutigineqanngilaq aqutsisoqalerumaarneranik kikkut piginnaatitaalersinnaanernik sumiiffimmut aalajangersimasumut. Siunnersuutigineqarpoq erseqqissarneqassasoq tamanna innersuummik ilanngussinikkut § 3, imm. 3 -mi aammalu § 10 -mi sillimaniarnermut pilersaarutit pillugit aamma § 17 -imi zonenut immikkoortiterineq pillugu.

Kukkunersuiusut - Grønlands Revision inassuteqarput aalajangersagaliortoqassasoq ersersillugu piaaraluni isertitanik akileraartarnermut inatsimmik unioqquitsinerit piginnaatitsisummik atorunnaarsitsisarnermik kinguneqartassasoq.

Naalakkersuisoqarfiup aaqqissuussineq iluarsisuteqarfigaa, imaalillugu aaqqissuussineq piumasagaatinik aalajangersimareersunik naammassisaqarfiusussanngorlugu, akuersisummik tunineqarsinnaajumalluni. Erseqqissarneqarpoq siunnersuummi § 3, imm. 3 -mi piumasagaatit siunnersuummi §§ -ini 8-11 -imi pineqartunik naammassisaqarfiusussaasoq, akuersisummik tunineqarsinnaassagaanni. Inatsisissatut siunnersuummut nassuiaatitut oqaaseqaatini ilanngullugu erseqqissarneqarpoq allanik piumasagaateqanngitsaq, akuersisummik tunineqarsinnaanermut. Ilutigisaanillu siunnersuummit peerneqarpoq qinnuteqartup akuersisuteqarfigineqarsinnaanermut piumasagaatinik allanik naammassinninnissaa.

2.2.2. Inatsisartut inatsisaannik sanioqutsisinnaaneq

Greenland Airports, GrønlandsBANKEN, Grønlands Erhverv aamma **Qeqertalik Business Council** aamma **Destination Diskobay A/S** innersuussippat isumasioqatigiiffiusumik ataatsimiinnermi ulloq 27. maj 2024 eqqaaneqarmat ukiumut aningaasaliissutit killeqassasut 5.000 kr.-inik takornariartitsisartumut inatsisartut inatsisaata piumasagaataasa avataaniitsitassaanik. Inassutigineqarpoq qaffasissuseq taanna sulii qaffanneqassasoq, qaffasissutut nalilerneqanngimmat, **GrønlandsBANKEN** ilutigisaanik inassuteqarpoq suliffeqarfiit inummit ataasiinnarmit pigineqartut avataaniitsinneqarsinnaanernik takornariartitsisarnerup ukioq tamaat suliffiunnginnerani, pisariitsumillu aaqqissuussisoqarsinnaasoq nalunaarsuiffimmut nalunaartarnissamik, maanna piniarnermut akuersisummik tunineqartarnermut assingusumik.

Nuna Advokatit siunnersuutigaat § 3 -mi ersarissumik aalajangersakkamik sanioqutsisinnaanermut aalajangersagaqassasoq, takornariartitsisarnerit ilaat aalajangersimasut (soorlu kaffisortitsinerit, qilaatersortarneq, uajaartarneq assigisaallu) sillimaniarnermut pilersaaruseriusariaqanngitsut aamma forsikringeqarfiusariaqanngitsut akuersisuteqartarnerup avataaniilersillugit. Taamaalilluni immikkut sanioqutsisinnaanermut periarfissamik atuisinnaaneq annikillineqassaaq, pisunut ilinniagaqarnerup Kalaallit Nunaata avataani pisunut maani

najugaqartussaasariaqannginnernut assigisaannullu, ingasattumillu aqutsisinnaaneq allaffissornerujussuarlu pinngitsoorneqarluni.

Arctic Dream ApS, Nuna Advokater aamma **Danmarks Rejsebureau Forening (DRF)** siunnersuuteqarput ilanngullugu aalajangersakkamik pisinnaatitsissusiisoqassasoq maanna takornariartitsisartut ullumikkut inatsisit iluanni ingerlatsisut piginnittuunissamik piumasqaatinik naammassinninnissaat pisariaarullugu.

Guide to Greenland ApS inassuteqarpoq § 3, imm. 2 -mi ilassusiinissamik ”Kalaallit Nunaanni takornariartitsinermik ingerlatsineq kiffartuussiviusoq Kalaallit Nunaata avataani takornariartunut akuersissummi ilaanngillat”, tamanna inatsisartut inatsisaanni siunertaasimanaviannngimmat, kalaallit angalatitsiviisa angalanernik, assersuutigalugu Island-imut angalanernik nioqqutaat akuersissutinut ilaanissaat. Ilanngullugulu inassutigineqassaaq ilassusiisoqassasoq imaattumik: ”Ussassaarisarneq imaluunniit paasissutissiisarneq takornariartitsisartut kiffartuussisarnerinik takornarianut akuersissuteqarnissamik piumasqaarfiunngilaq”.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermut akissutigineqartut aamma isumasioqatigiilluni oqallitsitsinerit tunuliaqutaralugit siunnersuummi § 3 iluarsissuteqarfigaa, imm. 7-imik ilanngussilluni, akuersissummik peqarnissamik sanioqqutsiffiisinnaasut pillugit. Ilutigisaanik ersarinnerusumik erseqqissaasoqarpoq inatsisip atuuffianik suussusilersuinermillu, ilanngullugu erseqqissaaneq inatsisartut inatsisaat assersuutigalugu atuutinngitsoq kiffartuussinernut Kalaallit Nunaata avataaniittunut atuisartunut, kiisalu inatsisartut inatsisaati aamma atuutinngitsoq takornariartartunut paasissutissiisarnernut kiffartuussisarnerinik. Kiisalu ilanngussisoqarpoq annikitsunut killiliussamik, qaqugukkut takornariartitsisartut inatsisartut inatsisaanni pineqarnerisut pillugu. Tigussaasumik aalajangersagaliortoqarpoq pisartunut inuup imaluunniit inatsisit naapertorlugit inuup ukiumut takornariartitsinermiit isertitaasa 50.000 kr.-it ataallugit annertussuseqartarnerinut.

2.2.3. Piginnaatitsissutip – autorisationip piffissamik killilertarnera pillugu

Greenland Sagalands Qaqortoq Tourist Service oqaaseqarpoq piffissami killilikkami piginnaatitsissusiisarneq aningaasaliissuteqartannginnermik kinguneqarsinnaasoq. **Air Greenland, Arctic Dream ApS, Nuna Advokater** aamma **Topas Explorer Group** siunnersuuteqarput piffissamut killiligaanngitsumut piginnaatitsissummik – autorisationimik akuersissuteqartoqartarnissaanik. Nuna Advokatit aamma Topas Explorer Group siunnersuuteqarput piginnaatitsissut piffissamik killiligaassanngitsoq, kisiannili ukiumoortumik nalunaarusiortarnissamut piumasqaateqassasoq qularnaarumallugu takornariartitsisarnermik ingerlatsinissamut piumasqaatit suli naammassineqartarnerat, naammassinninnginnermilu akuersissummik utertitsisoqarsinnaassasoq. Taamaalilluni nukinnik atuinerujussuaq allaffissornerlu akuersissummik sivitsuisarnermut pinngitsoorneqartassasoq oqaatigineqarpoq, - aamma pissutsit tulluannngitsut akuersissutip atorunnaanngitsoortarneri, aatsaallu kingusinnerusukkut sivitsuisarnerit, allaffissornerikkut sullissinernik sivisuunik kinguneqarsinnaasut pisortani ulapinnernik

pissuteqartartut, maanna ajornartorsiutaasinnaasartut, sivitsuiniartarnernut aatsitassarsiornermiittut aammalu sermimik imermillu iluaquteqarnermiittut.

Inuussutissarsiornermut, Niuernermit, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermiit akissutigineqartut aamma isumasioqatigiilluni oqallitsitsinerit tunuliaqutaralugit inatsisissatut siunnersuummi § 3-mi iluarsisuteqarpoq, imaalillugu maanna § 3, imm. 2, oqaaseqatigiit aappaanni ersersillugu akuersissut piffissamut killiligaanngitsoq. [Tamatumani saniatigut Naalakkersuisoqarfiup peerpaa siunnersuummi § 3, imm. 5 -iusimasoq, piginnaatitsissummut – autorisationi piusumut ilisimatitsinani atorunnaartassasoq takornariartitsisartup takornariartitsineq ingerlatinngippagu akuersissummut killiliussat iluini, ataatsimut ukiup ataatsip iluani.]

2.2.4. Immikkut sanioqqutsisinnaanermut akuersissuteqarsinnaanermut

Albatros Arctic Circle ApS, Arctic Hiking and Expeditions ApS, Grønlands Erhverv, Hotel Hans Egede A/S, Hotel SØMA aamma Indenlandsk Sømandsmission, Topas Explorer Group, Travel by Heart ApS aamma Taavani ApS, Qeqqata Kommuni aamma Visit Greenland oqaaseqarput immikkut sanioqqutsisinnaanernut akuersissuteqarsinnaaneq ersernerluttoq, naliliinertaqarpasilluni assigiinngisitsisinnaanermillu imaqartungalluni. Hotel Hans Egede A/S inassuteqarpoq immikkut sanioqqutsisinnaanermi periaaseq aqunneqassasoq tigussaasunik piumasqaatinik killiliussanik ersarissunik tunngavilimmik komité -mit arlaannannulluunniit atasuunngitsumit, atorfilimmi ataasiinnarmiinnani.

Nuna Advokatit inassutigaaat nassuiaatitut oqaaseqaatini erseqqissaatinik ilanngussisoqarnissaa sanioqqutsisinnaanermut akuersissuteqartarnermut arsaarinnissuteqartarnernullu atasunik.

Sillisit Hostel / Café Thorhildur siunnersuuteqarput ilanngussisoqassasoq periarfissamik immikkut sanioqqutsisinnaanermut qinnuteqartoqarsinnaanngorlugu, najukkani namminerneq neqerooruteqartartunik % -tit aalajangersimasut iluani suleqateqaraanni, kiisalu sulisoqaraanni % -it aalajangersimasut iluanni.

Ilulissat Excursions inassuteqarpoq immikkut sanioqqutsisinnaanermut periarfissaq peerneqassasoq, putunik “iluaquteqarsinnaaneq” ajornanngippallaarmat.

Inuussutissarsiornermut, Niuernermit, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermiit akissutigineqartut aamma isumasioqatigiilluni oqallitsitsinerit tunuliaqutaralugit inatsisissatut siunnersuummi nassuiaatitut oqaaseqaatini iluarsisuteqarpoq, imaalillugu itisilerisoqarluni qaqugukkut sanioqqutsisinqarsinnaanera isumaliutaanersoq. Tamatumunnga oqaatigineqassaaq sanioqqutsisinnaanermik aalajangersagaq periarfissatut isumaliutaammat, pisuni immikkut ittuni, inatsisartut inatsisaanni namminerneq aqqissuutereerseqarsinnaanngitsuni, aammalu naapertuilluannngiffiusuni suliffeqarfiup inatsisartut inatsisaanni aalajangersakkanit qulangersimaneqarnissaa. Kiisalu aamma inatsimmi namminerneq ikkussisoqarnikuuvoq siuliani pineqartunik tunngaveqartuni sanioqqutsisinnaanernik, tak. siulianiittut.

2.2.5. Paasissutissanik avitseqatigiittarneq pillugu

Greenland Sagalands Qaqortoq Tourist Service tapersersuinngilaq takornariartitsisartut paasissutissanik tunniussaqtarnissaannut.

Hotel SØMA aamma **Indenlandsk Sømandsmission** inassuteqarput § 5, imm. 2, peerneqassasoq, imaluunniit paasissutissanik katersisarneq avitsisarnerlu nassuiarneqarnerussasut. **Sulisitsisut** aamma **Kielberg Advokatit**, **Hotel Nordbo A/S** sinnerlugu oqaaseqarpoq aalajangersagaq taamaallaat atuuttariaqartoq paasissutissanut naapertuuttumik avinneqarsinnaasunut. **Hotel Hans Egede A/S** siunnersuuteqarpoq sinnersuummi immikkuualuttortalersuisoqassasoq paasissutissat suunerinik, atortuulersitsisoqassasorlu isumannaallisaarnernik annertunerusunik paasissutissanik suliaqtarnernut atatillugu. **Nuna Advokatit** siunnersuutigaat erseqqissaanissaq paasissutissanik avitsisarnerup kisitsisinut paasissutissanut tunngasuuneranik. **Travel by Heart ApS** aamma **Taavani ApS** isumaqarput paasissutissanik avitseqatigiittarnermut oqaasertaliussat iluarsineqassasut, matumani taamaallaat pineqartut paasissutissat kinaassuseqanngitsut pisortani oqartussanut tunniunneqartarnissaat, tamakkua pisariaqarfiini.

Grønlands Erhverv, **Albatros Arctic Circle ApS** aamma **Travel by Heart ApS** aamma **Taavani ApS** oqaaseqarput immikkut tunngavissanik tunngavilersorluagaasunik soqanngitsoq Namminersorlutik Oqartussani ingerlatsivinnut avitseqateqartarnissanut, tamannalu unammilleqatigiinnermik innarliinerusinnaasoq.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermi oqaaseqaatit tiguneqartut tunuliaqutaralugit aalajangersakkamik iluarsivoq, tassanilu erseqqissarneqarluni pisuni qanoq ittuni paasissutissanik avitsisoqarsinnaanersoq. Tamatuma kinguneraa pisuni marluinnarni paasissutissanik avitsisoqarsinnaanera. Siullermi pineqarpoq paasissutissanik avitsisarneq pisortanut kisitsisinik paasissutissanik suliaqtarnernut atasunik. Aappaani pineqarput paasissutissanik avitsisarneq suliasanik ingerlatitseqqittoqartillugu akuersissummut atasumik suliaqtarnermi, taamaallaallu pisortani oqartussanut imaluunniit Namminersorlutik Oqartussat suliffeqarfiutaannut, pisussaaffimmik tunineqarsimasumut Naalakkersuisunit, siunnersuummi § 7, imm. 1 naapertorlugu. Taamaalilluni inerteqqutaavoq ilaatigut paasissutissanik avitsisinnaaneq Namminersorlutik Oqartussat suliffeqarfiutaannut allanut, unammilleqatigiinnermi innarliisinnaasunut, soorluttaaq paasissutissanik taamaallaat avitsisoqarsinnaasoq akuersissuteqartitsinermik aaqqissuussinernut attuumassuteqartuni.

2.3. Kapitalimut 2 -mut: Umiarsuarnut takornariartaatinut atuutinngitsunut

Ineqarnermut Attaveqaasersuutinullu Naalakkersuisoqarfiup oqaatigaa oqaatsit "Kalaallit Nunaannut utimullu" aalajangersakkamit peerneqartussatut isumaliutigineqarsinnaasut, nalornissutinik arlaqartunik qulaarissoqassammat. Ilanngullugulu Naalakkersuisoqarfiup aamma oqaatigaa silaannakkut angallassissut nalinginnaasumik paasinninnermiit taaneqarsinnaasoq "angallassissut motorilik", kisiannili siunnersuummi umiarsuit pillugit aalajangersagaqarnissaa siunertaasutut ittoq, imaluunniit apeqqutaanersoq silaannakkut angallassissut Kalaallit Nunaanniit nunanut allanut ingerlasarnersoq imaluunniit Kalaallit Nunaata iluaniinnaq.

Blue Water Greenland aamma Eimskip Greenland malugeqqusipput umiarsuarnik takornariartaatinik angallassineq aamma Kalaallit Nunaanniit aallartittarlunilu naasarmat, **Guide to Greenland ApS -ilu** oqaaseqarluni inatsimmut nassuiaatitut oqaaseqaatit naapertorlugit nalorninaateqarmat umiarsuit takornariartaatit ilaasunik nunaliaassisarsinnaanerit, akuerisaasumik takornariartitsisartumik kiffartuussinermik tigusisoqartanngippat. Taamaattumik immikkuualuttortalersullaqqunarpoq ingerlatseqatigiiffiup nunanit allaneersup akuersissuteqarnissamik qanoq ittumik qinnuteqartarnissaa, najukkami neqerooruteqarsinnaasut kiffartuussinissamik periarfissaanngippata. Ataatsimut kissaatiginarnerussaaq umiarsuit takornariartaatit tikittarneri qitiusumiit ataqatigiissaarneqartarnissaat, umiarsuillu taamaasillutik qaqugu tikinnissamik innersuunneqartarnissaat, anguniarneqarlunilu sapinngisamik umiarsuit amerlanerpaat ullormut tikisinneqartarnissaat.

AECO -p iluarisimaarpaa siunnersuummi umiarsuarnik takornariartaatinik ingerlatsisut pineqannginneri. Taamaattoq oqaatigineqarpoq umiarsuit ilisimasassarsiorlutik angalasartuni taamaallaat pineqanngimmata ilaasunik angallassinerit, ilaqarmatali aamma inoqarfinnut akunnittarnernik, pinngortitami akunnittarnernik umiarsuarniillu ingerlatsisarnernik aamma nunami, sillimaniarnikkut, avatangiisinillu qaffasissumik aallussiviusunik, ornitaniillu paasisassasiortarnernik. AECO siunnersuuteqarpoq oqaasertani aamma nassuiaatitut oqaaseqaatini erseqqissaasoqarnissaanik, pineqanngimmata umiarsuarnik ”takornariartaatinik ingerlatsisusartut / aaqqissuussisartut”, erseqqissilluinnarumallugu nalorninaatsumik akuersissuteqartarnerni umiarsuit takornariartaatit taakkunungalugu atatillugu ingerlatsinerit, umiarsuarni namminerni taakkunaniillu.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermit akissutit tiguneqartut tunuliaqutaralugit aalajangersagaq iluarsiivigaa, erseqqissarlugulu aalajangersakkap suna atuuffigineraa. Ilanngullugu aalajangersagaq annertusineqarpoq inunnik assartuinermut, kisianni toqqaannartumik takornariartitsinernik ingerlatsinerit Kalaallit Nunaanni namminermi tassungalugu atasuni attuumassuteqarani. Taamaasilluni aamma atuutilissaaq assersuutigalugu Kalaallit Nunaanni mittarfimmiit akunnittarfimmut utimullu.

Ilulissat Excursions kissaateqarpoq minnerpaaffissatut piumasaqaatip inunnut allattorsimaffimmi allassimasarnissamut ukiunut 10-nut inissinneqassasoq, kiisalu piumasaqaataassasoq suliffeqarfimmik piginittut 100 % Kalaallit Nunaanni najugaqassasut. **Greenland Sagalands Qaqortoq Tourist Service** oqaaseqarpoq suliffeqarfik najukkami najugalinnit akileraartartunit pigineqartassasoq, taamatullu eqqarsarneq tapersersugassaallunilu pissusissamisoortoq.

Nanortalik Serano Boat Tours oqaaseqarpoq ammaffigineqartoq taamaallaat sumiiffimmi najugallit takornariartitsinermik ingerlatsisusarnissaat, kisiannili pisariaqartitsisoqartoq avataaneersunik suleqateqarnermik.

Avannaata Kommuniata oqaatigaa kommunalbestyrelsip tungaaniit kikkut piginnittuunissaannik siunnersuut naammagisimaarneqartoq, taamaattorli ernummataasinnaasoq inatsisartut inatsisaanni putunik immikkut aaqqissuussinernut ammasoqarsinnaanera.

Ineqarnermut Attaveqaasersuutinullu Naalakkersuisoqarfiup nunatsinni takornariartitsinermik inuussutissarsiutit ineriartornerat tunuliaqutaralugu pisariaqartippaa nunanit allaniit aningaasaliisarneq, siunnersuutigalugulu isumaliutigineqaqqullugu sinnersuummi piomasaaqaataassanngitsoq aningaasaliisartut Kalaallit Nunaanni najugaqartarnissaat, kisiannili siunnersuummi allanneqassasoq takornariartitsinermi isertitat Kalaallit Nunaanni aningaasaliissutigineqaqqittarnissaat. Tamatumunnga atatillugu isumaliutigineqarsinnaavoq siunnersuuteqarsinnaaneq sinneqartoorutit minnerpaamik 50 procentiisa aningaasaliisut Kalaallit Nunaanni najugaqarsimangippata Kalaallit Nunaanni aningaasaliissutigeqqinneqartassasut.

Ineqarnermut Attaveqaasersuutinullu Naalakkersuisoqarfiup ilanngullugu aamma oqaatigaa Kalaallit Nunaanni inuit allattorsimaffianni najugaqartutut nalunaarsorsimanissamik piomasaaqaat ajornartorsiutitalinnik kinguneqarsinnaasoq. Eqqaaneqartut siunnersuut taamaasilluni killilersuissaaq kikkut Kalaallit Nunaanni unnuisarfeqarnermut ineriartortitsinermi aningaasalersuisinnaanerannik. Inuk nammineq inuunermini pissutsinik tunngaveqarluni piffissami aalajangersimasumi pisariaqartitsilersimaguni Kalaallit Nunaata avataani najugaqarnissamut, tamatumani ajornartorsiuteqalissaaq, tamanna siunnersuut naapertorlugu sunniuteqassammat pineqartup akuersissummik tigumminiinnarsinnaaneranut takornariartitsinermik ingerlatsiniarluni, imaluunniit akuersissummik utertitseqqinniarluni.

Ineqarnermut Attaveqaasersuutinullu Naalakkersuisoqarfiup takorusukkaluarppaa siunnersuummut nassuiaatitut oqaaseqaatini takinerusumik nalilersuisoqarnissaa, nassuiaasumik sooq inatsisartut inatsisaat naapertorlugu akuliunneq arsaarinnertut igineqanngitsoq pillugu.

Kommune Qeqertalik, , AECO, Guide to Greenland ApS, Hotel SØMA og Indenlandsk Søndsmision, Trophy Huntin Greenland, Arctic Dream ApS, Kielberg Advokatit, sinnerlugu Hotel Nordbo A/S, Grønlands Revision, Ilulissat Guesthouse aamma Ilulissat Adventure, Topas Explorer Group, Albatros Arctic Circle ApS, Innovation South Greenland A/S, Greenland Airports, Grønlands Erhverv, Nuna Advokater, Travel by Heart ApS aamma Taavani ApS, Sermilik Adventures ApS, Arctic Dream ApS aamma Tasiilaq Tours (Visit East Greenland), Arctic Circle Business, Arctic Hiking and Expeditions ApS, GrønlandsBANKEN, Nalik Ventures, Nomad Greenland, Hotel Hans Egede A/S, SIK aamma Visit Greenland tamarmik oqaaseqarput ernummatigalugu sinnersuummi najugaqartuunissamik piomasaaqaataasoq. Tamatumunnga ingammik ernumanermut pissutaapput siunnersuummi piomasaaqatigineqartoq minnerpaanik ingerlatseqatigiiffimmik piginnittuusut 2/ 3- iisa toqqaannartumik imaluunniit toqqaannanngitsumik inunnit ataasiakkaanit Kalaallit Nunaanni inuit allattorsimaffianni nalunaarsorsimasunit pigineqartuunissaannik, aammalu tamakkiisumik Kalaallit Nunaanni akileraartartuunissaannik piomasaaqaat. Oqaatigineqarpoq najugaqartuunissamik piomasaaqaat takornariartitsinermik inuussutissarsiummut pitsaanngitsunik kinguneqassasoq, ilanngullugit takornariartitsinermut atasunik inuussutissarsiutinut aammalu inuiaqatigiinnut ataatsimut isigisumik. Oqaatigineqarpoq piomasaaqaat pineqartoq nunatsinni takornariartitsinerup siuariartorfiuneranik akornusiissasoq, ilaatigullu niuerfiusunik annertusiartortitsinermut akornutaalluni, suliffeqarfinnik avataaneersunik mattussinikkut. Tamaanna ilaatigut killiliissaaq pisariaqartunik aningaasaliisussanut aqqummik, aammalu immikkut ilisimasalinnut nunanit allaneersunut aningaasaliisartunut. Ilanngullugulu oqaatigineqarpoq piomasaaqaatip kingunerissagaa periarfissaajunnaassasoq takornariartitsisartut maanna ingerlatsisuusut neqeroorsinnaaneritut,

naatsorsuutigisariaqartorlu piumasaqaatip suliffeqarfinnik annaasaqarneq kingunerissagaa. Akornutaassaaq aningaasalersuinerlut aningaasarsiornermullu Kalaallit Nunaanni nunatsinnilu najukkani assigiinngitsuni, nunanit tamalaanit ullumikkut takornariartitsisarnikkut suleqatigineqartunut. **Arctic Circle Business** oqaaseqarpoq suliffeqarfiit ingerlaannarsinnaanerminnik navianartorsiortinneqalersinnaassut, soorluttaaq malugeqquneqartoq inuussutissarsiutit sammiviini amerlasuuni allani, soorlu aningaaserivinnut piumasaqaateqanngitsoq maani najugaqartuunissaq. **Hotel Hans Egede A/S -ip** oqaatigaa siunnersuutip kingunerigaa takornariartitsisarnernik suliffeqarfiit maanna piusut annertoorujussuarmik nalikillineqalersut, nioqqutigineqarsinnaajunnaassagamik killilersorneqarnermik annertoorujussuarmik nutaanik piginnittoqalersinnaanikkut aningaasalersuisoqarsinnaanikkulluunniit eqqorneqassagamik.

Danmarks Rejsebureau Forening (DRF), Grønlands Erhverv, Hotel Hans Egede A/S, Kielberg Advokatit, sinnerlugit Hotel Nordbo A/S aamma Nuna Advokatit oqaatigaat tamatumunnga atatillugu isumaqarlutik najugaqartuunissamik piumasaqaat arsaarinninnertut isikkoqartoq, maanna piginnittuusut pinngitsaalineqassammata pigisaminnik tamakkiisumik ilaannakuusumilluunniit arsaarneqarnissamik, suliffeqarfiup nioqqutigineqarsinnaanerata nalikillerujussuarneratigut, taamalu annertoorujussuarnik annaasaqassallutik.

Visit Greenland ilanngullugu oqaaseqarpoq piginnittuunissamik piumasaqaatip tunngavissaqartilissagaa inatsisinik saneqqutsiniartuarneq, nunanit allaneersut aningaasaliisartut piginnittuunerminnik toqqorterilernerisigut, najukkani namminerni siuttulersornikkut, tamatumalu piumasaqaatip siunertaa aserortissagaa. **Sulisitsisut** oqaatigaat siunnersuutip assigiinngisitsineq eqqutissagaa, inatsisinik unioqqutitsinerusinnaasoq innersuullugulu Island-imi takornariartitsinermut inatsimmi taamaattumik najugaqartuunissamat piumasaqaammik aalajangersagaqanngimmat, kisiannili taamaallaat piumasaqaateqarluni ingerlatseqatigiiffiup (inuk inatsisitigut pisinnaatitaasoq) akuersissummik qinnuteqartoq EØS-ip iluani angerlarsimaffeqartuussasoq.

Innovation South Greenland A/S oqaaseqarpoq piumasaqaammik anguniagaq naammassineqanngitsutut ittoq, aammalu naatsorsuutigineqarsinnaasoq suliffeqarfeqarsinnaanera najugaqartuunissamat piumasaqaammik naammassinnittunik, kisiannili nunani allaneersunik sulisussaminnik amerlasuunik atorfinitsitsisartunik, paarlattuanilli takornariartitsinermi ingerlatsiveqarsinnaallunissaq piumasaqaatinik naammassinninngitsunik, kisiannili atorfinitsitsisartunik maani najugalinnik amerlasuunik imaluunniit maaniamiuinnarnik.

Sulisitsisut oqaatigaat inatsisartut inatsisaanni siunertaasimappat iluanaarutini avammut annissuinerup annikinnerulersinneqarnissaa, taava inatsiseqareersoq tamakkuninnga isiginiaasunik. **Danmarks Rejsebureau Forening (DRF) aamma Nuna Advokatit** oqaatigaat siunnersuummi siunertaappat Kalaallit Nunaannut akileraartarnissamik qularnaariniarneq, tamanna suliarineqarluarsinnaasoq taamak annertutigisumik akulerunnani, piginnittuunermut aamma taasisinnaanermut pisinnaatitaaffiliornermiit, kiisalu ingerlatseqatigiiffiit akileraartussaanerat qularnaarneqareermat ingerlatseqatigiiffiit Kalaallit Nunaanni angerlarsimaffeqarnissaannik piumasaqaatikkut.

Greenland Airports, Nalik Ventures, aamma **Nomad Greenland** inassuteqarput najugaqartuunissamik piumasaqaat aalajangersarneqassasoq 49-51% -inut.

Sulisitsisut aamma **Hotel SØMA** aamma **Indenlandsk Søndagsmission** inassuteqarput aalajangersakkat peerneqarnissaannik. **Danmarks Rejsebureau Forening (DRF)** aamma **Sulisitsisut** tamatumunnga oqaaseqarput taarsiullugu aallunneqartariaqartoq ingerlatseqatigiiffiit angerlarsimaffii, aammalu piumasaqaat, tamanna aalajangiusimaneqassapput qaffasissusilertariaqartoq 2/3 -imiit appasinnerungaatsiartumik, matumani aamma arsaarinnissinnaaneq pinngitsoorumallugu.

Danmarks Rejsebureau Forening (DRF), **Grønlands Revision** aamma **Nuna Advokatit** aamma inassutigaaat piginnittuunissamik piumasaqaatit siunnersuummiit peerneqarnissaat, immaqalu taarserneqarlutik ingerlatseqatigiiffiup aqutsisuinut piumasaqaatinik, sulii kissaatigineqarsimappat maanga atasuunissaq. Taamaasilluni siunnersuutigineqarpoq piumasaqaateqartoqarnissaa aqutsisuusut Kalaallit Nunaanni issiassasut (aatsitassanut inatsimmi § 45, imm. 2 -p 1/1 2024 atortuulersup assigisaanik), ilaatigut pissutigalugu ulluinnarni aqutsisut ingerlatsinernut akisussaanagerat).

Mittarfeqarfiit - Greenland Airports siunnersuuteqarput siunnersuummi § 9, imm. 5, allangortinneqassasoq taarsiullugulu pisortaanerup Kalaallit Nunaanni inissisimanissaanik taarserlugu. Ilutigisaanik siunnersuutigineqarpoq eqqussisoqarsinnaasoq akileraartitsisarnermik assigiinngiiaartumik, piginnittup Kalaallit Nunaanni imaluunniit nunani allani najugaqarneranik aallaaveqartumik. Tamanna taarsiullugu atorneqarsinnaavoq aqutsinermi piginnittup sumi najugaqarnissaanik tunngaveqanngitsumi, imaluunniit ilassutitut. Assigiinngiiaartunik akileraartitsisarnermik aqqissuussineq kaammattuutaasinnaavoq piginnittup Kalaallit Nunaanni najugaqarnissaanut.

Arctic Dream ApS inassuteqarpoq ataatsimut isiginiarneqassasoq suliffeqarfiup qanoq inuiaqatigiinnut tunniussaqtarneranik (assersuutigalugu najukkami il.il. najugaqartut amerlasinnaammata, naak assersuutigalugu piginnittut Danmark-imi najugaqaraluartut). Assersuutigalugu point-inik aqqissuussineq New Zealand -imik isumassarsiorfilik, sumi najugaqartuunermik kinaanermilluunniit imaqqanngitsoq, kisiannili piujuaannartitsisumik aningaasalersuineq ileqqorissaarnissamullu malittarisassaqqarfiusoq.

GrønlandsBANKEN aamma **Topas Explorer Group** siunnersuuteqarput piginnittuunermut taarsiullugu isiginiarneqassasoq najukkani sulisunik atuneq, najukkami inissisimasunik peqatigiinnernik ingerlatsineq annertusisamillu ilinniartitaaneq piginnaasanillu inerisaanik kalaallini sulisorineqartuni. **Hotel Hans Egede A/S** sakkortuumik inassuteqarpoq piumasaqaat isumaliutigeqqeqqullugu, taartitullu siunnersuutigalugu qiimmassaatinik aningaasarsiornikkut ilinniartitaanikkut aamma ineriartortitsinikkut eqqussisoqaqqullugu. **Travel by Heart ApS** aamma **Taavani ApS** siunnersuuteqarput taarsiullugu piumasaqaataasinnaasoq takornariartitsisarnermik ingerlatsivittut imaluunniit takornariartitsisartutut akuersissummik pissarsisoqartassasoq, minnerpaamik najukkani namminerni sulisuusut XX 5 -iinik atuisoqartassasoq (najugaqartut angallatinik ingerlatsisartut, qimussiussisartut, issittumi takornariartitsisartut ilinniagaqarsimasut il.il.), Kalaallit Nunaanni aalajangersimasumik najugaqartut. **Sermilik Adventures ApS**, **Arctic Dream ApS** aamma **Tasiilaq Tours (Visit East Greenland)** kissaateqarput isiginiarneqassasut takornariartitsisartunik pisuttuurtitsisartunik ilinniartitsisoqarnissaanik, ukiut 3 iluanni

ikaarsaariartortoqarsinnaaqullugu, pisuttuarlutik takornariartartut tamarmik maani najugalinnik angallassisoqartalersikkumallugit.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup tusarniaanermut akissutigineqartut aamma isumasioqatigiilluni oqallitsitsinerit tunuliaqutaralugit aalajangersagaq iluarsisuteqarfigaa, tamatumunnga nassuiaatitit oqaaseqaatit ilanngullugit. [Ilaatigut Naalackersuisoqarfiup najugaqartuunissamik piumasaqaat iluarsivigaa, imaalillu piumasaqaataassanngitsoq piginnittut 2/3 -iisa Kalaallit Nunaanni inuit allattorsimaffianni allassimassasut. Taarsiullugu piumasaqaataassaaq ingerlatseqatigiiffiup affaanit amerlanerusunut atuuttuusoq.

2.5. Kapitali 4 -amut: Sillimaniarnermut pilersaarusi

Ineqarnermut Attaveqaasersuutinullu Naalackersuisoqarfiup oqaatiga maluginiarsimallugu isumasioqatigiilluni oqallitsitsiviusumik ataatsimiinnermi oqaatigineqartoq siunnersuut allaqqinneqassasoq, imaalillugu inuussutissarsiortup pineqartup ataatsip sillimaniarnikkut pilersaarutai taamaallaat isiginiaasussasut aarlerinaatinik/ ulorianartunik misigisarsiornermi pineqartumut inuussutissarsiortup neqeroorutigisaanut atasunik, taamaallaallu immersugassanik pisariitsunik immersuisoqartartussaassasoq, sammisat ingerlanneqarumaartut ulorianartortaqaqqippata takornariartunut. Ilutigisaanik oqaatigineqarpoq paasinninnerusoq inuussutissarsiortunut periarfissaassasoq sillimaniarnikkut piumasaqaatinik sanioqutsisinnaanermik qinnuteqarsinnaaneq, ingerlatassat pineqartut arlaatigulluunniit ulorianaateqaqqippata.

Nalik Ventures oqaaseqarpoq siunnersuummi iliuusissat sillimaniarnermut tunngasut Nalik Ventures -imut paasinarluinnartut, ileqqussanullu pitsaasunut naapertuulluarlutik.

Air Greenland oqaaseqarpoq aqqissuussinermi sillimaniarnikkut iliuusissanut piumasaqaatit ingerlanneqartussanut naapertuuttuusariaqartut. **Qeqqata Kommuni** oqaaseqarpoq isumaliutigisariaqartoq allaffissornerup annertussusissaa, najukkani ingerlatsisussanut pisussaaffiliunneqartussa q inassutigalugu sillimaniarnikkut pilersaarutit pisariaqarfiisigut taamaallaat nutarterneqartassasut”.

Sermilik Adventures ApS, Arctic Dream ApS aamma Tasiilaq Tours (Visit East Greenland), Greenland Sagalands Qaqortoq Tourist Service aamma **Hotel Hans Egede A/S** oqaaseqarput sillimaniarnermut ilitsersuutinik peqareersoq, suliassaqaarfimmut atuuttunik, assersuutigalugu imaatigut angalanernut, unnuisarfeqarnernut neriniartarfinnullu, qatserisartunit ajunaarnersuaqartillugulu suliassanut immikkut ilisimasalinniit akuerineqartartunik. Arctic Dream ApS inassuteqarpoq aamma sillimaniarnikkut pilersaarussianut nutserneqartartunut taarsiullugit ingerlatsisup qupperagaani nalunaarneqarsinnaasoq pilersaarutit akuerisaanerat.

Visit greenland oqaaseqarpoq pisariaqartoq ersarissunik malittarisassaqaarnissaq, kia imaluunniit oqartussat kikkut ikiuussinnaanerinut immersuineri sillimaniarnermut ilitsersuutinik, taavalu **Hotel SØMA aamma Indenlandsk Søndsmision** inassuteqarlutik ilitsersuusiortoqassasoq suliffeqarfimmut ikiuutaasussanik inatsisartut inatsisaanni piumasaqaatinik naammassinninnissanut,

minnerunngitsumik sillimaniarnermut tunngasuni. **Arctic Hiking and Expeditions ApS** oqaaseqarpoq aamma erseqqissallaqullugu kia sillimaniarnermut pilersaarusiart misissortussaanagerai akuerisussaanageraalu pillugit, aammalu qanoq taakkua toqqortarineqartassanersut pillugu.

Arctic Circle Business aamma **Qeqertalik Business Council & Destination Diskobay A/S** isumaqatigiipput Kalaallit Nunaanni takornariartitsineri pilersaarusiart pingaaruteqartut, kisiannili inassutigaaat assigiissaakkanik sillimaniarnermut pilersaarutinik suliaqartoqassasoq, takornariartitseriaatsinut assigiinngitsunut, assersuutigalugu imaani ingerlatanut, qimussiussisartunut imaluunniit akunnittarfinnut, quppersakkami aaneqarsinnaasussanik pisariaqartinneqarpata.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup tusarniaanermut akissutigineqartut aamma isumasioqatigiilluni oqallitsitsinerit tunuliaqutaralugit aalajangersagaq iluarsiiisuteqarfigaa, nassuiaatitut oqaaseqaatit ilanngullugit, annerusumik isiginiarumallugit navianartut suut takornariartitsineri pineqartuni ilaasinnaanersut, allaffissorneq tamatumunnga atasoq oqinneroqqullugu. Aalajangersagaq iluarsiiisuteqarfigineqarpoq ilaatigut sillimaniarnermut pilersaarusiart suerullugu takornariartitsineri sillimaniarnermut pilersaaruteqarfioreersuni, ingerlatanut atuuttunik, soorluttaaq erseqqissarneqartoq aalajangersakkamik sanioqutsisoqarsinnaasasoq ingerlatani ulorianaateqanngitsuni. Taassumap saniatigut qinnuteqarnissamut atatillugu Naalackersuisunit tunniunneqarluni immersugassamik qinnuteqartup immeruineratigut, isumannaallisaanissamut pilersaaruteqarnissaanik piimasaqaat naammassineqassasoq oqaaseqaatini ersarissarneqarpoq.

2.6. Kapitalimut 5 -imut: Matussutissanik sillimasiisarneq aamma allatigut qularnaveeqqusiisarneq

2.6.1. Objektiviusumik akisussaaffik pillugu (§ 11):

Ineqarnermut Attaveqaasersuutinullu Naalackersuisoqarfik, Hotel SØMA aamma Indenlandsk Sømandsmission, Kielberg Advokatit, sinnerlugit Hotel Nordbo A/S aamma Qeqqata Kommuni oqaaseqarput objektiviusumik akisussaaneq pissusissamisuunngitsoq, inassutigaaallu qulaajarneqassasoq inatsisini allani aalajangersaasoqareersimanersoq atuuttunik, kiisalu aamma inatsisit allat ilannguteqqullugit (nioqqutissiornermut inatsit, pisiniartarnermut inatsit, imarsiornermut inatsit, avatangiisinut inatsit il.il.) taarsiisuteqartussaaneq malittarisassaqaartikkumallugu. **Forsikring & Pension (F&P)** oqaaseqarput namminneq aamma ernummatigigitsik inatsisartut inatsisaanni §§ 11 aamma 12, taakkua kingunerimmassuk inatsisit naapertorlugit pisussaaffiit, killiligaanngitsunik akisussaaneqarnermut sillimmasersorsimanissamut, suussusilersoreeraanngitsunut ajoqusiinermut matussusiisnaasussat (assersuutigalugit inuit ajoquserneri aamma avatangiisinik ajoqusiinerit) objektiviusumik tunngavilinnik. **Hotel Hans Egede A/S** aamma **Kielberg Advokatit, sinnerlugu Hotel Nordbo A/S** inassuteqarput inatsisiliorneq naleqqussarneqassasoq inuussutissarsiiummi pineqartumi aarlerinaatinut atuuttunut, pinngitsoorumallugu naapertuilluunngitsunik sillimasiisarnerit aamma akisussaaffinnik tiguisinnaaneq, objektiviusumik akisussaaffik nalinginnaasumik sammitinneqartarmat

suliffeqarfinnut, isigineqartunut qaffasissumik nalorninaateqarsinnaasutut, taamaattumillu objektiviusumik akisussaaniisaq ingasattajaarnerussalluni.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermut akissutigineqartut aamma isumasioqatigiilluni oqallitsitsinerit tunuliaqutaralugit nalilersimavaa siunnersuummi § 11 peerneqassasoq. Taarsiissuteqarnissamut akisussaassuseqarneq taamaalilluni taarsiissuteqartarnernut nalinginnaasunik malittarisassanut atalissaaq, kiisalu taamaassimatillugu ingerlatsinernut pineqartunut atasunik inatsisitigut aqutsinernit allanit aamma.

2.6.2 Sillimmasiisarnermi matussutissaqarneq (§ 12):

Ineqarnermut, Attaveqaasersuutinullu Naalakkersuisoqarfik, Arctic Hiking and Expeditions ApS aamma Travel by Heart ApS og Taavani ApS oqaaseqarput isumaqatigigitsik piumasaaqat takornariartitsisartup takornariartitsinernik ingerlatsineri ilaareertartut akisussaaffik pillugu sillimmasiissutini imaluunniit allatigut qularnaveeqqusissutini. **Travel by Heart ApS og Taavani ApS** tamatumunnga oqaaseqarput iluaqusiisussamik misissorneqarsinnaasoq takornariat tikeraartut angalanermut ajutoorsinnaanermullu sillimmaseereertarsinnaanerat, Kalaallit Nunaannut isinnginnermili.

Air Greenland Forsikring & Pension (F&P), Illit Forsikringit Agentur A/S, Visit Greenland aamma Qeqqata Kommuni oqaaseqarput ingerlatsisut assigiinngitsut unammilligassaqalersinnaasut sillimmasiiniarnermi matussusiisinnaasunik nioqqutinut neqeroortiginiaakkaminnut atatillugu. Tamanna assersuutigalugu qimussiussisarnernut atuuppoq, sillimmasiisnaanernik atuuttunik peqarunangimmat, taamalu takornariarnernik nioqquteqartartut taakkua akuersissummik tunineqarsinnaassanatik. **Visit Greenland** aamma **Air Greenland** tamatumunnga atatillugu oqaaseqarput misissullaqullugu sillimmasiisarnerit piumasaaqataasut ilumut periarfissaariinnginnersut suliffeqarfinnut. **Illit Forsikringit Agentur A/S** oqaaseqarpoq siunnersuutaasinnaasoq inuussutissarsiummi akisussaasuunnginnermut immersugassaliortoqarsinnaanera, takornariartartut amerlanerpaat nunarsuup ilaani allani aamma misigisariigaattut, nalorninaatilinnik sunnguanilluunniit ingerlatsisussaqaalersillugu atortussanik.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermut akissutigineqartut aamma isumasioqatigiilluni oqallitsitsinerit tunuliaqutaralugit siunnersuummi § 12 -imi iluarsiissuteqarpoq sillimmasiissutit matussusiisinnaasut allatigulluunniit qularnaveeqqusiisutaasartut pillugit, isiginiarneqaaqqullugu ingerlatsisoqarsinnaanera sammisanik sillimmaserneqarsinnaanngitsunik, taamaattunik neqeroortoqanngimmat. Naalakkersuisoqarfiup suliffeqarfinnut namminernut pisussaaffiutinniarpaa akisussaanninngineq pillugu immersortagaqassanersoq. Tunngavigineqassaaq suliffeqarfiit taamaattunik pineqartunik atuisinnaajumaartut qularnaartassagaat pineqartut inatsisit atuuttut iluanniinneri aammalu sillimmasiisarnermut atugassarititaasut iluaniinneri. Ilanngullugulu Naalakkersuisoqarfiup oqaatigissavaa siunnersuut manna taamaallaat siunertaqarmat takornariartortitsisartunik aqutsinermik, taamaattumillu aalajangersagaqassanani takornariartartunut atugaasut pillugit.

Suliffeqarfiit pineqartut namminneq pisussaaffigissavaat nalilersortassallugu ajunaarsinnaanermut takornarianut sillimmasiisoqartassanersoq.

2.7. Kapitalimut 6 -imut: Piujuaannartitsineq

Hotel Hans Egede A/S aamma **Hotel SØMA** aamma **Indenlandsk Søndandsmission** oqaaseqarput piujuaannartitsinermut atatillugu piumasaqaataasut sapinngisamik annertunerpaamik objektiiviusariaqartut tigussaallutillu, ersinngitsorlu piumasaqaatit suut naammassineqarsimassanersut piujuaannartitsinermi piumasaqaatit naammassiumallugit. **Hotel Hans Egede A/S** ilanngullugu oqaaseqarpoq malittarisassat tassaassanngitsut aporfissat suliffeqarfiit ingerlatsinerannut, taarsiulluguli kaammattuutaassasut qiimmassaatit, akileraartarnikkut annikinnerusunik akiliuteqarsinnaanernut aqutissiuissusut imaluunniit allatigut aningaasatigut iluaqutaasussat.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup tusarniaanermi akissutigineqartut aamma isumasioqatigiilluni oqallitsitsinerit tunuliaqutaralugit nalilersimavaa ajornakusoortoq ersarissunik piujuaannartitsinermut inatsisitigut killiliussaliorinnaaneq, ilaatigut pissutigalugu ajornakusoorat tigussaasunik kinaassusersiunngitsunillu atugassaliorinnaaneq, takornariartitsinermik ingerlatsisunit eqqortinneqarsinnaasunik. Taamaattumik aalajangersagaq siunnersuummit peerneqarpoq. Naalackersuisoqarfiullu taarsiullugu isumaliutiginiarpaa qanoq aaqqissuussinikkut pitsaanerusumik piujuaannartitsineq nukittorsarneqarsinnaanersoq.

2.8. Kapitalimut 7 -imut: Pisortat aningaasartuutaasa taarserneqartarnerat

Visit Greenland oqaaseqarpoq aallarnisaasunut akuersissummik qinnuteqaasiormi aningaasartuutit oqimaarsaataasinnaasut annertuut, minnerunngitsumik aallartikkiartuaarnermi, nukit / aningaasat atugassat killeqarfigisaanni. Aallarnisaasut aallartinniarnermi aningaasatigut amerlasuunik unammilligassaqaareertarput. Visit Greenland inassuteqarpoq akitsuummumt atatillugu minnerpaaffissalisoqassasoq, suliffeqarfiit angissusiat imaluunniit kaaviiartitaat tunngavilugit, suliffeqarfiit minnerusut minnerusumik akiliuteqartittarlugit. Ilanngullugulu inassutigineqarpoq immikkut tapiissuteqartarnermik aaqqissuussineq aallarterlaanut / takornariartitsisartunut mikisunut, matussutissanik akuersissummik suliaqarnermut certifikatiliormullu.

Arctic Circle Business, Greenland Sagalands Qaqortoq Tourist Service, Ilulissat Excursions aamma Travel by Heart ApS aamma **Taavani ApS** tapersinngilaat aammaarluni suliffeqarfinnut allaffissornikkut nammatassiiniarneq, takornariartitsinernut iluaqutaanngitsumik, aammalu suliffeqarfiit suliffeqarfiutiminniit akileraartartooremata. **Travel by Heart ApS** aamma **Taavani ApS** inassuteqarput taarsiullugu akitsuummik eqqussisoqassasoq umiarsuarnut takornariartaatinut ilaasut akilertagaattulli, ingerlatsinikkaartunik, akuersissummumt qinnuteqaammumt akiliutaasussamik, nutarterinerusinnaasunut nalunaarusiortarnernullu nalunaarummi inatsisartut inatsisaannik tunngavilimmi kingorna suliarineqartussanut.

Ineqarnermut, Attaveqaasersuutinullu Naalackersuisoqarfiup ujartorpai inatsimmumt nassuiaatit oqaaseqaatit itisilerinerusut, tamatumani aamma sooq akitsuummik taaguutip

inatsisigullu ileqqut eqqortinneqartutut isigineqarneri, soorluttaaq inassutigineqartoq, inatsisip oqaasertalersorneranik paasissutissiinissaq. **Innovation South Greenland A/S** ujartuivoq aamma paasissutissanik annertunerusunik aningaasartuutissat annertussusissaannut, akinut qaffakkiartortunut periarfissanik, taavalu **Hotel Hans Egede A/S** inassuteqarluni saniatigut nalunaarummik suliartoqassasoq, tassanilu ersissasut akuersissut qanoq akeqartussatut naatsorsuutigineqarnerisq.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarsimavai tusarniaanermi oqaaseqaatit tiguneqartut. Naalakkersuisoqarfiup malugaa naapertuuttumik periaaseqartoqartoq inatsisini allani aalajangersakkanik akitsuusiisarnernut pisortat sullissisarnerini qinnuteqaatinik akuersissutinut il.il. Tamatumunngalu atatillugu innersuunneqassaaq assersuutigalugu § 86, imm. 5, Aatsitassanut inatsimmi ingerlatsinernullu tamatumunnga attuumassuteqartuni Inatsisartut inatsisaanniittumut (aatsitassanut inatsit). Taamaattumillu Naalakkersuisoqarfiup qinersimavaa aalajangersakkap aalajangiusimanissaa. Taamaattoq Naalakkersuisoqarfiup oqaasertai erseqqissarsimavai, suut akitsuummik akiligassiisutigineqarsinnaaneri pillugit, matumanissaaq sulianut ingerlasunut paasitinneqarsinnaanerni atortussaatilugu. Tamatumalu saniatigut siunnersuummi ilanngunneqarpoq ilaatigut minnerpaaffissanut killiliussaq, takornariartitsisartut kikkut siunnersuummi pineqarneri, isumaqarlunilu aallarnisaasut minnerit akuersissuteqarnissamut piumasaqaammit eqqorneqartussaanninnerat, taamalu akitsuummik tamatumunnga atatillugu akiliisussaanninneri.

2.9. Kapitalimut 8 -mut: Nakkutilliineq, peqqussuteqartarnek aamma piginnaatitsissummik – akuersissummik takornariartitsisarnermut utertitsisarnek

Ineqarnermut, Attaveqaasersuutinullu Naalakkersuisoqarfiup oqaatigaa inigisap inniminartuunera (allanit susassarineqannginnera) ersarissumik aallaaviuvoq, tamatumunngalu akuliussinnaaneq taamaallaat pisinnaasariaqarluni immikkut piumasaqaatinik aalajangersimasunik naammassinninniarnerni. Aalajangersakkamut tassunga nassuiaatigineqartoq Ineqarnermut Attaveqaasersuutinullu Naalakkersuisoqarfiup isumaa naapertorlugu naammattumik nassuiarneqanngilaq.

Trophy Huntin Greenland inassuteqarpoq peerneqassasoq § 15, imm. 2, misissuisarnerit pillugit aalajangersagaq.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup oqaaseqaatit tiguneqartut tunuliaqutaralugit nalilersimavaa aalajangersagaq siunnersuummit peerneqassasoq.

2.10. Kapitalimut 9 -mut: Zone-nut immikkoortiserineq il.il. inuussutissarsiutinik ingerlatsinernut aamma sumiiffiit ilaannut killilimmik isersinnaatitaanissat Ineqarnermut Attaveqaasersuutinullu Naalakkersuisoqarfiup oqaatigaa ersernerluttoq aalajangersakkap suliassanik agguaaassisimanermut aalajangersakkanut naapertuunnersoq.

Greenland Airports inassuteqarpoq Namminersorlutik Oqartussanut isumaliutigeqqullugu assersuutigalugu angallannermik aqutsineq pissusissamisoortumik inatsimmi pineqartumi ilaasariaqannginersut, soorlulu avatangiisinut tunngasut avatangiisinut atatillugu Inatsisartut inatsisaatigut aqunneqartut, pissutsillu pinngortitamut tunngasut Pinngortitamik illersuineq il.il. pillugit Inatsisartut inatsisaatigut aqunneqartut.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup oqaatigaa pissusissamisoortinneqarsimasoq Naalackersuisoqarfiit suliaasaqarfiinik tunngaveqartumik aqutsisoqarnissaa, soorlu zone-nut immikkoortiterinernik, inuussutissarsiutinut sammisuni. Naalackersuisoqarfiup eqqumaffigaa malittarisassiortoqassanngitsaq nalunaarusiornikkut Naalackersuisoqarfiup suliaasaqarfii akimorlugit.

Greenland Sagalands Qaqortoq Tourist Service, Nalik Ventures aamma **Visit Greenland** aalajangersakkamut tapersiillutik oqaaseqarput. **SIK** aamma **KNAPK** tamatumunnga atatillugu zone-nut immikkoortiterineq pillugu arlalinnik oqaaseqaateqarput, Kalaallit Nunaanni sumiiffinnut aalajangersimasunut. **Visit Greenland** eqqaasitsivoq unammilligassanik annertuunik suussusilersuisoqarsimammat minnerunngitsumik umiarsuit tingerlaatersortut pillugit, tamakkualu isummersorfigisariaqartut. Matumani pineqarput umiarsuit tingerlaatersortut aamma nuannaariutit yachts kalaallit imartaanniittartut, aqunneqanngitsumillu takornariartitsinermik ingerlatsillutik.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup maluginiarppaa aalajangersakkamut tapersiineq, aamma sammisamut atasunik oqaaserineqartut.

Hotel Hans Egede A/S, Ilulissat Excursions, Kommuneqarfik Sermersooq, Kommune Qeqertalik aamma **Greenland Airports** oqaaseqarput ersernerlunnerarlugu zone-nut atatillugu piginnaatitsissutitut aalajangersakkami kissaataanersoq, matumani aamma kommunit tamatumunnga atatillugu pisussaaffii eqqarsaatigalugit. **Kommune Qeqertalik, Kommuneqarfik Sermersooq** aamma **Qeqqata Kommunian** ataatsimut ernummatigisaminnik oqaiartorput siunnersuutip kommunini pilersaarutinut pilersaarusiornerlu pillugu inatsisinut qanoq atatinigera eqqarsaatigalugu. **Kommune Qeqertalik** aamma **Arctic Circle Business** oqaaseqarput kommunit zone-nut immikkoortiterinerni qitiusumik oqartussaassuseqartariaqartut, aamma sumiiffinni killilersuutinut akuersisarnernullu, tamakkualu kommunini immikkoortunut pilersaarutiniittariaqartut. **Kommune Qeqertalik** oqaaseqarpoq amigaataasoq ersarissunik allaaserinninneq pissutsinik kommunini pilersaarutinut maanna atuuttunut, aamma zonenut nutaamik immikkoortiterisalnissanut tunngasuni, soorluttaaq malittarisassiortoqartariaqartoq qanoq aaqqissuussinikkut zone-nut immikkoortiterinerit kommunini pilersaarutinut atuuttunut akulerunneqarnissaannik, ataqatigiinneq ataqatigiissaarinerillu najukkani pilersaarusiornerniittut qularnaarumallugit. Ilanngullugulu immikkoortitsisoqartariaqarpoq killilersuutinik ataasiakkaanik immikkuullarissunillu aammalu killilersuutinik ataatsimoornerusunik, erseqqissarumallugu suliffeqarfiit ingerlatsisut suut imaluunniit ingerlatat suut eqqorneqartassanersut, kiisalu qanoq killilersuutit pineqartut atortuulersinneqartassanersut nakkutigineqassanersullu. **Kommuneqarfik Sermersuup** ilanngullugu oqaatigaa amigaatigineqartoq qulaarinissaq inuussutissarsiornikkut periarfissat allat killilersorneqartarnerannik zone-nut assingusunulluunniit agguisarnerni, matumani

aamma qanoq nakkutilliisoqassanersoq maanna inatsisinut atuuttunut aalisarnermi, piniarnermi aammalu aatsitassarsiornermik ingerlatsinerni. **Kommuneqarfik Sermersooq** ilanngullugu oqaaseqarpoq aalajangersakkami siunnerfigineqartoq Naalakkersuisut oqartussaansaasat ersarinnerusunik malittarisassiorsinnaanermut suliaasaqarfimmi pineqartumi, kisiannili aallaaviusutut kommunit pisussani aallartitsisuusartussaasut. Ingerlatsiviup kissaatigaa qulaajaasoqarnissaa ersarinnissaalu kommunit iliuuseqartussaansut najukkani tusarniaanernut / tamanut ammasunik tusarniaanernut, kommunini suliniutissat Naalakkersuisunit akuerineqqaartussaansut, aammalu zone-nut immikkoortiterineq Naalakkersuisunit aallartinneqartup assigneraa nunamut tamarmut pilersaarummut peqqussut aamma / imaluunniit tamanut taanna tusarniaassutigineqartussaansoq. **AECO** inassuteqarpoq zone-nut agguisarnermut ersarinnerusunik atugassarititaasuliortoqassasoq.

Avannaata Kommuniata oqaatigaa nakkutilliinermut siunnersuut assigninngitsutigut naammagisimaarnartuusoq, kisiannili kommunalbestyrelsip piumasaraa tamakkiisumik nakkutilliisoqassasoq.

Hotel Hans Egede A/S oqaaseqarpoq aamma siunnersuut annertuunik iliuuseqartitsisuusooq, naapertuunnanilu Pilersaarusiortarneq aamma nunaminertanik atuineq pillugit Inatsisartut inatsisaannut nr. 4, ulloq 25. januar 2024 -imeersumut (Pilersaarusiortanermut inatsit), tassani kommunini immikkoortiterisoqartarmat ilaatigut inuussutissarsiorfinnut, sunngiffimmi sammisasaqartitsivinnut, nunaminertanullu atugassaangitsunut.

Inuussutissarsiornermut, Niuernermet, Aatsitassanut, Inatsisit Atuutinneqarnerannut Naligiissitaanermullu Naalakkersuisoqarfiup tusarniaanermut akissutigineqartut tunuliaqutaralugit inatsisissamut nassuiaatitut oqaaseqaatit ilaat itisilersimavai. Naalakkersuisoqarfiup oqaatigissavaa ilanngullugu aalajangersagaq piginnaatitsissutaammat zone-nut immikkoortitikkani il.il. aalajangersaanissamut, inuussutissarsiornermut ingerlatsivinnut, ersarinnerusunillu tamatumunnga malittarisassat nalunaarutikkut suliarineqarsinnaammata.

AECO inassuteqarpoq qulaanaarisoqassasoq pisussanik soqutigisaqartut attuumassuteqartut tamarmik piffissaqartinneqarnissaannik oqaaseqartarnissanut, periarfissanik allanik tikkuartuisarnissanut, imaluunniit siunnersuummut uparuartuinissanut, aamma aalajangersakkanni immikkuualuttunut. **Topas Explorer Group** najukkani namminerni najugallit ineriartornermut sunnuteqartikkumallugit aaqqissuussineq maluginiarsimavaa, aaqqissuussiniartoqartoq zone-nut immikkoortiterinernik, tamatumani najukkani najugallit tusarniaavigineqartut. Taamaalilluni qularnaarneqassaaq innuttaasunik annerusumik peqataatitsineq oqartussaaqataanerlu, soorluttaaq kommunit eqeersimaartumik aqutseqataaffigisinnaagaat najukkani ineriartortitsineq takornariartitsinikkut.

Pinngortitaleriffik inassuteqarpoq Naalakkersuisut siunnersorneqarnissamik Pinngortitaleriffimmiit piniassasut, zone-nut nunap immikkoortuini immikkoortiterisarneq eqqarsaatigalugu malittarisassiornermilu. Pinngortitaleriffiup pingaartippaa zone-nut immikkoortiterinerup taakkunanilu killissat nunap immikkoortuinut naapertuuttuunissaat, piffissalersuinerni malittarisassanilu, ilaatigut Pinngortitamik illersuinermet Inatsimmi aamma nalunaarutini taakkununnga atasuni, kiisalu nunat tamalaat akornanni maleruagassat eqqarsaatigalugit. Sumiiffiit toqqarneqarsimasut uumassusillit assigninngisitaarnerannut

attuumassutaat, ilanngullugu aamma ilaasinnaavoq sumiiffinnut taaneqartartunut “OECD-områder” (Other Effective-Area Conservation Measure), ilanngussisuusut sumiiffinnik illersuinernut uumassuillit assigiinngisitaartuuneri eqqarsaatigalugit aamma pinngortitami ataqatigiinnernut toqqaannartumik eqqissisimatitaanngikkaluarlutik.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup maluginiarpa kissaateqartoqartoq innuttaasut akulerusimaneqarnissaannik kiisalu suliaaqqarfimmi siunnersorneqarsinnaanermik neqeroortoqartoq.

2.11. Kapitalimut 10 -mut: Kinguneqartitsisarnerit

Hotel Hans Egede A/S oqaaseqarpoq isumaliutigineqarsinnaasoq aalajangersakkap ilusilerneqarsinnaanera allaffissornikkut akiliisitsisarnertut, eqqartuussiviit aqqusaarumanagit.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup nalilerpa inatsisitigut eqqartuussiveqarnikkullu isumannaatsumik ingerlatsisoqarnissaanit isigalugu aalajangersagaq taamatut isikkoqartillugu attatiinnartariaqartoq, eqqartuussivinnut naliliganngorlugu akiliisitsisoqassanersoq.

2.12. Kapitali 11 -imut: Eqqartuussivinni misiliineq

Greenland Airports -ip nassaarisinnaasimangilaa allaffissornikkut maalaaruteqartarnermik aaqqissuussineq siunnersuut naapertorlugu aalajangiinernut. Greenland Airports inassuteqarpoq siunnersuummi ersarissarneqassasoq maalaaruteqartarnernut qanoq atugassaqqartitsisoqarnera.

Greenland Airports, Transparency International Greenland (TIG) aamma Hotel Hans Egede A/S inassuteqarput naammagittaalliortarnermut allaffissornikkut suliaqarsinnaanermik aaqqissuussisoqassasoq, pisariitsumik ersarissumillu suliaqartoqarsinnaanngorlugu.

Nuna Advokatit oqaaseqarput ukiut 3-5 ingerlaqqaassasut suliffeqarfiup eqqartuussivitsigut aalajangiisitsisinnaaneranut, immikkut akuersissuteqarsimasussaagaluarnersoq piginnaatitsissuteqarnermik imaluunniit taarsiissuteqartoqassanersoq.

Inuussutissarsiornermut, Niuernermut, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup oqaatigaa aalajangiisusooq eqqartuussivitsigut aalajangiisitsisoqarsimanissaa, inatsisartut inatsisaannik tunngavilinnik aalajangikkanut. Eqqartuussivitsigut aalajangiisitsinikkut periarfissaajuaannarpoq aalajangiinerup isumannaatsumik periarfissat iluini misilinneqaaqqissinnaanera. Taamaakkaluartoq Naalackersuisoqarfik isumaqarpoq allatigut misiliisoqarnissaanik pisariaqqartitsisoqanngitsooq, aamma nukinnik annertuunik atuisoqartariaqassagaluartoq arlaannaannulluunniit attuumassuteqanngitsumik suliat misilinneqartarfiliussagaanni, naammagittaalliutaasinnaasunik inatsisartut inatsisaat naapertorlugu suliaqarnissanut. Taamaattumik aalajangiusimaneqarpoq eqqartuussivitsigut aalajangiisitsisarnissaq siunnersuummiittoq.

2.13. Kapitali 12 -imut: Atortuulersitsineq aamma piffissamut ikaarsaariarfiusumut aalajangersakkat

Kommune Kujalleq oqaaseqarpoq autorisationi piumasqaateqarfiusoq piginnaanernik nutaanik, tamannalu ingerlatsisut annertunerujussuarnik piginnaaneqalernerannik kinguneqarsinnaasoq, tulluurtumillu ikaarsaariarneri aaqqissuussineq aqputaasinnaasoq aaqqissuussinerit nutaat eqqunneqarnerannut qularnaarisunik ingerlatsisuulersartut nutaat merserusulinnginnissaannik, suliffeqarfimmik takornariartitsinermi aallartitissamaartut akornanni.

AECO ilanngullugu inassuteqarpoq qularnaarneqassasoq pitsaasunik ikaarsaariarnermi aaqqissuussisoqarnissaa, qularnaarisunik maanna ingerlatsisuusut naammattumik piffissaqarnissaannut periarfissaqarnissaannullu ullunut nutaanut maleruagassanullu nutaanut, taamalu ikaarsaarneq pitsaanngissinnaasut annikinnerpaaffianiitsinneqarluni, qularnaarisunik najukkani ingerlatsisut ullunut nutaanut maleruagassanullu nutaanut ikaarsaarnissaannik, suliffinnut inuiaqatigiillu aningaasarsiornerannut annikinnerpaamik malunniuttumik.

Air Greenland oqaaseqarpoq pingaartuusoq inatsisartut inatsisaata kingunissaasa nalilersuiffigineqarluarnissaat, ingerlatsineranut pioreersunut atatillugu, ilanngullugulu nalilersorlugu naammassisinnaasanut nalorninaateqarsinnaanera, sukkasuumik inatsisartut inatsisaannikatortuulersitsineq.

Arctic Dream ApS, Greenland Airports, Grønlands Revision, Hotel Hans Egede A/S, Nalik Adventures, Nuna Advokater, Topas Explorer Group, Trophy Huntin Greenland, Transparency International Greenland (TIG), Qeqertalik Business Council & Destination Diskobay A/S aamma Visit Greenland oqaaseqarput piffissaq ikaarsaariarfiususaaq siunnerfigineqartoq sivikippallaartoq, tamannalu maanna ingerlatsisuusunut annertuunik unammilligassaqartitsissalluni, suliffiutiminnik tuniniaanialersussanik imaluunniit pissutsinut nutaanut naleqqussartussaassasut, aammali annikitsuinnarmik piffissaqartitsisoqassasoq ingerlatsilerniartunut nutaanut akuersissummik piniarnissamut, tamannalu piffissamik takornariartitsiviusussamik aseruisinnaasoq.

Transparency International Greenland (TIG) inassuteqarpoq piffissaliinerup sivitsorneqarnissaannik 1. august 2025 -imut nutaat ingerlatsilerniartut eqqarsaatigalugit.

Greenland Airports inassuteqarpoq piffissaq ikaarsaariarfiususaaq suliffeqarfinnut pioreersunut sivitsorneqassasoq, naleqqussaaneq pissusissamisoernerpaamik ingerlanneqarsinnaaqullugu, pisariaqassanngitsorlu pinngitsaaliilluni tuniniaasarnissaq. **Greenland Airports** siunnersuivoq piffissaq ikaarsaariarfiususaaq minnerpaamik ukiunik 3 -nik sivilissuseqassasoq suliffeqarfinnut pioreersunut, periarfissaqartillugulu immikkut akuersissuteqarsinnaanermut pisuni immikkut ittuni sivitsuisinnaanermik. **Visit Greenland** tapersiivoq aaqqiissutissamut suliffeqarfiit nutaat aallaqqaataaniilli malittarisassanik nutaanik malinnittarnissaannik, suliffeqarfiilli pioreersut malittarisassat nutaanngitsut iluanni ingerlatsinissaannut.

Topas Explorer Group, Nuna Advokater aamma Qeqertalik Business Council & Destination Diskobay A/S inassuteqarput piffissamik ikaarsaariarfiusussamik minnerpaamik ukiunik 5-10 -nik sivilissuseqartussamik.

Visit Greenland inassuteqarpoq sivisunerusumik ikaarsaariarfeqartitsisoqarnissaannik suliffeqarfinnut pioreersunut, kiisalu periarfissamik assigiinngisitaartumik akileraartarnikkut aaqqissuussisinaanermik. Visit Greenland siunnersuuteqarpoq suliffeqarfiit piumasaqaatinik nutaanik killiliussap naannginnerani naammassinnissimangitsut assersuutigalugu annerusumik akileraartinneqarsinnaasut. Tamatuma suliffeqarfiit sivisunerusumik piffissaqartissavai naleqqussarnissamut, ingerlatsinermut nalorninaateqanngitsumik. Visit Greenland ilanngullugu siunnersuuteqarpoq ukiunut 10 -nut pilersaarummik suliaqartoqassasoq siunnersuummi § 9-ip piginnittuunissamut piumasaqaataasup piviusunngortikkiartornissaanut. Anguniagaasinnaavoq najukkani namminerni piginnittuunerup 2/3 -inngorsinnaanera 2035 angutinnagu. Tamatuma najukkani najugallit naapertuuttumik periarfissaqartissavai piffissap ingerlanerani piginnittuunermik tiguisisinaanerannik.

Inuussutissarsiornermut, Niuernermit, Aatsitassanut, Inatsisit Atuutinneqarnerannut Naligiissitaanermullu Naalackersuisoqarfiup tusarniaanermik akissutigineqartut aamma isumasioqatigiilluni oqallitsitsinerit tunuliaqutaralugit piffissamut ikaarsaariarnermut aalajangersakkanik iluarsisuteqarpoq siunnersuummi § 20, imm. 2-mi, imaalillugu inatsisartut inatsisaat aatsaat atuutilissasoq takornariartitsinermik ingerlatsivinnut pioreersunut ulloq 1. januar 2027. Naalackersuisoqarfiup naliliineraa piffissaliineq ukiunik tallimaniit qulinut siunnersuutip siunertaanut illuatungiliuttoq, inatsit taamaasilluni aatsaat ukiut amerlasuut qaangiuppata sunniuteqalissammat.

Ilanngussaq 2

**Tusarniaanermi allakkiaq
Tusarniaanerup aappassaa**

Siunnersuut piffissami 2. juli 2024 -miit 16. juli 2024 -imut tamanut ammasumik tusarniaasarnermut Naalakkersuisut quppersagaanni ammatinneqarpoq, soorluttaaq siunnersuut piffissami tassani ukununga tusarniaassutigineqartoq:

- Naalakkersuisut Siulittaasuata Naalakkersuisoqarfia
- Ineqarnermut Attaveqaasersuutinullu Naalakkersuisoqarfik
- Aningaasaqarnermut Akileraartarnermullu Naalakkersuisoqarfik
- Aalisarnermut Piniarnermullu Naalakkersuisoqarfik
- Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
- Nunalerinnermut, Imminut Pilersornermut, Nukissiuuteqarnermut Avatangiisinullu Naalakkersuisoqarfik
- Meeqqanut Inuusuttunullu Naalakkersuisoqarfik
- Peqqissutsimut Naalakkersuisoqarfik
- Naalagaaffinngornissamat Nunanullu Allanut Naalakkersuisoqarfik
- Avannaata Kommunia
- Qeqqata Kommunia
- Kommune Qeqertalik
- Kommuneqarfik Sermersooq
- Kommune Kujalleq
- Eqqartuussissuserisoq - Advokat Aviâja Helms
- Eqqartuussissuserisoq - Advokat Gedion Jeremiassen
- Eqqartuussissuserisoq - Advokat Marie Louise Frederiksen
- Eqqartuussissuserisoq - Advokat Naja Joelsen
- Eqqartuussissuserisut - Advokatfirmaet Malling & Hansen Damm
- Eqqartuussissuserisoq - Advokatfirmaet Meinel
- Air Greenland
- Atorfillit Kattuffiat - Akademikernes Sammenslutning i Grønland (ASG)
- Arctic Circle Business
- Eqqartuussissuserisut - Arctic Law
- Arctic Umiaq Line
- Association of Arctic Expedition Cruise Operators (AECO)
- Avannaani Inuusutissarsiortut
- Banknordik

- Deloitte
- EY
- Sulisitsisut - Grønlands Erhverv
- Kukkunersiuisut - Grønlands Revision
- Grønlandsbanken
- Innovation South Greenland
- Eqqartuussissuserisut - Inuit Law
- Kalallit Airports
- Kalaallit Nunaanni Aalisartut Piniartullu Kattuffiat (KNAPK)
- Kommuni Pilersaarusiornermut Oqartussat
- Kalaallit Nunaanni Ilinniartitsisut Peqatigiiffiat (IMAK)
- Nalik Ventures
- Eqqartuussissuserisut - Nuna Advokater
- Nunatsinni Perorsaasut Kattuffiat (NPK)
- Oceans North Kalaallit Nunaat
- Peqqinnissaq Pillugu Kattuffiat (PPK)
- Pinngortitaleriffik
- Qeqertalik Business Council
- Sermersooq Business
- Sikuki
- Sulineramik Inuussutissarsiuteqartut Kattuffiat (SIK)
- Visit Greenland
- WWF Kalaallit Nunaanni

Piffissap tusarniaavigineqartup naanerani Naalakkersuisut tiguaat tusarniaanermi akissutit ukunanga. Naalakkersuisut ilanngullugit akueraat tusarniaanermi akissutit piffissaq naareersoq tiguneqartut ilanngunneqarsinnaassut.

- Ineqarnermut Attaveqaasersuutinullu Naalakkersuisoqarfik
- Meeqqanut Inuusuttunullu Naalakkersuisoqarfik
- Aningaasaqarnermut Akileraartarnermullu Naalakkersuisoqarfik
- Aalisarnermut Piniarnermullu Naalakkersuisoqarfik
- Nunalerinermut, Imminut Pilersornermut, Nukissiuuteqarnermut Avatangiisinullu Naalakkersuisoqarfik
- Avannaata Kommunua
- Qeqqata Kommunua
- Kommune Kujalleq
- Arctic Circle Business
- Arctic Dream
- Association of Arctic Expedition Cruise Operators (AECO)

- Danmarks Rejsebureau Forening
- Dr Jonathan Bell
- Eimskip
- Erik Bek Lomholt
- Escales
- Forsikring og pension
- Sulisitsisut - Grønlands Erhverv
- Kalaallit Nunaanni Politiit - Grønlands Politi
- Grønlandsbanken
- Guide to Greenland
- Hurtigruten
- Kalaallit Airports
- Nalik
- Nanortalik/Serano Boat Tours
- Nuna advokater
- Nunatsinni Perorsaasut Kattuffiat (NPK)
- Poseidon
- Sikuki Nuuk Harbor
- Sulinermik Inuussutissarsiuqartut Kattuffiat (SIK)
- Transparency International Greenland (TIG)
- Visit Greenland

Tulliuttuni tusarniaanermi akissutigineqartut allannguutissatullu siunnersuutigineqartut sammineqassapput. Oqaatigineqassaaq tusarniaanermi akissutigineqartut taamaallaat pingaarnersiorlugit issuarneqartarmata, soorluttaaq immikkut aallunneqartut isummersuutit siusinnerusukku tusarniaanermi sammineqartarsimanngitsut. Naalakkersuisut oqaaseqaataat orlingasumik nalunaarneqarput.

Tusarniaanermi akissutigineqartut tamarmik tamakkerlugit Inatsisartuni ataatsimiititaliamut suliamik suliaqartumut ingerlatinneqarput.

1. Ataatsimut oqaaseqaatigineqartut

Guide to Greenland akuersivoq Kalaallit Nunaanni takornariartitsinerup aaqqiivigineqartariaqarneranik.

GrønlandsBANKEN isumaqarpoq siunnersuummi iluaqutissat isigineqarsinnaasut ersernerlunnerusut siunnersuummi ajoqutaasinnaasuniit.

Transparency International Greenland akuersivoq siunnersuutip erseqqarinnerullunilu paasiuminerneruneranik maanna, kisiannili aalajangiusimaneqarput oqaaseqaatigineqareersut tusarniaanermi 27. Maj 2024 akissutigineqarsimasut.

Nalik Ventures nersualaarivoq siunnersuummi aallaavigineqartunik, taamaattumillu siunnersuummut ilassutitut oqaaseqaatissaqarani.

Qeqqata Kommunia qujavoq allannguutitut missingersuusiami atuuttumi, kisiannili sulii assut ernumagalugit siunnersuummi aningaasarsiorneq inuiaqatigiinnullu pitsaanngitsunik suniutaasussat.

Nanortalik isumaqataangilaq takornariartitsisarnermi akuersissut pisariaqartinneqassamat, tamanna sulii allaffissornerulernermik kinguneqassamat, imaatigut ilaasunik maanna angallassisarneq Søfartsstyrelse suleqatigalugu ingerlanneqareemat.

Nunatsinni Perorsaasut Kattuffiat tunngaviusutigit tusarniaanerup kingornagut allannguutitut isumaqataavoq, allanillu oqaaseqaatissaqarani.

Avannaata Kommuniata kissaatigaa siunnersuutikkut killiliussannik aaqquissuussisoqarnissaa Namminersorlutik Oqartussat ingerlatsisinnaanerannut, soorlu World of Greenland, namminersortunut unammillertut.

Nunalerinnermut, Imminut Pilersornermut, Nukissiuuteqarnermut Avatangiisunullu Naalakkersuisoqarfiup ilalerpaa kissaateqartoqarnera qularnaarinnissamik illersuinnermillu sumiiffiit assiginngitsut sumut atorneqarsinnaanerannik, angalaartut isumannaatsumik atugaqartarnissaat, kiisalu naasut uumasullu. Kiisalu iluarisimaarneqarpoq siunnersuummi ataatsimut isigisumik eqqumaffigineqarmat aqutsineq inatsisitigit atuuttutigit, aalajangersakkallu imminnut matussusersinnaaneri imaluunniit assortuussinnaaneri, taamaattorli oqaatigalugu sulii arlalitsigit ersernerluttoqarmat anguniakkanni zone-nut immikkoortiterinerni, kikkullu taakkuninnga aqutsisuunerannik.

Poseidon Expeditions oqaaseqarpoq siunnersuutip kingunerissagaa Poseidon Expeditions Kalaallit Nunaannik umiarsuarnut takornariartaatitut ornittagaqarunnaassasoq.

Aningaasaqarnermut Akileraartarnermullu Naalakkersuisoqarfik naliiivoq siunnersuut annerusutigit pitsaanngitsunik aningaasarsiornermut sunniuteqassasoq ilaatigut inuussutissarsiornermi. Tamanna isigineqassaaq siunnersuut inuussutissarsiornermi aningaasarsiornekkut allaffissornekkullu nammagassanik kinguneqartussaananerit. Siunnersuullu ilutigisaanik killiliisussaavoq avataaneersut aningaasalersuinerannik Kalaallit Nunaanni takornariartitsinermik.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalakkersuisoqarfiup maluginiarppaa tusarniaavigineqartut suliiassaqarfiup inatsisitigit aqunneqartariaqarnera akuerigaat, siunnersuummilu allannguinerit nersualaarneqartutut ittut. Naalakkersuisoqarfiup aamma akueraa akuersissummik takornariartitsinermi piumasqaateqartoqarnera aaqqiissutaasinnaasoq ingerlatsisut ilaannut, kalaallini inuiaqatigiinni aningaasaliinnginnissamat, tusarniaavigineqartut ilaasa ernummatigisaattut. Ilutigisaanik Naalakkersuisoqarfik isumaqarpoq pisariaqartoq suliiassaqarfimmik aqutsisoqarnissaa, pitsaqaataasullu ajortunit amerlanerusut. Tamatumunnga atatillugu innersuunneqarput siunnersuummut nassuiaatitut oqaaseqaatigineqartut nalinginnaasut, ingammik 1.1.

2. Inatsisartut inatsisaanni immikkoortunut ataasiakkaanut

2.1.. Kapitalimut 2 -mut: Akuersissummik – piumasagaammut

2.1.1 Akuersissummik peqarnissamut ataatsimut piumasagaatinut

Avannaata Kommunia ilaatigut oqaaseqarpoq akuersissummik tunniussisinnanermut oqartussaaneq kommunalbestyrelsini inissisimasariaqartoq Namminersorlutik Oqartussani pinnani, nunanit allanit umiarsuarnik takornariartaatinik ingerlatsisunut kalaallini pissutinik ilisimasaqanngitsunut akuersissuteqartoqartassanngitsoq, tamakkua kalaallini pissutsinik pinngortitamillu killeqartunik ilisimasaqartarmata, qajartortut mattuttariaqartut, nunatsinni qaannamut instruktøritut ilinniarsimannngitsut, piumasagaateqartariaqartorlu maani najugalimmik angalaqateqartarnissamik, sillimaniarneq eqqarsaatigalugu – tammajuitsussarsiniarluni piniartoqartillugu, qimussimillu angalasuni najugallit salliutinneqartassasut.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalackersuisoqarfiup nalilerpaa akuersissummik tunniussisarnerup Naalackersuisuniinnissaa iluaqutissartaqartoq, assigiimmik allaffissornissaq eqqarsaatigalugu. Sillimaniarnikkut il.il. piumasagaatit ujartorneqartut suliarineqassapput allaffissiornikkut peqqussusiornermi Inatsisartut inatsisaannik tunngaveqartumik, akuersissummillu tunniussinissami.

Arctic Circle Business oqaaseqarpoq akuersissut sammisaqartitsisut assigiinngitsut aallaavigalugit tunniunneqartariaqartoq, akuersissummi takornariartitsineq tamaat aallaavigalugu aaqquissuussisoqartaqqunagu, kisiannili sammisaqarfiit assigiinngitsut tunngavigineqartariaqartut.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalackersuisoqarfiup oqaaseqarpoq akuersissut – suleqatigiit assigiinngitsut aallaavigalugit tunniunneqarsinnaasoq, soorluli itigartitsisoqarsinnaasoq ingerlanniakkat ilaanni, allanilu akuersilluni. Apeqqut taanna suliassap ingerlannerani isummerfigineqartassaaq, allaffissornermi akuersissummik tunniussinissamut.

Trophy Hunting Greenland oqaaseqarpoq ersernerluttoq siunnersuutip § 1, imm. 3 -ia qanoq suliffeqarfimmut piffissanik piniarfiusartunik arlariinnik ingerlatsisumut sunniuteqarnissaa, ukiullu ilaani sumiiffimmi akuersissuteqarfiunngitsumi piniartariaqartartumut.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalackersuisoqarfiup oqaatigaa takornariartitsisarneq pillugu Inatsisartut zone-nut il.il. inatsisissaannut siunnersuut sumiiffinnut killilersuinertaqartoq akuersissutinut atortuusussaasoq sumiiffimmi immikkut toqqarneqartuni. Sumiiffinni takornariartitsiviusartussatut akuersissuteqarfiusut avataanniittuni akuersissummik peqarnissamik piumasagaateqassaaq, inatsimmi piumasagaataasut naammassineqarsimatillugit.

2.1.2.. Inatsisartut inatsisaanni ilaanngitsut

Arctic Circle Business isumaqarpoq soqutaanngitsuut killiliussaq 50.000 kr. -iusoq peertariaqartoq.

Association of Arctic Expedition Cruise Operators oqaaseqarpoq isumaliutigineqarsinnaasoq soqutaanngitsunut killiliussap akuersissummi killingata qaffanneqarsinnaanera, maanna killiliussaq 50.000 kr.- appasimmat isertitanut pisariaqartunut, takornariartitsinermik ingerlatsisutut aaqqissuussinermi.

Visit Greenland isumaqarpoq soqutaanngitsunut killiliussaq 50.000 kr. -i qaffasippallaartoq, najugallit aamma avataaneersut naligiinnngitsumik imminnut unammilissammata. Taamaattumik kaammattuutigineqarpoq killiliussap apparneqarnissaa imaluunniit peerneqarnissaa, najukkamilu inuussutissarsiornermut siunnersuisoqatigiit nukittorsarneqarnissaat, ikiuussinnaalersillugit nuannariinnarlugu takornariartitsisartut ingerlatsisunngornissaannut piumasaqaatinillu naammassinnittalernissaannut, takornariartitsinermik ingerlatsisuulerlutik.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup pissusissamisoortutut nalilerpaa minnerpaaffissamik akuersissummut killeqarnissaa, qaffasissuserlu pissusissamisoortoq.

Guide to Greenland ApS inassuteqarpoq § 3, imm. 2 -mi ilassusiisoqassasoq “Kalaallit Nunaanni takornariartitsisarneq takornariartunik kiffartuussinerusoq Kalaallit Nunaata avataani ingerlanneqartoq akuersissummut piumasaqaammut ilaanngitsoq”, inatsisartut inatsisaanni siunertaasimagunangimmat, assersuutigalugu kalaallit angalatitsiviisa nunatsinni tunisagaat soorlu Island-imut angalaneq akuersissummut piumasaqaammut ilaanissaa. Ilanngullugu inassutigineqarpoq ilanngunneqassasoq: ”Takornariartitsinermik ingerlatsisartut kiffartuussinernik neqeroorutaat takornariartunut akuersissummi ilaanngillat.”.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup oqaatigaa taamaallaat takornariartitsinermik ingerlatsineq Kalaallit nunaanni namminermi ingerlanneqartoq aamma imartaani ilaasut. Naalackersuisoqarfiup oqaatigaa ilanngullugu siunnersuummi nassuiaatitut oqaaseqaatini ersimmat takornariartitsinermik ingerlatsisut neqeroorutiminnik paasisitsiniaaner at inatsisartut inatsisaanni ilaanngimmat.

2.1.3 Akuersissutip piffissamik killiligaanera pillugu

Kommune Kujalleq oqaaseqarpoq isumaliutigillaqqullugu pissusissamisoornersoq akuersissutip – aallaavittut killilimmik piffissaligaanissaa.

Nuna Advokatit kissaatigaat inatsimmut nassuiaatitut oqaasertaliussani ersissasoq pissutsit qanoq ittut aalajangiisuusarneri akuersissutip piffissamik killiligaasarnan.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup pissusissamisoortutut isigaa akuersissutip aallaavittut piffissamik killiligaasarnissaa. Tamatumunngalu atatillugu oqaatigineqarpoq piumasaqaataasoq

akuersissummik atuisinnaanermut atugassarititaasut naamassineqarnissaat. Siunnersuummut oqaaseqaatini erseqqissarneqarpoq pisut qanoq ittut pissutaasinnaaneri piffissamik killiliisinnaanermut.

2.1.4.. Immikkut akuersissuteqarsinnaanermut periarfissat

2.1.5. Paasissutissanik avitsisarneq

Arctic Circle Business isumaqarpoq siunnersuummi § 5 suli periarfissaqartitsisoq unammilleqatigiinnerup assigiinnngissinnaaneranik, aalajangersagarlu Kalaallit Nunaanni kisitsisinik paasissutissanik ingerlatsivimmuut killeqartariaqartoq.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalakkersuisoqarfiup isummersuutit maluginiarpai, taamaattorli isumaqarluni siunnersuutikkut naapertuuttumik oqimaaqatigiissitsisoqartoq, unammillerneq akornuserumanagu.

2.2. Kapitali 2 -mut: Umiarsuarnut takornariartaatinut atuutinngitsunut

Blue Water Greenland nalunaarpoq inatsisissatut siunnersuummi pitsanngoriaateqartoq, ilaasunik angallassineq akuersissummi ilaannngimmat, kisiannili erseqqissaanissaq pisariaqartoq suut atuunnersut qaannanut, paddelbordingimi, scenic cruises med zodiac-imi, imaani aqqartarnermi aamma helikopterinut ilaalluni sisorariartarnermut. **VP Expedition Development** nalunaarpoq pisariaqartitsisoqartoq erseqqissaatinik, siunnersuut umiarsuarnut takornariartaatinut qanoq sunnuteqassanersoq pillugu. **Association of Arctic Expedition Cruise Operators** oqaaseqarpoq pisariaqartoq erseqqissaasoqarnissaa, malittarisassat suut atuunnersut misigisassarsiorlutik umiarsuarnut takornariartaatinut ilaasunut, ilisarnaateqartunut imaatigut angalaarnernik, najukkani ingerlatanut, namminerlu atortut atorlugit sammisanut. Tamanna tunuliaqutaralugu inassutigineqarpoq umiarsuup atortorissaarutai atorlugit nunaliaassuisarneq (ship to shore) inunnik assartuinerup ilagigaa takornariarnerunngitsoq.

Association of Arctic Expedition Cruise Operators inassuteqarpoq akuersissummut piumasagaammut immikkut akuersissuteqarnermik aalajangersagaqassasoq, minnerpaamik inoqarfinni umiarsuup nammineq atortunik atuffiusinnaasunik, kiisalu aamma zone-nut aqutsinerni inatsisini aqutsinernut allanut atasuni.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalakkersuisoqarfiup tusarniaanermi akissutit tiguneqartut tunuliaqutaralugit siunnersuummi nassuiaatitut oqaaseqaatini erseqqissarpai sinnersuutip kingunerisai, umiarsuarnut takornariartunik angallassissutinut atatillugu.

2.3 Kapitalimut 3-mut: Pisinnaatitsissummik pigisaqartut

Arctic Circle Business nalunaarpoq iluarisimaarlugu piginnittuunissamik piumasagaat sakkukillineqarmat, kisiannili ilutigisaanik oqaatigalugu piumasagaat suli uniffissaqarsinnaasoq, aammalu ikaarsaariarnermi aalajangersakkat pitsaanerusut qularnaarneqartariaqartut. **Danmarks Rejsebureau Forening** oqaaseqarpoq § 9 -mi piginnittuunermik aalajangersagaq peertariaqartoq

Danmarks Rejsebureau Forening ilanngullugu erseqqissaavoq najugaqartuunissamik piunasaqaat kinguneqarsinnaasoq arsaarinnilluni akulerunnertut. Isummamut ilalersuutitut ilanngunneqarpoq isummersuut professor mso, dr.jur., Frederik Waage -imeersoq, imaqartoq isummersuutitunik tunngaviusumik inatsimmi § 73-imut, kiisalu Europamiut inuiattutut pisinnaatitaaffiit isumaqatigiisummi aalajangersakkanik.

GrønlandsBANKEN nalunaarpoq Naalakkersuisut naapigiarsimagaat isornartorsiutit ilaat nunanut allamiunut piginnittuunermik killilersuutitini 33 % -iniit 50 % -imut qaffaanermikkut, ilutigisaanillu ikaarsaariarnermi aalajangersagaliorlutik 1. januar 2027-imut. Ilutigisaanik nalunaarneqarpoq tamatuma GrønlandsBANKEN -imit ernumassutaasut peersinngikkai, inatsisiliornerup kingumoortumik atortuulertussap nalorninaataanik, soorluttaaq aningaaseriviup takusinnaanngikkai iluaqutissat siunnersuummi §§ 8 aamma 9-mi.

Sikuki Nuuk Harbour A/S oqaaseqarpoq ajornarnerulersinnaasoq pisariaqartunik aningaasaliisussanik pissarsiniartarneq takornariartitsinerup ineriartortinnissaani, nunanit allaniit aningaasaliisartut killilerneqarnerisigut, tamannalu Kalaallit Nunaanni ilorraanut ineriartortnermik unitsitsinnaasoq.

SIK-mit ilalernerqarpoq aningaasaliissutissanut piunasaqaat affaanit annertuninngorlugu.

Avannaata Kommuniata oqaatigaa kommunalbestyrelsip tungaaniit siunnersuummi eqqaaneqartoq piginnittuunermut piunasaqaat naammagisimaarnartoq, taamaattorli ernummataasinnaasoq inatsisartut inatsisaannik putunik iluaquteqartoqarsinnaanera.

Ineqarnermut Attaveqaasersuutinullu Naalakkersuisoqarfik oqaaseqarpoq isumaliutigisariaqartoq siunnersuummi najugaqarnermut piunasaqaataasoq akileraartussaanerlu inunnut, kiisalu inunnut inatsisitigut pisinnaatitaasunut Kalaallit Nunaanni takornariartitsinermik ingerlatsiumasunut, pitsaanngitsunik tamakku kinguneqarsinnaasut, inuk nammineq atukkaminik tunngaveqartunik takornariartitsinermut pitsaanngitsunik sunniuteqarsinnaammat, Kalaallit Nunaanni inuit allattorsimaffianni nalunaarsorsimannginnikkut.

Inuussutissarsiornermut, Niuernermet, Aatsitassanut, Inatsisunik atortitsinermet Naligiissitaanermullu Naalakkersuisoqarfik tusarniaanermi akissutaasut tunuliaqutaralugit ilanngussivoq siunnersuummi nassuiaatitut oqaaseqaatinut tunngaviusumik inatsimmi § 73 -imut atatillugu. §§ -ini 8-9 piunasaqaataasunut atatillugu siunnersuummut nassuiaatitut oqaaseqaatit innersuunneqassapput.

2.4. Kapitali 4 -mut: Sillimaniarnermut pilersaarutit

Nuna Advokatit inassuteqarput skabelonimik suliaqartoqassasoq nalorninaatinik nalilersuisarnermut atortussamik, inatsisartut inatsisaannut ilanngussatut ilaasussamik, assigiissaarisoaqqullugu, taamalu qinnuteqarneq allaffissornerlu pisariinnerulersillugit. **Visit Greenland** ujartuivoq aamma immikkuualuttortaqarnerusumik malittarisassamik sillimaniarnermut pilersaarutitut atatillugu, ikiorsiisinnaasumik suliffeqarfinnut piunasaqaatinik malinninnissamut naammassisaqarfiunerusumik.

Inuussutissarsiornermut, Niuernermut, Aatsitassanut, Inatsisinik Atortitsinermit Naligiissitaanermullu Naalackersuisoqarfiup maluginiarpai kissaataasut ilitersuusiornissaannik il.il.

Trophy Hunting Greenland isumaqarpoq sillimaniarnermut pilersaarutitut atasumik aalajangersagaq allanngortittariaqartoq, imaalillugu pilersaarusiaq tuluttut suliaassalluni, kiisalu oqaatsini allani pisariaqartuni, sulisuusut suliffeqarfimmi atuarsinnaasaannik. Ilanngullugu nalunaarneqarpoq kukkunerussasoq piumasarissallugu sillimaniarnermut pilersaarutip kalaallisut suliaanissaa, suliffeqarfimmi piginnittoq imaluunniit sulisut kalaallisut piginnaaneqanngippata. Kiisalu kaammattuutigineqarpoq skabelonit ilitersuutitut sillimaniarnermut suliarineqassasut.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalackersuisoqarfiup maluginiarpai kissaatigineqartut, kisiannili isumaqarluni pingaartoq aamma pisariaqartoq sillimaniarnermut pilersaarutip kalaallisut tuluttullu suliaanissaa.

2.5.. Kapitali 7 -imut: Pisortanut aningaasartuutinik utertitsisarneq

Ineqarnermut Attaveqaasersuutinullu Naalackersuisoqarfik nalunaarpoq pisinnaatitaaffinnik allanngineq Inatsisartut inatsisaanniittoq pisortat sulianik ingerlatsisarneranni kiisalu Inatsisartut inatsisaanni pisortat ingerlatsisarnerat pillugit tunngaviusunik inatsisini pineqartuni pisariaqartut, kiisalu paasisinneqarsinnaanermik pisinnaatitaaneq tunngaviusumik pisinnaatitaaffiusoq, tamannalu tunngavigalugu isumaliutigeqqittariaqartoq piumasaqaateqarnissaa akitsuummik paasisinneqarsinnaatitaanermi. Ilanngullugulu oqaatigineqarpoq inassutigineqartoq peqqissaartumik suliarineqassasoq qanoq akitsuutip taaguutaata aaqqissuunneqarnissaa, inatsisitigut ileqqussat atasut ilanngullugit.

Nuna Advokatit oqaatigaat akitsuutitut aalajangersakkami suliamik ingerlatsinermi qinnuteqaatinik ilaasoq Naalackersuisut piumasarinnaagaat akiliuteqartoqartarnissaa suliamik ingerlatsinermi, paasisinneqarnissamut atasumik, tamannalu pisinnaatitaaffiusoq, kiisalu takuneqarsinnaanngitsoq piumasaqaatinik aalajangersaasoqarsimanera akuersissutitut inatsisini allani. Taamaattumik aalajangersakkap peerneqarnissaa inassutigineqarpoq.

Inuussutissarsiornermut, Niuernermut, Aatsitassanut, Inatsisinik atortitsinermit Naligiissitaanermullu Naalackersuisoqarfik oqaaseqarpoq siunnersuummi § 12-imi pisinnaatitsisoqanngitsoq akiliuteqartitsisarnissamut Inatsisartut inatsisaat naapertorlugu paasitinneqarnermi, kisiannili tamanna taamaallaat sulianik ingerlatsinermut inatsimmi nalunaarsorneqarsimasoq. Naalackersuisoqarfiup nalilerpaa pissusissamisoortoq qinnuteqartut paasitinneqarnermi akiliuteqartitsisarnissaq, allaffissornernut aningaasartuutitut atatillugu.

2.6. Kapitali 9 -mut : Zone-nut immikkoortitserineq il.il inuussutissarsiutinik ingerlatsinerni sumiiffinnullu killilersuutit

Association of Arctic Expedition Cruise Operators inassuteqarpoq qularnaarisoqassasoq periaasissamik soqutigisaqartut tamarmik piffissalernerqarfigisaannik periarfissaqarfilerneqarfigisaannillu siunnersuummut illuatungiliisinnaanermik, sumiiffinni

aalajangersimasuni killilersuutinut atasunik. Ilanngullugu inassutigineqarpoq oqaasertaliisoqarnissaa atugassarititaasut suut zone-nut tunngaviunersut pillugit, taamaasillugulu qularnaarlugu ataqatigiinneq aamma isiginiagassat zone-nik ingerlatsinermi. Inassutigineqarpoq zone-nik nutaanik atortuulersitsineq malittarisassanillu tamatumunnga atasunik allanngueq atortuulernissamut naammattumik piffissalerneqassasoq, imaluunniit ikaarsaariarnermi piffissaliisoqassasoq, inuussutissarsiortunut siumut ilisimatsitsisoqareersinnaaqullugu.

Nunalerinermut, Imminut Pilersornermut, Nukissiuuteqarnermut Avatangiisunullu Naalackersuisoqarfiup kissaatigaa akulerunneqarnissi, zone-nut immikkoortiterineq pilerpat, ersernerluttutullu nalilerlugu kina aalajangersakkamik aqutsisuunersoq.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup maluginiarpaa kissaataasoq aammalu oqaatigissallugu malittarisassiorneq pissammat allaffissornikkut suliatut tusarniaassutaasussatut il.il. – atortuulersitsineq ikaarsaariarnermi aalajangersakkat il.il. tamatumani aalajangersaavigineqassallutik.

VP Expedition Development neriuppoq umiarsuit takornariartaatit immikkut aallukkunnaarneqassasut nunami zone-nik immikkoortiterinermi, kiisalu ingerlatanik killilersuinermit aalajangersakkat tunngaveqartariaqarlutik nassuiaasiornermik qanoq anguniakkat anguneqarnissaannik.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup kissaataasut maluginiarpai.

Aningaasaqarnermut Akileraartarnermullu Naalackersuisoqarfik isumaqarpoq malittarisassiorsinnaanikkut angalaartarnermut uninngaartarnermullu sumiiffiit ilaanni annertuumik aqutsisoqassasoq sumiiffinni sorlarni inuussutissarsiortoqarsinnaanerani (kommunit isummereersimangippata kommunimut pilersaarummi il.il.), taamaalillunilu pisussaaffimmik kommuniniit Naalackersuisunut nuussisoqarluni. Nalunaarneqarpoq tigussaasumik pilersaarusiornermut atatillugu qanittumiittut oqaasissaaqataanerit pingaartinneqarmat, taamalu najukkani oqartussaaqataaneq, siunnersuullu ileqquusumik unitsitsinerussalluni. Tamanna tunuliaqutaralugu inassutigineqarpoq siunnersuummi § 1, imm. 2, aamma § 15, imm. 1, kililerneqassasoq, inuussutissarsiutigalugu *takornariartitsinermik* ingerlatsineq, sumiiffimmi aalajangersimasuinnarni pisinnaasoq.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup oqaatigaa pissusissamisoortutut isigineqarsimammat Naalackersuisoqarfiup oqartussaaffigisaata iluani aqutsisoqarnissaa zone-nut immikkoortiterinermik. Naalackersuisoqarfiup eqqumaffigaa malittarisassiortoqassanngitsaq nalunaarutitut oqartussaaffik sinnerlugu, soorluttaaq oqaatigineqassasoq siunnersuummi nalunaarneqarmat Naalackersuisut pisinnaatitaasut suliassaqarfimmut malittarisassiorsinnaaneramik, kisiannili aallaavittut kommunit suliassanik aallartitsisartussaasut, immikkullu illersuisoqarluni, immikkullu atugassaqartitsisoqarluni inuussutissarsiutinik ingerlatsinernut, imaluunniit sumiiffimmi angalaartarnermut. Naalackersuisoqarfik isumaqarpoq tamatumuuna naammattumik isiginiasoqartoq kommunit oqartussaaffiannik, najukkani

misilittakkanik il.il. Naalackersuisoqarfiullu aamma nalilerpaa zone-nut malittarisassat siammassinnerusumik atuuffeqartariaqartut takornariartitsinerup saniatigut.

2.7. kapitalimut 12 -imut: Atortuulersitsineq aamma ikaarsaariarnermi aalajangersakkat Advokatit aamma Visit Greenland oqaaseqarput piffissaq ikaarsaariarfusoq sivikippallaartoq.

Association of Arctic Expedition Cruise Operators inassuteqarpoq qularnaarisoqassasoq ikaarsaariarnermi aalajangersakkanik pitsaasunik. Qularnaarisussanik najukkani ingerlatsisut naammattumik piffissaqarnissaannik malittarisassanut nutaanut ikaarsaarnissamut, taamalu ikaarsaarerup ajortortarisinnaasai annikitsuutinneqarlutik, suliffitsigut inuiaqatigiinnilu aningaasarsiornikkut. Oqaatigineqarpoq tamatumunnga atatillugu piffissap ikaarsaarfiusup 1. januar 2027 -imut piffissaliunneqarsimanera pitsaasuusoq suliffeqarfinnut ingerlatsereersunut. Tamatuma kingorna malugeqquneqarpoq tamanna atuukkunanngitsoq ingerlatsisunut Kalaallit Nunaanni ingerlatsinermik pilersaarusiortunut, kisiannili taamaallaat ingerlatsereersunut.

Inuussutissarsiornermut, Niuernermut, Aatsitassanut, Inatsisinik atortitsinermut Naligiissitaanermullu Naalackersuisoqarfiup kissaataasoq maluginiarpaa sivisunerusumik ikaarsaariarnermut piffissaqarnissaannik suliffeqarfinnut maanna pioreersunut. Taamaakkaluartoq Naalackersuisoqarfik naliliivoq piffissaliineq ukiunik 5-10-nik siunnersuummut illuatungiliunnissamut aatsaat ukiut amerlasuut qaangiuppata sunniutissasoq.